

刺龍江先生文集序  
 唐人有言大賢君子鍾運而  
 生文以立言垂世亦鍾運盛  
 衰矣信哉言乎明興七葉  
 孝宗敬皇帝以人文化成天  
 下王澤汪濊泰和融液緝文  
 好古之士一時輩出彬彬焉

011900  
 國立中央圖書館  
 藏書

板匡  
 (公分)  
 18.9 × 14.5

11618  
 4册

國立中央圖書館藏善本  
 書名：龍江集  
 作者：明唐 錦撰  
 卷數：四卷  
 冊數：四册  
 板本：明隆慶三年唐氏聽雨山房刻本



與三代同風矣此非極治之  
朝綦隆之運乎弘治歲丙辰  
我上海龍江唐先生負山海  
之英躡利賓之會年斯弱冠  
拔萃甲科海內鴻生頎儒雲  
集京師相與談說詩書追琢  
藝文者不可勝數鸞翔鳳翥

家擅厥長人握典寶公才穎  
敏推擇先登盛矣已而出宰  
東明爰有民譽馴雉紹魯恭  
之躅鳴琴揚宓子之化最績  
循良徵拜給事入直而蹇諤  
著聲理齟則公清效績時爲  
逆瑾所銜左官州郡非其愆



也居無何瑾誅環復歷留都  
郎署茂樹聲稱繼擢江西按  
察副使提督學校持身峻潔  
品藻精明士心咸附嚮往傾  
著蔡之誠瞻依聳山斗之望  
前後學憲皆所不及人至於  
今稱之迨其掛冠歸里優游

林壑者三十餘年恕以同人  
和不犯物遡其風軌易直可  
師鶴鳴來子和之應鴻漸植  
清遠之儀間黨孚化古之所  
謂鄉先生生有益于時歿而  
可祀于鄉者公其無愧之矣  
公考終數載嗣于世具光祿



君懼遺文之放失獲十一於  
網羅釐爲十有四卷刻置家  
塾屬序於予憶昔公與予爲  
忘年交德音在耳展卷憮然  
遂詮次數言冠之琬琰揭示  
將來熹先輩典故之存標  
明朝文獻之盛云爾公聲詩

清婉簡夷不失溫柔敦厚之  
教序記碑銘諸作咸善罔非  
平正明達之言觀者當自得  
之乃若瓌才煒行德懿勳名  
備載同榜太史玉峰朱公誌  
銘今已入剌中予皆可得而  
略也



隆慶三年夏六月朔

賜進士出身都察院左都御史進階榮祿大夫致仕前刑工二部尚書邑人潘恩撰

龍江先生文集序

近世儒紳先生抱道談藝者無慮數十家乃惟龍江先生之文爲世誦法信而必傳豈非以爾雅溫厚追復古初之盛獨有關於世道與余小子少從先生游習見其文嘗受而讀之竊以爲士之不朽者在是先生命余曰是壯夫之所耻也



子獨何羨乎士當表見於天下者固不止此也先生嘗所自力在篤行蹈道求儷古之聖賢不屑以文藝顯於世故其學務以實踐爲地取世儒所稱良知之理悉著於躬行不苟談性命以眩俗其爲文辭皆根柢六經無詭異辨博新奇之說而粹然一出於道嗟乎此非所

謂龍江先生之文也哉夫文與氣運相關蓋自昔記之矣皇古淳龐完固渾噩之文出焉不期於文而文至矣後之作者刻意攻文文迺寢薄豈非以求諸文而不求諸始乎明興斷瑯爲樸復於本始劉宋諸大家振耀淳風訓世作則自後楊李揚芬於中葉李何繼興於



近代咸以爾雅溫厚之文宣國  
家之盛氣炳如麟如共成一代文  
章之體蓋能追蹤古初此隆墳典  
焉非單言隻語之醜纖可從而軒  
輊也中世獎右浮靡士習益陋經  
生不究明指歸馳舛踵殘以幸利  
祿文士則湊釘偶儻剽掇故藻爲  
容澤此猶不能涉靡曼堂戶烏睹

爾雅溫厚哉先生悼世懷古循軌  
邈流振積衰之運還於古初一時  
詭異之習往往嚮風而易慮其有  
功世道豈淺鮮哉先生弱冠登朝  
大節焜燿忤權豎而不撓亢逆藩  
而不屈再罹黜辱濱於危殆而不  
疑文章節義凜凜賈傅宣公之遺  
烈乃其中固自有本矣當其督學



江藩獨持大體不尚苛屑之政都  
肄諸生得人人自便及評隲臧否  
不爽尺寸士有遺思焉會寧藩構  
逆先生以不屈被繫卒能乘間返  
正奪門以納王師忌者毀其功不  
錄顧復蒙之以罪先生終不自明  
時時概見于篇什悲夫藉第令無  
齟齬於時獲盡其用斯鴻鉅之業

可坐而致寧獨藉文藝自見哉先  
生性嗜史籍自勝冠至於耄齒口  
未嘗廢稱說凡士民之賢豪有聲  
者皆願交親之其樂善詡詡推置  
自喜誠其中不能自釋也優游林  
壑餘三十年逡逡醇謹躬孝弟廉  
讓之節如一日族里化其行幾於  
還醇矣自非質有其內烏致是哉



雖天靳其施而有文足以爲訊有  
子世具君能世其學是役躬親校  
讎鬻琴書以命梓忠信姍懿紹美  
後先可謂聲施不窮矣天於盛德  
之報豈獨無意其間哉先生官諫  
議日奏疏凡若干篇皆論當世大  
務今燬不存所存僅僅止此又非  
先生所以垂後之意昔陳思王有

言後世誰知訂吾文者夫訂文非  
難難於知意耳余於是竊歎先生  
之懿輒附知者終其說於簡末云  
隆慶三年歲在己巳季夏望日  
賜進士出身尚寶司司丞後學顧  
名世頓首撰



明故中憲大夫江西按察司提學副使唐公墓誌  
銘

賜進士及第資政大夫南京吏部尚書致仕前翰  
林院侍讀學士

經筵講官兼脩 國史睢陽朱希周撰

唐之先系出晉陽爲宋御史中丞子方之後

國初有諱英者仕于上海之稅課局因家焉公之  
五世祖也大父諱昭以長子中丞公瑜先任衢州  
知府封如其官父琛以中丞有軍功授金山衛指  
揮使後以子貴贈刑部主事娶徐氏趙氏徐贈安



人趙生公封太安人公諱錦字士罔別號龍江自  
少以文學名弘治乙卯年二十有一領南畿高薦  
明年遂登進士時 詔脩 大明會典吏部擇進  
士之有文學者令採撫諸司事例以付史館公實  
與焉書成而稱疾告歸家居養親者數年不忍別  
去厥考強之始往赴選先是同與史事者皆得京  
秩公恥援例自陳仍以常格授東明縣尹其爲治  
守已執法以安民爲本凡有興革民皆便之時議  
者以河患不息 奏開賈魯河以洩水事下工部  
檄北畿兩淮河南山東諸巡撫會勘特委公相度

形勢公言此河淤塞已百餘年延袤至數百里開  
鑿必動衆億萬恐所費不貲而功必無成矧前元  
以開河致亂尤爲可慮莫若因時處宜漸爲隄防  
以遏其勢可也巡撫諸公據其議以聞事竟寢監  
司嘗署其考曰學優才敏政舉民安人以爲確論  
丁卯召爲兵科給事中 勅理廣東鹺政稽積逋  
百萬引凡小民所負悉爲蠲除官司有侵匿者皆  
劾寘於法時逆瑾擅權凡奉使回必納賂往見公  
獨否瑾銜之撫拾無所得乃以巡歷不遍謫判深  
州甫兩月而瑾誅遂遷南京工部主事會 詔脩



孝陵中官董其役多所需索公裁之以法所省過半而功倍之蘆洲爲本部所轄公嘗司其事一洗宿弊輿論帖然壬申遷南京刑部員外郎尋丁外艱服除入朝爲刑部郎中有獄囚積年不決察其可矜狀爲奏請出之嘗慮囚湖廣平反殆三百人咸服其平恕丁丑擢江西按察副使勅董學政嚴條約肅矩範而校藝悉當士子莫不心服已卯會宸濠作亂公被囚王府及宸濠舉兵離省守者稍懈公密召役夫奮鬪而出乃安集居民激以大義令悉捕逆黨之守城者城中晏然又以兵

力寡弱恐不能支適都憲王公守仁駐兵鄰境乃遣人馳請入城與之共守王公旣至嘉公之功欲薦于朝其官屬有領兵者所統皆往年招降羣盜專以攻劫爲事焚燒民居五千餘家死者不可勝計領兵者恐以妄殺獲罪乃妄言麾下萬銳臨陣所殺以匿罪冒功公之功竟爲所掩反以失守落職知者咸爲之太息而公不自辯也迨今上卽位之六年究覈當時功罪始白其事乃賜復章服尋奉詔例致仕後以子鏊爲中書舍人推封中憲大夫蓋仍其舊秩也公爲人篤於孝友遇



族黨咸有恩意雖甚老精力不衰對客談論疊疊不倦平生以清慎自守尤好拯人之難守令每詢民間利病必悉心以告鄉人多受其惠居常好學不已凡諸子百家之書靡不周覽為文章莊重有法後進以為楷範所著有文集若干卷及上海大名二志龍江夢餘錄諸書頃避倭寇之亂寓居華亭之石湖塘以嘉靖三十三年四月十有三日整襟危坐而逝其生則成化乙未十二月二十八日也享年八十配陸氏封恭人為宗伯文裕公之女弟有賢行先卒子男三長即壻娶朱氏贈孺人繼

談氏封如之次爛次贊俱太學生爛娶郁氏贊娶顧氏壻爛皆先卒女四適王應辰趙國沈應魁談萬卷應辰國俱太學生沈氏談氏女皆出側室何氏孫男五長繼榮太學生娶陳氏次繼道娶朱繼勳娶顧繼陞娶陸繼茂聘郁女三適庠生陸曠鄉進士趙灼及劉文麟贊等將以甲寅年季冬廿又四日葬公於廟涇之原乃持奉化尹徐君獻忠所為狀請予銘墓惟予與公三試皆同舉迄今六十年矣且家居鄰郡相知實深而謝事以來杜門日久不能效趙康靖之訪歐陽文忠每以自愧予昔



年八十時公嘗製詞爲壽今公壽亦躋八十予固將往賀之而誕辰未至竟不及待方爲之痛惜不已銘又安可辭哉銘曰

昔在先朝逆藩構亂誰其定之唐公爲先身被拘囚奮挺而出乃集居民忠義是率糾我義士俘彼逆徒金湯以固禍亂斯除孰掩其功反加之罪公不自辯怡然去位今皇繼統公道始彰青蠅一洗仍畀服章亦有令子官居京秩爰沐封恩綸音載錫繫公平生政績孔多中道而尼其如命何八十其年厥壽斯邁子姓森森靡福不備公雖逝矣令聞如新爰最其迹以示後人



龍江集目錄

第一卷

詩

題聽琴圖

題韓湘子像


送曹侍御赴南臺

贈華亭沈虛明

題四皓奕棋圖

題老子出關圖爲玉洲作

清河舟中得夜明木





題黃鶴樓次西涯少師韻寄鳳山中丞

發舟錢塘江

拜岳武穆祠二首

奉天門早朝

晚出左掖

禁直

白沙晚渡

賞梅三首

飲總鎮南園

書韶州察院壁

皂口舟中翫月

小溪曉行

東明郊行

重陽 賜燕

月殿秋香

柳燕

蓮花

貴溪舟中

九日過釣臺

秋夜無題



送王僉憲進表便道省親

嶺南察院和郁道長韻

送湖臬高僉憲陞陝西副憲

拜徐孺子墓

近山

玉泉上人

初至湖南贈張汝禎道長

慶祖道中

壽馮雪竹

張石川副郎塚廬巢燕二首

次文峰先生秋興二首

望杜子美草堂

過顏魯公祠

楚雄拜武侯祠

過滇南思武侯擒孟獲有感

和大司馬彭幸菴過淮陰祠韻

蒲泉

題滕王閣圖

題便面小景

賀宣城伯衛公六十



東雲

西蘆

送顧龍海春試

雨中哭子儼

贈浦小癡

挽謝楓林先生

送顧侍御北上

尋仙卷爲陳相士作

登大伾山

贈星士周野航

度梅嶺

慰石郡伯喪子

讀元史誅鉄木迭兒事

省署同僚邀登城南諸山次韻

芥

送江臬林憲長陞河南方伯

白蓮

送劉中丞征嶺東

壽儼山先生

西林



和王僉憲潯陽道中之作

書南康山中公館

使還迂瑾謫判深州

送師員外陞江西僉憲

送張侍御使節還朝

市隱

石津

溪隱

送馬明府之京

夢歸

對長垣公署新竹

途中卽事

對鏡見白髭

喜雨

月湖

舟次邳州

竹亭

送朱純齋應召

拜文山先生祠

第二卷



序

遺槐先生詩集序

玉洲先生文集序

贈都憲劉公巡撫延綏序

中丞彭公遺愛詩序

海珠贈別詩序

蠖菴疏稿序

文裕公續集序

大老編序

滄浪櫂歌敘

第三卷

序

賀憲使復菴先生任公榮擢序

贈郡伯兩城靳先生之任吉安序

臥龍文集序

重刊褚氏遺書序

左傳要語序

代作

贈憲伯東江牟先生赴任序

賀八峰先生旌獎序

賀望川先生旌獎序



贈右山喻先生考績登朝序

第四卷

序

贈一松先生治海功成序

賀勅封顧母李孺人序

賀少府周侯獎勵序

日新先生挽詩序

送西峰黃先生擢教京府序

張氏宗譜序

褚氏遺書序

黎陽王太傅詩選序

代作

王太傅詩選後序

俯碧詩序

重刊靜芳亭摘稿序

贈司幕鄧君入覲序

第五卷

碑記

鄭侯去思碑

新建衛公仲由墓祠記

吉安府學新修記



張侯德政碑

第六卷

碑記

新建萬年縣儒學記

中洲方先生去思碑

馮侯去思碑

第七卷

碑記

重建新豐縣廟學記

東明縣新建預備倉記

思貽記

曹侯德政碑

開封府清軍公署之記

古溪記

第八卷

墓誌銘

江西右叅議芋西儲公墓誌銘

四川左布政使西津沈公墓誌銘

旌德知縣懶樵孫公墓誌銘

朱母張氏墓誌銘



第九卷

墓誌銘

顧景高先生暨配王秦二孺人墓誌銘

誥贈宜人喬氏墓誌銘

素菴陸公孺人張氏合葬墓誌銘

工部司務士謙唐公墓誌銘

士重唐君墓誌銘

唐孺人徐氏墓誌銘

亡姪世學唐君墓誌銘

亡姪唐世載夫婦合葬墓誌銘

第十卷

墓誌銘

亡兒唐儼墓誌銘

季子重壽權厝誌銘

亡女天水郡宗婦墓誌銘

沈孺人唐氏墓誌銘

第十一卷

墓誌銘

太學生守約陸君墓誌銘

東臯沈公暨配譚孺人墓誌銘



劉母孺人曹氏墓誌銘

北山陳公墓誌銘

墓表

處士可閒施公墓表

誄

顧令人劉氏誄

第十二卷

行狀

詹事府詹事兼翰林學士儼山陸公行狀

第十三卷

行狀

山東按察司副使遺槐談公行狀

封廣西按察司僉事願菴潘公行狀

三兄浙江布政司都事恕齋行狀

第十四卷

雜著

祈雨祭城隍文

張龍山都諫進士巾服像贊

少宗伯賓山張公像贊

栢舟頌



忠經引

夢餘錄引

鄭氏家規引

古今說海引

書大名志後

書喬氏族譜

跋王太傅詩選

歸朝歡 賀郡尊述齋何公擢河南憲副

慶春澤 賀兵憲敷蒙泉先生 勅獎

慶春澤 贈潛厓李先生署篆上海

歸朝歡 餞郡尊梓谷黃先生

鵲橋仙 賀東明二尹高君獎勸

玉帶花 壽同年朱玉峰太宰

念奴嬌 次韻荅桂洲閣老

賀聖朝 賀顧汝修得子

鳳棲梧 送劉海津赴任瀏陽

鳳棲梧 送邑侯望川先生

鵲橋仙 贈東溪秀才





龍江集目錄終

隆慶己巳唐氏  
聽雨山房雕梓

龍江集目錄終

長洲錢世傑寫  
姚起刻

國家圖書館, NATIONAL CENTRAL LIBRARY, TAIWAN, R.O.C.



龍江集卷之一

雲間 唐錦 士綱

詩

題聽琴圖

紙牕露濕金徽冷何處輓轡響銀井須臾松風拂  
座來夜烏啼碎梅花影柴扉寂寂春自遲流水高  
山入夢思賞音無地尋知己欲買黃金鑄子期

題韓湘子像

昌黎千載士虎踞白玉堂毛錐三寸奪造化抉剔  
海岳無晶光此事古來神鬼忌真宰泣訴令投荒





頃刻花逡巡酒藍關雪花大於手水襯馬蹄凍欲  
僵等閒笑破山人口驅烟霧御氤氲仙耶非耶且  
勿論靜裏悠悠誰似君

送曹侍御赴南臺

錦溪清冽名吳東百年孕秀生人龍文章力欲追  
古作一第豈足論君功世俗紛紛薄外補君領縣  
檄心無忤丈夫制行自竒特肯與兒女爭青紅廉  
勤兩字立基址濟以方略皆旁通沙民競說好官  
長嘆息杜母今遭逢日長無事捲簾坐堦下草色  
春蒙茸使者上書報天子旌此循吏償其庸

詔書召置紀綱府時論翕然稱至公捨豺問狸士  
所耻須使虎狼悲技窮稜稜霜筆貴嚴簡指摘細  
瑣非英雄王素鵲桓典驄古來御史要孤峻亭亭  
碧漢凌長松 聖明不世安忍負佇看臺閣欽高  
風

贈華亭沈虛明

虛明醫術傳長桑上池神水親曾嘗望形洞見臟  
與腑豈但診切推精詳靈樞素難總貫串逢人背  
誦聲琅琅出入古方不拘泥往往變化窮幽茫相  
機制勝有神用老將旗鼓疇能當五運六氣在指



掌何物疾豎能張皇保嬰活幼著奇績三吳千里  
名傳揚祈求邀請日無曠門外羅立森成行平生  
嗜義不嗜利温然襟抱如春陽古來名醫多得道  
奉耽思邈尤彰彰况君生來有仙骨功行應已書  
金堂傳聞 明詔搜隱逸竒寶恐難終闕藏節宣  
元化助燮理四海熙熙同壽康

題四皓奕棋圖

鮑魚風腥蛇走陸海底驚蛟翻地軸夜深密約笑  
圯橋白日楸枰自空谷芝苗濕雨雲朶香石髓作  
羹霜粉熟鴈行虎穴信意排酣戰何曾勞寸鏃楚

霸秦強傅觸蠻誰呂誰劉總蕉鹿平生懶拜溺冠  
翁肯向兒曹效驅逐可憐廣術起畱侯漢室君臣  
莫能燭知心仗賴鐵仙歌袞鉞森嚴聞者服四老  
九泉應撫掌千載青編洗遺惡

題老子出關圖爲玉洲作

柱下老史道德宗變化恍惚人之龍前身知是廣  
成子後世或云河上公髣髴兩鬢白於雪神氣內  
守顏如童憫此濁世懶着脚遠駕青牛來自東函  
關峩峩高百尺關頭紫氣連蒼穹當時抱關者誰  
子能於塵路窺仙踪天書雲篆啓玄秘包括元氣



開鴻濛流沙西去幾千載東海今朝復見翁蚤歲  
聲名擅場屋詞鋒筆陣誇英雄晚耽冲素謝華寵  
肯爲鍾鼎勞形容閉門默契五千字一一星斗羅  
心胸冥神塞允得妙理蹴踏造化鞭雷風指點蓬  
瀛笑清淺天長地久無終窮

青河舟中得夜明木

有木有木名夜明閃爍睡眼流光晶熒熒床頭久  
不滅魂夢展轉增猜驚初疑紅爐熾楮拙忽訝紗  
幕團丹螢書空咄咄稱恠事豈有鬼物相纏縈形  
求理究總莫測俄聞鷄唱天將明披衣亟起細辨

認朽株三寸牕間橫摩挲頗作茵葦氣把玩久覺  
魚龍腥吁嗟瑣物真可笑暫爾乘昏與燭爭

題黃鶴樓次西涯少師韻寄鳳山中丞

扁舟鄂渚連宵泊一樽聊伴城樓鶴月光照人如  
鏡明水色涵空更澄廓樓背小亭白石鑿裂處似  
有藤蘿絡欲將勝致付毛生掌中酒杯且權閣凌  
晨歷覽週遭峰村歌野曲鳴商宮官清萬口託奇  
遇民隱九重偏易通戰馬千羣臥芳草山川二百  
皆春風瀕江小歉亦偶爾全活正賴青州翁中臺  
大夫南國彥胸中石渠有其半經綸餘滴灑秋風



流水行雲看染翰名樓秀句兩爭雄千載鶴詩今  
再見憑欄獨抱廟堂憂舉頭嬾識江山面酒酣携  
笛傍梅花吹徹楚雲飛碎練不須高語驚星辰聲  
名久已登霄漢

發舟錢塘江

江流限封疆吳越判彼此伐鼓發樓船潮聲吼岸  
兕朝潮暮潮中千山萬山裏朝潮纔落暮潮來一  
山未了一山起潮落潮來如送迎山雨山晴互青  
紫冒險陟華嶺韓公夜半航海憶蘇子謾矜竒絕  
冠平生未暇悔狂頻咋指諫垣新命感遭逢簡任  
叮嚀勞 敕旨嶺南醜政久蠹弛剔扶爬搔自應  
理公餘未必妨游觀珠海羅浮供筆底歸來無術  
禪廟謨山水新圖三百紙

拜岳武穆祠二首

湖草春寒綠未回荒涼石獸使人哀碧山高塚埋  
冤骨青棘幽魂泣雋才江北壺漿迎上將天邊星  
象坼中台貞祠况近錢塘路又見潮聲捲怒雷  
幾度長歌復短吟冷風吹淚欲沾襟一杯冤土千  
年血五國荒城萬里心慘澹丹青生氣凜陰森松  
檜暝雲深思陵金盃知何處斷髮荒跡已莫尋



奉天門早朝

曉風輕度鳳樓鐘黃幄低垂護 聖容天上九關  
嚴虎豹望中雙玉躡蛟龍香凝寶蓋爐烟細星綴  
紋綃扇影重鞭罷兩班齊北拱仗前牽過五花驄

晚出左掖

彩毫批鳳絳霜濃袖捧驪珠下九重宮柳撼風飛  
瘦碧香雲擁座罩輕紅堦前武士橫金虎檻外寒  
泉噴玉龍緩步掖垣歸漸暝 君王猶御未央宮

禁直

諫書無補媿清班青瑣雲深白晝閒袍袖香溫初

對罷詔黃墨濕乍塗還樂聲奏鳳知天近闕影移  
龍覺暑慳隱几偶然成小寐萊衣時舞夢魂間

白沙晚渡

作音冷朝朝雨催帆日日風水清山露趾雲重月  
沉容北闕青天上高堂白髮中秋懷正無賴嘹唳  
數聲鴻

賞梅二首

酷愛幽芳盡日看凍雲烘透粉痕乾吟邊風勁愁  
聞角折處枝斜恐礙冠澹拂湘簾橫月影薄裁吳  
苧護春寒含情莫怨相知晚欲補離騷似已難



翠羽聲沉月向昏  
紙牕幽夢鎖香魂  
虬身染霧鱗  
猶濕懶隨塗霜玉  
未溫忍凍欲償詩  
客債先春應  
識化工恩深山自笑  
無人問寂寂踈籬半掩門  
臨風脈脈度寒朝  
誰與花神破寂寥  
碧蘚封香春  
尚淺石池浸影雪  
初消枝藏病鶴如  
憐瘦瓣落深  
宮欲鬪嬌遙想西湖  
明月夜幾人携酒踏溪橋

飲總鎮南園

海天空闊有仙鄉  
烟鎖簾櫳鶴夢長  
黃菊照屏霜  
影瘦紫蒲穿石水  
痕香枰開虎穴棋  
爭險匣迸龍  
精劍吐鏃醉裏是誰歌  
白雪繞梁清響尚悠揚

書韶州察院壁

嶺南暮冬如暮春  
鳥聲百變殊可人  
上堦芳草碧  
烟細入檻芭蕉羅扇  
新芙蓉灣頭花更好  
暖日晴  
波漁艇小忽憶江南  
開畫船錦雲十里湖山曉

皂口舟中翫月

船頭坐看月升空  
兩岸青山落鏡中  
千里懷人幽  
夢遠一樽對客賞  
心同誰家玉笛風  
吹到此夜銀  
河路可通莫惜更闌  
辭酩酊明朝萍梗又西東

小溪曉行

望中漠漠總烟嵐  
風土殊方惜未諳  
詩爲愁多添



日課酒因性懶廢朝酣鳥爭棟子和霜墮僧拾松  
枝帶葉擔漠漠江雲飛漸杳滿前新景向誰談

東明郊行

巡行入村落觸眼盡荒涼掃葉供晨爨携兒趁夕  
陽敗茅遮破屋折葦障頽墻欲拯慙無策誰云令  
尹良

重陽 賜燕

鵠立仙班曉露寒宴傳 天語下雲端糕聯紅玉  
炊新棗酒泛黃封出大官九奏鳳韶聲隱隱雙開  
雉尾影團團小臣何幸沾 恩寵默倚西風媿素

餐

月殿秋香

銀闕沉沉鎖嫩涼滿庭香雪綴嬌黃幾人礪斧誇  
吳健此夜登樓笑庾狂袖裏高枝秋弄色眼中清  
影玉生光酒酣記得歸時路鶴背西風碧漢長

柳燕

芹泥脚罷東風軟舞趁綠陰嬌似嬾飛來新壘立  
多時說盡閒愁春不管

蓮花

薰風池館午雲涼紅玉層層沁水香疑是西施醉



歸後笑將微露洗殘粧

貴溪舟中

山光歸興兩爭濃  
醉到蓬窻任晚風  
文印手提還  
聖主釣竿心許作  
漁翁藥籠報國參  
苓滿海嶠  
藏名鳥鵲空  
唯有白雲堪把玩  
不成雷雨不從龍

九日過釣臺

滿蓬風雨載秋懷  
歸夢偏酣舊釣臺  
世路悠悠那可戀  
天心落落總難猜  
旅中佳節歡娛減  
鏡裏清霜歲月催  
遙憶紫芝峰下菊  
絨香應待主人回

秋夜無題

湘簾籠月夜沉沉  
立遍闌干思轉深  
露冷芙蓉嬌欲瘦  
霜嚴楊柳脆難禁  
淚憐銀燭和心剪  
情寄青鸞托夢尋  
擬就君平卜歸耗  
小釵拚取鳳頭金

送王僉憲進表便道省親

寶鷄薰風破曉飛  
白雲紅霧夢依依  
九重殿陛瞻龍袞  
千里庭闈望綵衣  
湛露香濃銀燭夜  
玉卮春暖草堂暉  
消埃欲補乾坤大  
不似相如此日歸  
嶺南察院和郁道長韻

嘆息西風滯葛衣  
幾多情事與心違  
白雲萬里天如寄  
黃葉千林客未歸  
鴈足有時憑附信  
鷗盟何



日許忘機清高偏愛陶彭澤三徑何曾着是非

送湖臬高僉憲陞陝西副憲

共是當年墨綬郎曾於東郡識甘棠題詩尚憶忙  
中寄遺寫猶傳去後香瑣闥風聲誇九鼎霜臺月  
色徧三湘應知此去雲霄近只恐湖山隔渺茫

拜徐孺子墓

五里城南墓千秋物外心古今懷去就山水繫高  
深鳳遠梧空老亭荒竹自陰清風時復至吟罷一  
披襟

近山

卜得幽居傍翠屏澗泉偏愛枕邊聽曉來嵐氣衝  
簾入濕透床頭相鶴經

玉泉上人

泉水清於玉禪心淨似泉傳聞玉泉水曾吐鉢中  
蓮

初至湖南贈張汝楨道長

黃葉滄洲動曉霜埋輪風采識張綱楚山雨過秋  
如洗夢澤烟消水亦香北獻皂囊驚絡繹南飛孤  
隼看翺翔曾聞太史傳新報執法連霄倍有光

慶祖道中



擾擾黃塵道路長  
閒邊巢許笑人忙  
軒乘野鶴元非性  
服被林麋祇發狂  
煮石作羹山骨嫩  
掬泉洗耳水花香  
追思往事仙凡隔  
獨立郵亭數鴈行

壽馮雪竹

雪竹先生抱古心  
清虛不受一塵侵  
浮光映月明千里  
直節凌霄聳百尋  
靜掩袁扉高臥穩  
深開蔣逕俗緣沉  
謾誇歲晚呈佳瑞  
更喜平安報好音

張石川副郎塚廬巢燕二首

華表雲深鶴影孤  
蕭蕭風樹集啼烏  
世間物性偏相感  
廬畔新巢燕引雛

暮草離離晚露收  
血痕點點滲松楸  
烏衣亦解憐純孝  
時傍苦廬語不休

次文峰先生秋興二首

玉露新涼秋滿林  
曉風穿戶氣蕭森  
寫懷詩句傳梧葉  
遣興壺觴傍竹陰  
夢短爲懸經國慮  
年豐偏愜濟時心  
授衣節候知將近  
昨日紗帷透遠砧  
暮雲風急鴈行斜  
客裏逢秋感歲華  
落葉響隨窗外雨  
枯枝飄作水中槎  
誰家斷續敲砧杵  
何處喧嘈競鼓茄  
賴有清香能慰藉  
石欄巖桂正開花

望杜子美草堂



浣花卜築景偏幽勝壓西南十二州千載尚嗤嚴  
子隘一生長抱杞人憂乾坤逸氣吞仙李風雅餘  
音到赤劉此日馬前聞杜宇不禁清淚灑江流

過顏魯公祠

野鹿啣花禍已胎漁陽鼙鼓忽然來奔降滿地千  
官散捍禦唯公一壘開赴死不辭將國命臨危真  
見濟時才仙家附會云尸解此事荒唐我尚猜

楚雄拜武侯祠

策馬龍岡路轉西茂林修竹映榱題帳前雲傍爐  
烟起簷外風疑石馬嘶長恨袁曹真虺豕誰知陸

呂亦鯨鯢堂堂兩表扶忠義日月光高泰華低

過滇南思武侯擒孟獲有感

萬里滇池獨駐軍深驅那惜瘴如雲天威薄試爭  
輸款將略非長亦妄云才大豈徒不十倍運窮聊  
爾國三分忠魂不逐秋風散應化長虹掛夕曛

和大司馬彭幸菴過淮陰祠韻

功名酣處易生疑大將新增築禍基徒悵冥鴻高  
颺日可憐走狗就烹時草腥長樂鳴妖雉月暗淮  
陰怨逆豨頗訝步庭當日事仰天私語是誰知

蒲泉



葛陽性通靈泉水號清泚延年與樂饑均爲隱者  
喜金色映容顏玉韻雜宮徵飽供韓終餐淨洗許  
由耳悠悠千載間偶爾得知已睨彼名利徒何殊  
附羶蟻

題滕王閣圖

千尺長松百尺樓棟雲簾雨照清秋山前鷺影雲  
俱落檻外天光水共流隔岸漁舟開野景塞衢冠  
蓋擁諸侯文章盡說三王好一片韓碑映斗牛

題便面小景

長日深山坐小年松陰竹影洞中天世間縱有風

和雨那得閒愁到耳邊

賀宣城伯衛公六十

圭組相傳世澤新堂堂勳業照麒麟臨軒授鉞頻  
承寵橫梁吟詩捷有神六表正當全盛日千鐘偏  
稱未衰身公餘更羨心如水平不雜歌聲與舞塵

東雲

英英一朶伴朝暉影掛扶桑鶴未歸秋水虛明初  
擘絮春風淡蕩不成衣長疑青帝開簾幙每與幽  
人護釣磯只恐從龍行雨去故山清夢亦應稀

西蘆



水西叢葦隱君家門倚西風散雪花幾度夜深看  
鴈集一鈎殘月映寒沙

送顧龍海春試

龍樓春曉御香飄獻策彤墀總俊髦此日臚傳誰  
第一宋家兄弟有祁郊

雨中哭子儼

幾度長吟復短吁食牛汗血總成虛招魂夜拂新  
封土閣淚時翻舊讀書天地有愁誰似我海門無  
色月沉珠兒今何地爲才鬼却恠秋來入夢踈

贈浦小痴

莫道生來性不靈耻將巧慧役心兵虎頭三絕君  
今幾晉帖唐詩總擅名

挽謝楓林先生

每因霜檜想華標此夜風雷忽已凋二匝繞枝烏  
血盡百年浮景燭光消床頭舊誥春常在江上孤  
舟夢恐遙回首楓林雲影黑楚歌聲斷不成招

送顧侍御北上

玉署文章獨老蒼囊封猶染墨花香風雲氣暖春  
偏早松菊盟寒徑未荒書卷本宜閒裏著詩篇多  
向別時忙故人亦有游仙夢欲附鵬翰萬里翔



尋仙卷爲陳相士作

尋仙道人江海彥三島十洲渾走徧歸來自覺術  
有神隔牖能將色絲辨酒酣耳熱逞談鋒對人信  
口分猪龍雙瞳烟烟敵秋月世間安用窺青銅

登大伾山

肩輿衝曉作山遊黃葉迎風面面秋過眼飛雲應  
我笑隔林啼鳥向人留石堦竹迸苔痕破玉井龍  
歸雨氣收謾檢禹書尋往迹茫茫何處是江流

贈星士周野航

小艇年年破浪飛秋風銀漢夢依稀主人元是乘

槎客載得機邊一石歸

度梅嶺

誰云度嶺卽炎方十月山橋滿屐霜蕉躡故衣羞  
戀綠菊留殘朵欲飛黃鷓鴣有意憐行客茅屋無  
烟鎖夕陽此日觀風增感慨馬蹄隨處有荒涼

慰石郡伯喪子

天上游龍不受羈世間英物數偏奇暮鴉行處窓  
猶濕曉蝶飛來夢欲迷香冷砌蘭霜朵脆影踈庭  
桂月痕歎無端最是銷魂處細雨危闌獨倚時

讀元史誅鉄木迭兒事



公論誰將付等閒主張猶在是非間玉津佗胄雖  
函首珠海胡銓未賜環投鼠何人知漢策效鷄有  
客過秦關偶從往事窺天道管豹無由見一班

省署同僚邀登城南諸山次韻

路入烟蘿迥山迴谷勢偏松深雲護鶴石秀玉生  
蓮長笑驚天近奇觀愛瀑懸隔林聞犬吠疑隱又  
疑仙

芥

雨過春畦菜甲榮芥臺嫩茁紫檀莖齋厨添得新  
風味頓覺人間肉食輕

送江臬林憲長陞河南方伯

清波綠樹曉烟輕錦纜牙檣畫裏行雨過徐亭餘  
惠澤風來梁苑動歡聲紫垣光彩瞻星座碧漢孤  
高仰月卿只恐九重思賈傅汴河堤畔卽雲程

白蓮

上苑新開碧玉池千層翠蓋覆清漪錦雲朵朵含  
香露疑是西施浴罷時

送劉中丞征嶺東

緩帶輕裘意自閑指麾白羽笑談間五兵妙選霜  
飛畫萬騎長驅卯壓山掌上風雲諸葛陣眼中勲



唐詩卷之一  
業狄青關歸來好刻磨崖頌劍血淋漓字恐殷

壽儼山先生

補天餘剩萬瓊瑰粧點烟雲費剪裁莫訝太湖新  
鑿出應從天竺舊飛來玉舒仙掌當窓倚金削芙蓉  
傍浦開巖畔况多千歲藥何須泛海覓蓬萊

西林

高樹疎陰送晚暉桑榆路近鶴先歸披襟偏愛秋  
風爽碧葉滿山雲亂飛

和王僉憲潯陽道中之作

驅車朝復暮古道正斜陽遠岫烟凝紫平疇麥染

黃征鴻飛有伴候吏立成行昨夜招提夢依稀入  
未央

書南康山中公館

山館題詩已十年重來風景更凄然黃蒿滿地秋  
無主白水迷村冷浸烟烽火四郊頻送警江湖一  
念獨相牽翻思獻納當時曠策馬斜曛媿負暄  
使還迂瑾謫判深州

此日遷居易狂談忤趙高猶堪抄藥案不用註離  
騷 聖王明如舜權閹豎似孫智囊還自戮天網  
詎容逃



送師真外陞江西僉憲

青瑣追隨記昔年紅雲近捧御床前江湖舊跡  
憐萍散省署新銜喜壁聯許國久懷經世略觀風  
應有感時篇明朝相憶登樓望烟樹微茫接楚天  
送張侍御使節還朝

攬轡江南此日還薊雲燕樹望中山恩波浩渺西  
湖外風采飛揚北斗間仙仗曉趨霜氣肅囊封時  
檢墨花班欲憑餘興盟詩酒國論關心恐未閒

市隱

滿城車馬任追攀靜臥心閒夢亦閒門外紅塵三

十丈垂簾如隔萬重山

石津

白玉灘邊藥圃開渡喧時見客船來杏花繞岸紅  
千樹盡是仙翁手自栽

溪隱

青草扁舟偶繫情溪翁久已作同盟釣絲小試垂  
綸手酒盞深埋玩世名浪裏龍門慚舊夢雨餘蛙  
鼓戀新聲年來機事渾忘盡為報沙鷗且莫驚

送馬明府之京

萬里天風送羽翰九重宮闕五雲端瑣闥新命頒



綸綽練水餘芳蘂蕙蘭經濟文章金薤重廉明聲  
價玉壺寒從來賢輔多循令漢簡唐編取次看

夢歸

十載江門睡正牢偶沾塵土落蓬蒿勘經評史權  
非小品草題花與亦豪躁出已慙猿鶴怨夢歸無  
奈水雲遙天涯高士須珍重莫放書聲出樹梢

對長垣公署新竹

栢府清虛竹迸芽春風先到此君家錦棚未脫嫌  
霜重玉版初叅怯霧遮大嚼謾吟蘇氏鶴類來莫  
笑子猷車明年看取凌雲節百尺珊瑚映碧紗

途中卽事

十載長安夢始醒武城弦誦沸新聲文章謾入宗  
工眼案牘何辭俗吏名楊柳着霜金縷脆木綿烘  
日粉雲輕故園謾有心如火未了平生報國情

對鏡見白髭

拭拂菱花照病姿曉霜何事犯吟髭祗緣色養關  
幽思不爲宜搜覓好詞閑笑素絲偏易染靜憐白  
壁自難緇弄人伎倆從今悟明日扁舟已是遲

喜雨

夢回午枕篆烟清蕭颯庭槐忽有聲淺沼添波新



綠漲殘葵落朶小紅輕鵲衣披濕投林急電幟搖  
光奪眼明樂甚自將盃斝洗安排詩酒迓西成

月湖

萬頃玻璃一鏡浮玉蟾分影印寒流清輝寂寂魚  
龍夜白露瀼瀼萋萋秋風送笛聲漁艇外鴈驚人  
語蓼灘頭踈狂賀老偏多興欲買扁舟釣共遊

舟次邳州

柳色槐陰潑眼濃濁流千里捲長風奔馳烈火疲  
漕卒泛逐浮萍笑宦蹤山勢迎人蹲虎豹月鈞入  
水泣蛟龍小臣欲效華封祝先草河清頌一通

竹亭

懶將俗事擾幽懷遶屋琅玕手自栽碎影點窓秋  
月滿清聲入座午風來門深唯許王猷造徑僻曾  
看蔣詡開轉眼碧梢抽紫實傍雲須築鳳凰臺

送朱純齋應召

萬里風雲朝發初九峰天朗月光虛烟花色照鳴  
琴室冰雪聲騰薦鴉書鳧跡已登雙鳳闕鶴班正  
傍六龍車論思獻納男兒事莫惜批鱗與引裾

拜文山先生祠

灑淚登壇一劍雄義旗雲合仗孤忠歷探虎穴身



忘死共汎鯨波計已窮萬里遊魂燕月冷二龍歸  
海宋曷終狀元宰相公無忝要表先朝養士功

龍江集卷之一



龍江集卷之二

序

遺槐先生詩集序

遺槐先生談公之卒也錦嘗撰述事狀表著其賢  
唯詩文之傳慨未有屬今其從子鄉進士君承儒  
蒐摭詩稿躬自編校將刻梓以傳乃函帙請序錦  
躍然喜慰亟受而誦之終篇復悽然以悲曰嗟乎  
公詩之存顧止此哉公天資英邁自少篤慕古文  
激昂奮迅必欲深造韓蘇堂室弱冠遊黌臺試恒

雲間 唐錦 士綱





居首選成化庚子鄉薦爲春秋魁辛丑試南宮及  
賜對大廷皆列高等一時文名歛起出其緒餘  
播諸篇什每對客揮毫運肘若飛古人斗酒百篇  
不是過也憲部素號劇曹公翱翔其間十有五載  
雖案牘盈前而哦咏不輟及陟東臬往來齊魯之  
墟或感時撫事或吊古登高凡興況所寄咸於是  
焉發之唯其襟韻爽朗氣岸壁立卓然有千仞覽  
輝之象故其命意措辭不犯塵俗不蹈襲前人陳  
迹新奇警拔成一家言於是詩名亦起與文名並  
馳而爭先矣錦嘗謂公之人品宜傳政事宜傳詩

與文宜傳以今考之事實所錄誌銘所載雖未能  
盡公之所蘊所施而涉於人品政事者頗亦傳其  
槩矣文之所傳唯試錄所載程試之文耳其所謂  
深造韓蘇堂室者無復存焉詩稿僅存而奇篇警  
句世所膾炙而傳誦者多不在帙中則其流落散  
逸者豈但十之一二已哉雖然古人有一篇一句  
遂以名當時傳後世者則斯稿也亦足以觀矣况  
公之所恃以有傳者又不專於是焉則詩之亡與  
不亡曷足爲公軒輊耶進士君慎修刻厲以承家  
學而斯文之傳於是乎在公其可以少瞑矣公諱



詔字朝宣遺槐其所自號累官至山東按察副使云

玉洲先生文集序

聖代文運不隆前輩卓然諸名家皆渾厚博大有西京之風焉後之好奇者頗事刻削往往詆訾班馬非薄韓歐而病其不古遐希遠慕必欲爲峒嶮之碑岐陽之鼓然其流弊時或涉於僻塞艱蹇讀之聱牙棘舌曼乎難入苟以掩護膚譎而雅道盡矣前提舉玉洲先生生當文運極隆之時而天才學力兩臻其盛故發之於文根柢深長波瀾浩蕩

豐潤典縟渾然無刻削之迹詩篇肆筆沛然頃刻數十百言若不經意然精麗淵暢有味外之味他人旬鍛月鍊或不及也儷語樂府妙出天成非積習可致豈非一時文壇之豪也哉匹之前輩諸名家夫誰曰不可雖然先生可重者獨文焉已乎蓋其胸中抑有含章內奧而深於道焉者矣講學談性蚤負盛名門下游從甚衆當時士林屬望甚至乃徘徊庠校十薦不偶晚以鄉貢拜官惜士者歎焉夫以先生之望必進而論思獻納作誥陳謨然後爲稱今一不獲展而區區名第亦不獲與流輩



伍在常情能無憤慍不平之歎哉而先生心安意舒詞氣冲融若不知世之有晦明得喪也自非含章內奧而深於道焉者其能然耶竊嘗論之先生身沒而言立雖當時不遇而遇於後世者厥有攸在此天所以厚先生也彼以功名不遇爲先生惜者豈惟不知先生且不知天矣先生應酬請購恒對客揮毫單詞落紙人輒珍持以去稿多不存今其季子太學君蟾網羅散逸得十之五卽手錄成帙刻梓傳焉夫先世有善而弗知不明知而弗傳不仁若太學君謂之仁且明非耶先生姓朱氏諱

曜字叔暘旣謝提舉事會仲子侍御君豹當推封於是封如子官集名玉洲因其號也

贈都憲劉公巡撫延綏序

國家於控邊諸鎮不獨折衝禦侮覲勤介冑而秉旄鉞專節制必總之憲臣焉所以律游惰平政決籌爲不可勝以俟虜之可勝焉耳職以撫稱固鎮之也戊辰秋九月延綏缺撫臣天子進方伯劉公爲中丞俾持節徃殿之再逾月璽書卽藩署申諭焉公謂延綏重鎮巡撫重寄也不可以緩卽日整裝就道時以使事寓廣者多中外貴近臣於



其行歆且艷之然又惜夫別之遽也乃相與朋殺  
盍樽追而餞之江之滸酒半有舉爵而告者曰憲  
臣難諫臣又難也蓋所負者天下之得失萬世之  
公議而士之責而望之者極嚴且備焉公曩居諫  
垣嘉謨讜論傳誦朝野而彈壓舉刺往往貴倖膽  
落既無難於諫臣矣顧難於憲臣耶是行也直舉  
而措之耳敢以是爲壽有舉爵而告者曰撫臣難  
藩臣又難也蓋撫之義唯以輯綏而藩宣云者所  
以迂休延澤而致之民焉公嘗藩于閩藩于廣矣  
班條植惠藹播風績雖區分埜畫有江山千里之

隔而民之所以酣薰鼓躍於化育中者均之風偃  
而景從也既無難於藩臣矣顧無難於撫臣耶是  
行也直舉而措之耳敢以是爲壽錦聞之竊有感  
焉乃揖而進曰楚固失矣齊亦未爲得也夫出奇  
決勝運風雷於呼吸斬將搃旗鼓鋒刃於笑談果  
專事於撫綏耶結以恩則吮血而裹瘡誘以義則  
投醪而挾纊果專事於刺舉耶會而通之張弛不  
倚宣威申紀出其所以爲諫臣者爲之撫摩疾苦  
出其所以爲藩臣者爲之而又進焉深謀蓄銳無  
規近功禮樂詩書作其忠義則人心之固金湯失



險戎狄雖獷悍當有革其鳥獸之心欵塞而歸重  
譯而至者矣何俟於戰又何求於勝乎請以是爲  
壽何如公憮然曰子誠愛我益我矣若夫繁章縟  
語徒以申繾綣而志情私者吾未暇悉也子之言  
良是請書之吾將執此以往遂相視一笑而別

中丞彭公遺愛詩序

南畿自建巡撫以來唯文襄周公有大造於吾民  
其所創置施設無不出人意表可爲永則嗣響寂  
寥爲時已久近得坦洞彭公論者謂有文襄之風  
焉旣而屢疏請休 上以南畿重地公重臣未之

許也久之始允其請於是南畿十有三郡咸慨嘆  
咨嗟若失慈母相與鳴諸詩歌以洩其憂憤之私  
上海令郭君經彙次成卷題曰甘棠遺愛將寓之  
於公且疑公嘗遭謗議或有不釋然者謂錦且有  
以解之言已泣數行下錦亦爲悵然者累日噫盛  
德感人如此夫豈聲音笑貌所能致耶情感于中  
而聲發于外譬之春蚓秋蛩氣機所觸蓋有不能  
自己者耳然出處之際君子亦唯求合於道而已  
豈以人言爲重輕耶夫公文襄之流也請卽文襄  
論之文襄峻德偉功冠冕一時而遭謗取議蓋亦



不少臺諫譏評往往及之然公論終自不泯至今  
歌誦功德者日盛而月新朝廷爲之建祠秩祀追  
旌其功向之謗議安在哉今公以宏才淵識爲福  
於東南之日久紛然臨之而不驚卒然投之而有  
待南畿士民仰之爲和風甘雨莫不延頸望其潤  
澤及聞其去相與嘯歌吟詠以致其思則公論豈  
待後世而始定哉且舉二千里之廣聯數十城之  
衆民之平曲直者之焉吏之辨利害者之焉兵之  
受籌畫者之焉公亦不勝其煩且勞矣故欲謝而  
去之疏屢上而卒遂其志不啻遠途之旅釋重負

以就偃息何有於不釋然者乎况功成身退天之  
道也彼鑠金銷骨自古則然安足較哉吾見公有  
可樂不見其可憂也將何解焉郭君憮然曰如子  
言公誠無俟於解矣然恐天下之士或有同予疑  
者請書此解之

### 海珠贈別詩序

正德己巳秋八月旣望司諫楊君子山服闋將還  
朝張宴海珠告行於常所來往酒酣咸賦詩爲  
贈凡所以惜睽離而侈遭逢者亦旣備矣至於職  
業之重又諸君子言外未盡之意也錦因推之以



告曰君諫職也請以諫論折檻引裾世之所謂敢諫者矣然而諫之體不在是也夫以天下之政萃于一官而使之計其得失利病焉固非敢諫者莫宜居使或不達大體而冥然為杖撻之瞽雖日曉曉將安用之耶世固有何人一行之失片言之誤而陰鉤巧摘以為直者是告訐之徒也諫之體褻矣吐剛茹柔賢佞易位覲以邀虛聲而媒寵榮者是龍斷之徒也諫之體濫矣濫且褻果何取於諫也哉子山之鄉人曰余武溪靖者吾嘗讀其傳而愛之靖為慶曆諫官軍國大計史不絕書而西夏

一議尤偉當元昊之納誓請和也契丹撓之百方且威以兵朝野駭震莫敢發一籌靖獨謂連兵構怨契丹所幸爭之甚力卒屈虜議發夏冊西師解嚴而北邊亦以無事較彼告訐龍斷之徒竟孰為得耶而世之沾沾小夫不覩其大偶見狂呼而妄號者輒爭相譁詡以為曠世之奇殊不知徒以發識者一嘔而已子山自登第為大行才望已聞于人既而簡知 聖王擢置諫垣感激奮勵遇事輒極論無所諱雖古之敢諫者殆無以過然必志其大不泥乎其細先其急不役役乎其緩則諫體不



唐書卷之三  
濫不褻而鄉哲往躅一舉武而踵之無難矣異時  
嶺南二諫輝映汗青豈直鄉邦之光已耶錦與子  
山忝同官有兄弟之誼於其行不能無言然又不  
敢爲謾衍無益之言也故因頌而申之以規

蠖菴疏稿序

都諫蠖菴屈公奏疏存稿凡四十有八篇其子鴻  
臚君邸集爲上下二卷刻而傳之錦獲徧觀焉乃  
起而歎曰盛哉斯文之有遭也謂之千載一時非  
耶夫立言之家或羽翼經傳或頌述勲德或藻論  
古今皆所以極文之用也然尤以施諸朝廷而達

之天下爲至若掌制代言若獻替封駁動主聽而  
感人心所謂經世濟時者於是乎在彼有墮於空  
言而罔所注措夫豈文之罪哉所遭非其時也徵  
之前代治安一疏天人三策談文者莫尚焉而無  
遭於時言卒弗售卽是較之文而無時與無文等  
耳唯公宏才絕識而濟之以精博淵邃之學故其  
敷宣奏對之文莊潔明剴有古遺直之風矧遭清  
明極治之朝 敬皇聖德同天虛已盡下公風雲  
攸會精神孚契翱翔諫垣者十有五載披瀝忠赤  
知無不言臯囊朝夕輒報可見者歆誦傳者紙



貴海內之士莫不想望風采而沾濡膏潤所謂施諸朝廷而達之天下者皆已鑿著勲緒蓋賈誼仲舒望之終身而不可得者也謂非遭時之盛致然耶則斯刻也所以昭 敬皇聖德於無窮非但傳公之文而已錦昔待罪諫職實踵公後餘芬遺烈尤所飫聞執鞭之想恒注于懷茲獲執筆序公之文顧不慰且幸歟公諱伸字引之士林稱爲蠖菴先生其官階宦績備載傳芳錄可互考云

文裕公續集序

近代文章家非周秦不談非西京不談然騁宏博

者唯叢靡是務而精狃醇駁無所決擇往往蛟螭混處而雅鄭之互鳴也慕古奧者則刻削鍛鍊務極艱澁語棘喉滯吻若梵喙然殆不可句而大雅之風泯盡矣周秦西京固若是乎哉文裕公儼山先生崛起東海之濱天才學力超邁卓絕駿發精英其光燄燁燁迫人宏博而不繁古奧而不晦周之典雅秦之雄暢西京之豐蔚精密蓋無乎不備也縱橫運化名一家言所謂黼藻化工芬馥宇宙浩然獨立乎萬物之表者非先生其疇當之平生撰著自講筵史局郊廟臺省以及山川林館之品



題祠墓金石之鐫刻與經史之折衷古今典章之  
辨議家傳人誦殆徧寰區片楮隻簡爲世至寶可  
謂極文章之盛矣矧先生經綸匡贊之業雖宣發  
未究而河嶽默運之功良不可誣則夫先生之所  
以傳世垂範者豈唯文哉先生旣歛神觀化其子  
太學生楫字思豫發所藏藁類而成編凡爲集百  
卷外集四十卷咸登諸文梓壽其傳矣茲復訪蒐  
散佚隨遇劄錄編爲續集十卷刻附集後以傳鳴  
呼自古文章大家傳世之作未有若是其富也有  
之未必若是其精且醇也思豫皇皇乎赤水玄珠

之求爲不孤矣况其英敏博洽克光家學所以竟  
先生未究之業者其在斯歟若先生之爵里名氏  
夫人皆知之茲不敢贅

大老編序

弘治丙辰科進士同年三百人迄今嘉靖丙午蓋  
五十有一載矣晨星寥落存者無幾屈指計之其  
間聲問相聞灼知其無恙者山東則僉憲鈍菴姜  
公大叅立夫楊公河南則宮保尚書大學士南塢  
賈公少保兼傅尚書大學士松臯許公浙江則憲  
副守清韓公兵部侍郎南川陶公吉安知府君佐



朱公廣東則兵部侍郎鐵橋黃公江右則刑部侍郎咸栗劉公大理卿壽甫董公湖廣則兵部侍郎高吾陳公太僕卿介福楊公提學憲副崇實沈公廣西則工部侍郎竹塘蔣公四川則大叅衡仲劉公北畿則副都御史惟中王公南畿則吏部尚書玉峰朱公布政使孔時林公少叅一齋高公交州知府子文羅公饒州知府良貴葉公工部尚書南坦劉公暨小子錦凡二十有二人焉其遐方僻壤遠莫可知縱或有之其亦寡矣論者謂是科得人爲盛功業氣節道德文學赫然震耀一世者林立

而羣起蓋不啻三之二也自今觀之奄忽凋謝存者僅僅若此則夫遐齡永算豈非造物之所甚靳者哉維茲二十有三人者或逾七望八或逾八望九守清南塢二公皆逾九十而鈍菴公則九十有四駸駸百歲登躋上壽古之所謂人瑞者寧非斯人歟山東撫臣中丞端公分守大叅韓公濱州守臣前侍御黃公咸謂鈍菴公宰邑循良秉憲貞肅才猷風節爲時名臣及謝政居鄉卓然以厚德碩望師表一方雅稱 明詔優崇之意於是舉行如令復大書表揭門閭尊爲大老鄉之縉紳大夫靡



不聳瞻樂道相與咏歌讚頌用紀奇遭公亦隨事  
有作以寓感恩嗇報之誠公之季子漢恐其父且  
散逸彙萃成帙將勒爲一家之史以傳示子孫嗇  
不朽焉頃膺才選來佐海邑謂予父執也出以徵  
序予受而諷之長篇雅什金鳴玉應颯颯乎皆治  
世之音而致和之所宜也可謂盛矣竊嘗聞之上  
古之世聖皇繼作至治薰蒸太和凝會歛福敷錫  
俗多仁壽自周之衰道散化微澆漓淺促無足論  
已惟我 皇明聖聖相承至德弘化重熙累洽挽  
回三五之盛貞元會合太和鍾萃固有當一時之  
盛膺五福之全豐功純德安享悠遐若我鈍菴公  
者是已則斯帙也所以昭神皇之功化標聖世之  
瑞禎豈直爲一家之史徒以傳示子孫而已哉况  
佐邑君愛親而嗇其不朽可謂知所重矣是以樂  
爲書之

滄浪權歌敘

國初時吾松有二寓公焉曰維禎楊氏曰宗儀陶  
氏二公皆勝國遺老挾所有而無所於試遂混迹  
村翁野老與之相應和於殘山剩水之間雖其業  
之所擅各有所長而潤身華國胥有取焉譬之粵



珠蜀錦爲用不同均爲世之寶也錦不佞於二公  
無能爲役然以鄉學也竊嘗究心焉楊公繁章爽  
律徃徃鏤天心鑿月脇有驚神泣鬼之奇陶固難  
與爭鋒而陶公搜抉之富裁訂之精楊殆不容不  
屈服也求之前代楊之才可當杜牧陶之學其洪  
景盧之流亞歟錦爲童子時於楊集中見有所謂  
答陶隱君詩者意陶公必能賦之士也而世無傳  
焉恒以爲恨頃迺得其手編滄浪櫂歌一卷不覺  
喜躍亟讀之灑乎清風之飄颻也溶溶乎春日載  
陽而水澌之渙泮也於戲公以黍離麥秀之餘而

有駿發蹈厲之氣撫羈窮淪落之景而無危苦憤  
激之詞是亦足以見其所存矣詩於公雖非顓門  
而世以顓門稱者亦豈遽能窺其堂室哉後生晚  
學瞻望山斗者何限而茲藁伏匿草萊中百餘年  
未之有遭豈文之顯晦果有數存其間耶抑造物  
者秘靳不欲輕其洩也迺於公暇漫爲詮藻繕而  
藏之以備吾松文獻之一云



龍江集卷之二

龍江集卷之二

七



國家圖書館, NATIONAL CENTRAL LIBRARY, TAIWAN, R.O.C.





龍江集卷之三

序

賀憲使復菴先生任公榮擢序

東南瀕海州邑雖稍資魚鹽之潤而廣洋巨浸妖孽穴焉跳突侵噬亦時時有之故昔時防禦之法軍衛營堡叅錯布列其為備甚悉然歲久法玩譏邏者不復誰何蛟虺之出沒自如也正德間始益以飭兵憲臣以太倉地當要衝建牙駐節所以彈壓控制訓練振揚異收保障之功職甚專任至重

雲間 唐錦 士綱





也邇來閩浙狡悍之徒多泛海通番因而爲盜往往糾集倭奴與之蛇蟠蚓結徧滿島嶼始掠傍近尋肆流劫乃歲之暮春聯艘接榜窺我東洋紛紜絡繹倏去而忽來焚屠搜劫極其慘酷士女駭竄飛走無路哀號之聲所不忍聞千里之內爲之騷然時我復菴先生任公方副守吳郡以文武全材聳經濟鉅望撫按操巡諸公會檄推委特寄師旅期於必克先生卽日就道仗鉞枕戈毅然以靖寇保民自任唯其勇而善謀謀而善斷况以忠義將之故屢與賊遇而屢戰屢勝戰上海戰大倉戰嘉

定士卒用命氣勢百倍斬逆釋降有古良將風僉謂公起家進士而赫著武功豈非天下奇丈夫之所爲乎良非守文局藝之士所能及也於是諸公復交章舉薦上其首功 聖天子嘉異之進陟按察僉事錫之 璽書仍俾整飭防海之兵以益展經濟之略 命下瀕海士民咸欣躍抃舞相與焚香膜拜翹望節旄前臺憲一松袁君適攝海令歆仰先生功烈之盛遭際之隆命錦致詞爲賀錦竊聞之文事武備先聖所欽今觀先生治郡之績惇俗阜民撫綏懇惻民心悅而歸之不啻赤子之趨



慈母也討賊之任謀出萬全所向克捷民又悅而歸之不啻亢旱之得甘霖也隨事效績左右咸宜謂之文武全材詎不信哉傳曰天視自我民視天聽自我民聽民心所在天心之所在也天既賦先生以全才固將陰相默佑而以全功畀之異時進登巖廊或統六師或統百官彌綸匡贊以益收文武之全功寧不自今日為之權輿乎詩曰經營四方告成于王請為先生今日之頌又曰文武吉甫萬邦為憲請預為先生將來之頌

贈郡伯兩城靳先生之任吉安序

江右為海內雄藩吉又江藩之雄郡也環地二千里統轄九邑地大而物衆繁訟積逋不易疏理蓄奸叢蠹莫測端倪相傳以為難治故窞其地者往往逆以難治治之設機防施鉅穿深詆峻繩無所不至民乃眴眴疾視而彈射構扇亦無所不至焉自旁觀之謂之難治不其然哉然考諸圖志有曰藝文儒術斯之為盛此班孟堅之言也曰家有詩書人多儒雅曰序塾相望弦誦相聞楊炎正王陶諸君之言也審如所言則易治者莫吉民若也而蒙難治之名何歟豈世殊時異澆偽日滋習俗一



變遂風靡波蕩而不可挽回耶不然圖志所列殆  
或誣也錦徃歲奉 璽書視學嘗徧歷其境省風  
觀俗頗得其梗槩焉士大夫好矜持名節耻爲詭  
隨其尤賢者能主張公道以屈羣論細民雖健訟  
喜攻訐特負氣不相下耳然好名而慕義臨政者  
果能裁之以理而處得其情靡不帖然悅服雖嘗  
受榜笞蒙黜罰者亦不敢以私憾而有異言以錦  
所見但知其易不見其所謂難也夫守以威刑劫  
之而民以悍厲應之在齊魯之俗皆然豈獨吉之  
民哉則其所謂難者未可專諉咎於民也嘉靖乙

巳冬吉守缺員銓曹以其地之劇且難也爲擇異  
常之才得我兩城先生靳公焉公蚤負雄傑之才  
卓絕之識而濟以該洽之學弱冠舉鄉薦第一連  
擢甲科砥礪激昂蔚有公輔之望况操履堅貞志  
節高古兩佐名郡咸赫著聲績潤枯振墜摘發若  
神奸豪屏息幽隱發舒前後部使者文章論薦僉  
謂異常之才宜膺異常之擢於是太宰知而薦之  
聖天子聞而允之拔諸賓佐之列寄以雄劇之  
郡盖褒其前勞而侈其後績也公此行將延訪疾  
苦而施之砭劑但舉昔之所施於兩郡者而施之



吉焉所謂駕輕車就熟路吉之民有不飲惠而蒙  
澤者哉殆見青原白鷺之間無非感恩佩德之人  
歡呼而蹈舞者觸處成羣歌頌之聲洋洋乎達於  
四境矣矧郡多名宦史策所載班班可考前代姑  
未暇論我朝洪武間有朱守仲智焉永樂中蘭  
守芳焉流風餘烈至今耿耿如新凡追論賢守必  
曰朱蘭云公承宣之暇試訪其遺跡而講求其所  
以得民之深感民之久者當不異公之所施也則  
夫洗難治之誣而收易治之效者不屬之公而屬  
之誰哉將來方岳之陟台輔之召得非今日之擢

臥龍文集序

爲之階乎上海令望川孫侯感公知愛命錦贈言  
以貺行色夫贈之爲言增也顧錦之鄙陋何足以  
增公耶謹述所聞所見以告於吉之人俾知公乃  
朱蘭之匹而非近世之所謂守也

三代以還人品歸臥龍公豈二千載宇宙間才能  
知略寂無其人耶何史策班班莫之有嗣也公生  
遭漢季炎精燼矣激先主隆中之托忘其孤危憤  
然起而欲噓之亦艱乎爲力哉使公計強弱弗恤  
名義移所志於曹於孫功不唾手就邪於乎漢賊



不兩立此公所以對天地而質鬼神者也驅馳困頓致力於不可復燃之死灰累蹶累進斃而後已君子於此有以亮公之心矣而壽史顧以短應變相誣訾焉是將誰欺乎觀其泣廖立死李巖屈司馬懿夫豈聲音笑貌所能也故雖中道云殂志若未究然扶皇極翼世教萬古綱常之功則大矣可以赤帝子一世之業而疑公之功邪論者謂出師二表意氣明信與伊訓說命相表裏固非諛也頃有傳其臥龍集者咀味詞旨頗若不類而世方歆公風烈爭以一覩爲快憲副賀先生廷器慕古耽賢於公尤所傾嚮得茲集欣然手校而梓行之曰將以慰夫歆公者之心也噫推是心也殆欲起臥龍與之周旋唯諾以薰沾其膏馥而契會夫名義之重匪直傾嚮焉已也其所謂慕古以實不以名者乎慶快之餘漫書如是

重刊褚氏遺書序

於戲載籍之顯晦殆亦有數耶其非數耶觀褚澄之爲是書鏡之貞珉與之偕藏其志固將求知子雲於異世也迄黃巢時盜發其藏始爲蕭廣者所得乃以之殉葬是旣顯而復晦矣靖康初盜以蕭



氏守之之勤也疑有厚藏日夕窺之蕭懼而啓石始爲釋義堪者所錄是旣晦而復顯矣然而未傳播也嘉泰間有劉繼先者始爲之鋟木尋遭兵燹十不能一二存焉是再顯而又復晦矣夫醫一藝耳而其書將亡而復存垂絕而復續顯而晦晦而顯綿延千百載若有神物相之者然謂非數耶而况聖賢載道之書耶然其論述幽眇往往抉摘造化之秘而察形望色精妙入神要之有可傳者在也不獨數也太守新安韓侯廷璋倅繼揚時得古本屢以詔諸養生家輒獲奇効甚加珍賞然尤以

流布未廣爲恨適深政有成遂手自讐正梓而行之以畢劉志云澄字彥遠河南陽翟人劉宋時駙馬都尉入南齊爲左民尚書至侍中領右軍將軍以永明元年卒女爲東昏后追贈金紫光祿大夫讀其書因論其世如此

左傳要語序

代作

左氏身爲國史博綜羣籍當時如鄭書晉志之類靡不縱覽不但曾史而已遂采摭簡策爲經作傳聖人筆削之旨於是乎有徵而可按矣或謂丘明親授經於仲尼或謂其得之曾子雖未敢以爲必



然要或有自而唐啖趙氏獨立異論謂非丘明何歟夫丘明之是耶非耶未足深辨然其書淵深博大沉懿雅麗寢寢乎上薄典誥而下軼秦漢卓然爲百代文史之桀黠者固不得而少訾也後學慕之者則曰善於禮攻之者則曰失之誣其間所載妖祥夢卜讖數之屬誠有類於誣者蓋舊史之失而獨以之罪左氏則寃矣第其決擇弗勇不無遺憾焉耳雖然二百四十二年諸侯會盟征伐燕享朝聘暨卿大夫往來詞命始卒先後燦若畫一俾百世而下有所稽據者誰之功耶此編題曰要語

蓋前輩鈞擷傳中菁英凡涉於所謂誣者皆從刊削可謂左氏之忠臣矣予家自曾大父方伯公以來世業是經於此編恒所誦法頗病其傳譌舛無以慰快覩者之願漫於政暇校而刻之君子之志於古者其必有取云

贈憲伯東江牟先生赴任序

東江先生牟公昨自夏官副郎歷佐州郡或曰公懷香握蘭翱翔省署旣崇高矣乃今輟曹務而親民事舍清華而就冗劇恐非公志所樂也公聞之笑曰豈有是哉省署職也州郡亦職也吾知盡吾



職焉耳內外異職豈吾之所知耶故雖佐州佐郡而未始鄙夷之詢察民隱稽覈簿書凡可以利民可以剔蠹者靡不銳志以求殫力以濟至於保護元氣如捍頭目而撫摩凋瘵不啻疾疢之切身仁惠之風藹如也是賢聲赫著薦剡屢騰天卿上公治理擢僉河南按察司事蓋古監司之職也或曰公不喜伺察不事深文視民如傷治多惠政乃今外德化而進刑名置撫綏而事搏擊恐亦非公志所樂也公聞之笑曰豈有是哉州郡政也監司亦政也吾知修吾政焉耳彼此異政豈吾之所知

耶夫州郡之政惠愛是先然非濟之以威刑則豪悍者無所示懲矣監司之政威刑是先然非濟之以惠愛則孱懦者無由自愬矣惠之威之兼施而竝用之斯吾之所以奉職所以修政也錦聞而嘆曰偉哉東江公之論也居內居外職若異矣而所以舉其職者則同居此居彼政若異矣而所以施諸政者則同是不可為奉職修政者所取法乎哉唯公具博大貞毅之德負雄奇英敏之才淵邃之學足以名世高朗之識夔絕寡儔而况閱歷諳練明習典章其於天下事瑩徹迎解蓋目中未嘗有



全牛也所謂運斤成風游刃而恢有餘地者矣將見梁魏之區耳目一新豺狼斂遁鸞鳳翩舉卓然稱爲一道之福星者非公其誰歟異時登進巖廊寅亮燮理直舉而措之云耳上海令望川孫侯荷公教愛自謂道合志同艷公此行命錦致詞爲贈夫贈之爲言增也益也若公者豈錦蕪陋之詞所能增益哉然贈行之作古則有之考之蒸民諸詩可覩已蒸民所詠詳於職業說者謂得贈言之體錦因竊附其義舉公之所以奉職修政者登之於簡用爲祖道之先聲云

賀八峰先生旌獎序

往歲海邑缺令太宰公謂邑壯難理矧當屢歉之餘爬搔調劑必資循良於是求諸甲科之英精選慎擇得我八峰先生遂請於上而命之一時士論翕然稱爲得人邑士夫之在朝者相與雀躍稱慶而邑中士民間之亦莫不喜色相告欣然有息肩之望焉先生金精玉粹表裏瑩徹不赫赫以求名不灼灼以徼功望而知其爲有道君子也下車之始卽以廉恕倡其僚屬以愷悌撫其士民除去一切苛撓而開誠布公與之相安相信視世之出



唐前漢書卷之三十一  
十  
圭角立聲威譏訶刻削務爲飾耀以自異者先生  
蓋深非之日講求惠養化導之方而究厥攸宜圖  
惟審處或至丙夜忘寐古人坐以待旦不是過也  
至於振舉廢弛屏剔奸蠹則嚴閑密察不遺餘力  
恒恐纖遺隙漏以貽民憂藹然有如保赤子之風  
焉第邑之賦役既極繁重而累歲積逋不下數十  
萬加之饑饉頻仍鄰寇竊發緩之則廢公急之則  
病民事有甚難而掣肘焉者先生隨宜經畫委曲  
支葺不動聲色而上下咸濟卒使田里無愁嘆之  
聲比屋安清明之政歌謠舞蹈觸處成羣律諸古

循良之治效夫何歉耶若夫啜糜飲水克勵清苦  
公燕之外不輕肉食特先生之餘事耳侍御蒙泉  
公省風南土藻鑑精絕嗟賞休風特加表厲匪直  
以勸一時任事者而已固將爲異時傳循良者之  
左券也縉紳士夫喜相謂曰名莫盛於獲上信下  
功莫盛於顯今垂後先生不求名而獲上信下有  
無窮之名焉不徼功而顯今垂後有不朽之功焉  
彼求赫赫之名者非至名也徼灼灼之功者非實  
功也烏可與先生同日而語耶抑又聞之漢時守  
令凡得表厲者卽超至公卿矧 聖明褒德旌廉



允所汲汲旦夕鋒車之徵台斗之擢孰非今日表  
厲之舉爲之兆耶遂相率登堂再拜捧觴致詞預  
爲先生賀焉

賀望川先生旌獎序

大明府望川先生孫公以明德出宰期月之間民  
之謳歌而蹈舞者徹于四境臺省之旌褒絡繹幾  
無虛月君子曰感化神速上下交孚此在古之循  
良鮮克兼焉而况求之當世得之目擊豈非卓異  
之尤者乎或以質于錦曰感孚之道自古爲難述  
觀子產鄭之賢大夫也吾夫子蓋亟稱之觀左傳

所載詞命號令咸鑿鑿精懿施之國中傳之四方  
莫不傾心竦聽仰爲法程子長作史記爲循吏立  
傳僅得五人焉可謂嚴矣而子產尤爲表表其政  
令宜朝施而夕化也然輿人之謗嗷嗷不已閱三  
載而始定今公政修期月之間而感化神速上下  
交孚豈子產之才智有弗逮歟何感孚遲速淺深  
之懸異也錦曰不然賢大夫之政寧有異耶顧其  
感孚之本則有不能不異者耳子產固大夫之賢  
者然未免涉春秋之風論議謨猷頗叅術數故國  
人始疑中駭久乃感悅此固霸道之恒也唯公施



設措注本諸天德發於誠信洞然明朗坦然夷易  
不銜新奇不爲矯亢無暴征無諛役於民力民財  
視之如傷節縮慎護不使一夫有向隅之泣竭志  
力以賑恤俾饑餓有所資藉漕卒橫索久爲邑病  
公嚴遏力排遂成永利譬之慶雲甘露凡有目者  
皆知其爲禎瑞孰得而疑孰得而駭之耶但見心  
酣神暢如得慈母如覩神明愛慕悅服愈久愈至  
閭閻安其令庠序化其教梗獷者革心刁訐者喪  
氣風行草偃壑趨響應孰非蒙化感德之至情乎  
斯所謂德之流行速於置郵而傳命也較諸參用

術數者感乎之遲速淺深寧不有間乎一時士論  
頗以錦言爲然旣而部使者紫崖楊公都憲路橋  
楊公監察御史貞菴李公行部至邑悉公治行謂  
公廉介之操足以勵時仁惠之政足以宜民明敏  
貞毅之才足以戢奸而集事懋著卓異之績宜舉  
旌揚之典於是聯檄郡邑俾具醴幣遣儒官齎致  
用申表勵邑僚仰古文侯琴室陳侯一齋王侯幕  
僚一林丁君感公覆露之恩覩茲盛舉抃躍倍常  
謂公名簡 聖心寵徵非久高步鸞坡翱翔鳳閣  
豈非旦夕間事耶因相率詣錦徵文爲賀顧錦之



鄙陋何足以知公然鴻休偉烈聞之見之頗爲真確謹掇所論答書之以復雖於鋪張藻繪有所未盡而據事直書幸無愧詞云

贈右山喻先生考績登朝序

大邑尊右山先生喻公以名進士令海三載旌書薦剡上徹九重屢矣茲當報績天曹先期移文當道如撫臺如巡察諸臺咸最公治績亟報允焉大巡徐公復申令曰海令英邁之資剛方之氣歷三載而督賦早完任繁難而庶事畢舉士民服其廉介里書畏其明威此本院之所深諒者也宜卽

舉送如例諸檄遄至公卽秣馬戒行邑之大夫士皆悵悵然不釋其去時村諺野頌觸處轟溢而所紀五最特爲詳覈聞者歡傳而樂誦焉於是顧御院東川諸公屬錦備錄其事以附子產輿誦之後其一曰登賦之最海邑賦重民竭逋竊滋之數積至數鉅億部使者督促峻甚公匪棘匪舒因其久近爲之緩急新賦則察其豐耗以爲後先仍嚴設科條防遏逋竊自是奸無所容而賦視他邑獨先登焉二曰庸役之最蓋役之重輕殊絕而產之高下懸異上乏鏡照之明下必有倒懸之戚公預訪



於平時泛咨於意外具得畸羸之實及期按籍僉  
注一一出自曾臆左右莫窺其際民翕然稱快無  
異詞焉二曰聽斷之最海俗險譎耽訟倚爲龍斷  
而弭筆之徒鼓扇其間徃徃鑿空以穿人而脅貨  
焉公洞識其故每兩造至前輒迎而決之悉中肯  
綮若無情若弭筆盡實憲典或加遠配由此羅織  
奪氣善良者始有所恃而無恐矣四曰振舉之最  
公搜剔奸蠹不遺餘力而修明法制無或少弛至  
於繕理廩黷及諸署舍皆闕政體克事堅久不爲  
浮飾民財民力兩無與焉五曰感格之最公以已

酉歲下車庚戌辛亥春惟元旱澗澮涸竭禾則盡  
槁民嗷嗷告急公却蓋徒跣躬率緇黃鄉老徧禱  
壇墀靡神不舉未幾風雷陡作大雨彌日田野欣  
欣向榮遂獲連稔良以昭格有素而豈一時祠禱  
所能致耶錦旣備錄如右竊復論之邑素號壯劇  
巨綱細目百緒千端而機宜變故紛若蝟毛言治  
者難之唯公精敏英逸擅八面應敵之才仁明廉  
恕備溥博淵泉之德故其時而出之無不迎刃破  
竹適當其可溯其致最本淵厥有攸在夫豈聲貌  
之所襲取者哉抑又聞之縣令考課有所謂四善



三最賢令治績有所謂三異三惠以公較擬誠有  
不容軒輊者矣公斯行也將書最于天官氏而獻  
之當宁瓊闌臺舉武卽至遂進而躋卿佐與聞  
國政孰不自今日之最始乎錦不佞敬持所錄偕  
諸公進之祖筵以頌以祝

龍江集卷之三



龍江集卷之四



雲間 唐錦 士綱



序

贈一松先生治海功成序

古之稱善政者必守法否則綱弛而紀縱政斯舛矣善用法者必原情否則忍固刻削法斯殘矣夫唯守法而不泥於法原情而不徇夫情然後為至自非具廉慎之實德存牧愛之實心擅敏達之實才未足以語此也若我司憲一松袁君固其人哉君天姿英茂抱負宏碩雅有名世之望予昔視學



江右始入境已聞而異之及按部校士面試所蘊其文學風節軒然有瞬息千里之勢予益嗟異因優擬而大期焉士林翕然稱允君尋登省闈高薦會試南宮聲望益隆隆起廟堂諸老競欲羅致門下予以賞鑒不繆頗亦自喜久之俯就銓試非其志也大家宰竒其才器首薦之擢南臺司憲君一洗沿習之弊風紀峻整時論躡焉顧以名高致忌左官吳郡然玉光劍氣終不容闕屢攝屬邑賢聲藉甚如霆震如飈馳矣茲歲海寇猖獗累犯東洋瀕海州邑咸被其毒而上海所遭尤酷焚劫屠戮

倏去忽來士女號泣奔竄巷陌相屬闐闐半爲煙燼斯時攝政殊艱其選撫按操巡諸公會檄推君輿情大愜君既視篆慨然以拯溺救焚爲念悍禦撫綏不遺餘力時軍需國賦悉由倉卒取辦矧城役方興工力浩劇君物而付之時而措之咸中肯綮雖探賾譏察之細未嘗時刻少忘於懷夜則秉燭治文書鉤較欺蠹恒至漏下數刻猶未已也凡班布條約聽讞訟詞一唯崇教化厚倫理藹然承平之風故一時間閭相保若病卉之遇陽春欣欣向榮殆忘其身處兵燹之餘矣頃以松郡官僚具



備君移文請辭印章當道謂君清簡之政甚宜於民馳檄留之至再君確然不可奪匹馬就道行李僅衣衾半束而已君子曰賢哉政本諸法法當夫情廉慎之德牧愛之心敏達之才於斯備矣所謂名世之望於是乎在然海民懷感再造之恩戀戀不釋雖赤子之慕慈母不啻也於是邑縉紳顧內翰小川輩相率造予徵言爲贈予謂君之宦轍所至異政殊績炳若丹青况口碑載道其何庸於論述爲哉竊念疇昔嘗大期君於庠校中迄今三十餘載矣士望久屬功業鼎來由茲而往進登樞要

當軸秉鈞茂展經綸勦勳彝鼎則夫所以丕顯名世之望而益副予之所期者行當大徵於將來矣予日望之

賀敕封顧母李孺人序

古人有言曰善不積不足以成名夫名非君子之所計也而善則不可不積也使計名而積善則其爲善也不亦鄙哉然積善餘慶著之於易作善降祥載之於書聖人固以之爲訓矣斯乃天道與善自然之徵孰得而禦之哉蘇子以爲如執契取物交手相付可謂得其理矣以吾東川顧先生暨其



賢配李孺人觀之寧不益有可徵者耶顧爲邑望  
舊矣至近代尤稱德門東川之高曾咸負高誼世  
以長厚爲鄉閭所傳誦至和凝聚久乃舒宣所謂  
慶與祥者至東川之祖草堂公而始徵焉草堂公  
德學竝懋早掇危科筮軻副軍擢守大郡廉明仁  
恕惠澤廣被所居民愛旣去見思卓然古循良也  
其冢器省軒公卽東川之尊考也續德敦義樸茂  
無華忘已利人施不責報所居之旁待之而舉火  
者甚衆人至于今懷之所謂慶與祥者至東川先  
生而再徵焉東川純德粹行媲美古人博學宏才

蔚爲時望處人廉讓忠信樂拯困厄焚券捐廩殆  
其餘事及自上庠登朝列職御院日近清光尤以  
器識爲廟堂諸元老所重李孺人翊贊東川克成  
厥美深得古賢女奉君子之義而孝親睦族閨闈  
則焉東川恒宦遊于外孺人宰制家政經畫調度  
悉出人意表內外約束肅如公庭訓飭諸子及諸  
女諸婦率以身範不但言詞規牖而已凡此皆足  
以衍慶而致祥也今伯子從禮以中書舍人典司  
綸綍清才妙器表表一時頃者 聖天子尊崇  
九廟置慶臣工中舍以朝臣七品例得封母于是



孺人獲膺封號鸞書鳳敕錫寵自天命服輝煌光  
生里閭內外姻黨莫不歆艷忭躍爭先稱慶予之  
季子贊暨凌生景賢皆孺人之子壻也謂孺人荷  
茲恩寵乃累世積善之徵而孺人培植不怠又有  
足以致之視彼無所積累倖然得之朝盈而夕涸  
者其可同日語哉宜有紀述以昭世德予曰二子  
所論是也譬諸為山焉必積土而後崇譬諸水焉  
必積流而成川其與善積而成名易書之餘慶降  
祥皆天道自然之徵宇宙間不易之定理也顧氏  
自草堂公而上積累之勤如此草堂公而下積累

之悠長又如此天道與善之機蓋勃然而方興向  
之始徵再徵者特其兆之初萌耳矧御院中舍仕  
路方亨將來名位益進益崇諸子從德從仁從義  
從孝從敬或飛英六館或擢秀校庠皆青雲偉器  
騰奮有期孺人由茲而往封誥疊頒進膺金紫施  
及雲仍衍續弗替則所謂餘慶降祥交手而相付  
者其有窮耶彼突起之山驟盈之水安足恃也予  
故推原所始縷述于篇匪獨為慶觴之佐且使世  
之慕善者益知所勸而又以備顧氏之家乘云

賀少府周侯獎勵序



國家財賦倚給於東南諸郡體重而政繁故於郡於邑皆專設理賦之官所以佐守令而濟其繁也然吾松土薄而賦尤重故理賦之官視他郡邑爲難矧邇來旱溢頻仍十室九匱竟歲所獲悉以輸公而猶有不足衣食所需皆不遑顧乃欲其輸必如期而數必如額不亦難哉故近歲理賦之官視往時又加難焉乃今得吾文泉周侯豈非卓然超前邁後者哉侯出延津望族少負穎邁之資奉其尊府典膳公庭訓甚謹且有得於元兄司封先生之所陶冶故其造詣日深與厥季鄉貢君並擅場

屋之譽君自庠序升太學六館推爲先登然遭數之奇再戰再北人以爲屈嘉靖辛丑銓試優等拜上海丞專理財賦上海邑鉅賦繁蓋銓司擇才而任之也當時論者或以是官爲難侯下車之始卽延訪父老求其所以難之故諸父老曰是官之所謂難者非獨土薄而賦重也亦非獨歲頻歉而民敝也嘗見前政有過剛者矣榜笞敲朴恣其殘虐腹剝刻削無所不至民之心怨而口詛者不可勝計巧訐陰中不免焉其柔者則漫無可否威信不立豪胥黠吏乘其間隙而把持劫制之僨事敗



名莫克自振若此者豈不謂之難哉侯曰不然吾之所謂難者非是之謂也書云無輕民事惟難又云圖厥政莫或不艱古人慎重厥職而不敢忽易如此吾安敢以爲易哉雖然思其難而圖其易固自有其道也父老瞠無以對但相顧內訟自媿知侯之淺耳然侯之臨政本之以誠信濟之以廉明而推之以仁恕寬嚴緩急各適其宜故期月之間賦以時集而民以德感賢能之聲徹于上下凡昔人之所謂難者侯不啻建瓴水而拉枯朽矣謂之超前邁後非耶巡江行臺廉知侯賢馳檄所司俾具醴幣致表勵焉仍署其考曰爲人純篤而佐政老成孝友素重於鄉評廉慎克享於士論諸父老聞之翕然稱爲實錄因相與謀曰表勵循良繫於有位紀述德政寄於有言茲在位者有表勵之檄矣顧德政之紀述寧非吾儕所當効誠者乎於是介庠友吳君文盛陳君仲曾踵門以請予稔知侯賢不敢辭也遂撫所聞見以復二君以慰諸父老而因以爲異時傳循良者之符券云

日新先生挽詩序

袁君良輔持憲東廣之明年事且竣矣而聞其尊



君目新先生之訃然未有代也乃茹哀銜痛以俟  
久之挾一冊過予泣而言曰疇昔之歲吾以稽儲  
西川之便哭母馮宜人於家今茲萍踪梗跡飄飄  
數千里乃哭吾父焉凡古之所謂附於身附於棺  
者吾已莫之致吾情焉矣夫唯所以不朽於先德  
者庶其可圖於是謁銘太史將扃之墓隧而縉紳  
先生又憫而著為哀挽之章所以論述遺烈而咏  
歌流風者不啻雲霞舒而日星麗也吾哀萃而寶  
藏之以繫吾愛慕之誠以寫吾哀慕之私而因以  
示訓于吾衰氏之後人然或者疑於禮之弗載吾

子其亦有說乎予告之曰嗚呼著明顯揚所以崇  
孝也君何惑焉夫君子之所病者徒文之爲而不  
用其情焉耳苟情至矣言必戚而哭必哀矣衰麻  
之數居處之別飲食之變饋之禮舉無戾矣於是  
文因情生雖老釋之繆妄孝子或屈意爲之君子  
猶哀其志而不之罪焉而况因文考德以爲不朽  
之地乎且嘗聞之兄弟之喪存乎書策乃知親喪  
則求情言意之表而記禮者固有所不能備也然  
則孝子之於親當安所不用其情耶蠅蚋咕嘍誠  
有所不忍矣而流風遺烈顧將委而棄之俾逐烟



澌而與之偕泯焉其能忍乎哉是故體不欲其朽也名亦不欲其朽也附於身附於棺者必誠必信所以致不朽於其體也鼎有銘墓有碑著之簡策有誄所以致不朽於其名也今君限於時制凡所以附於身附於棺者勢莫之有及矣而愛慤之誠哀慕之私終不能以無寓也於是托之文詞而論述焉而咏歌焉使吾親身亡而名存義闡而澤流此不朽之大也而又何泥於禮之載與否耶有疑而問焉者請以吾說告之君曰諾遂引筆墨其首

簡

送西峰黃先生擢教京府序

莆陽黃西峰先生典教海庠之三月銓曹諸公雅知其賢薦擢順天教授或曰西峰自正德庚午領薦鄉闈明年會試南宮列名乙榜歷教廣昌寧波暨鄖陽南康醴陵上海凡三郡三邑徊翔巽洋間三十餘載久以師道著聞古者官人之法事必稱材位必稱德則今日之擢如翰苑之論思諫垣之獻納憲臺之激揚省署之綜理孰非西峰之所優為者乎若夫師儒之任所繫雖重而今之所謂閒曹冷局也寧足為大賢展布之地哉似未能深知



西峰也錦曰不然君子之仕也行其志焉耳彼清華要劇如前所云云者自外觀之其威權隆重光寵赫奕僅取世俗之所艷羨而已然法守之所拘吏議之所迫靜牽動制惴惴焉左右顧望之不暇而其志豈易行哉夫唯師儒之任優游事外無所拘迫士特患無其志耳苟能堅志守道修於身而見諸行事充於已而推以及人則夫薰陶觀感之餘士將翕然而服顛顛而起其何牽制齟齬之足慮哉或乃嗟卑厭寂營營然計歲月覲遷改求以攀躋於分寸者何足與言志耶西峰淵博嚴正體

道軌物容色詞氣無非教之所寓非獨文藝講授之間而已故其鐸聲所至學者靡不傾心宗向雖七十子之服孔子不是過也而所謂論思獻納激揚綜理者亦孰非其教之所成謂之得行其志非耶矧天府密邇輦轂今 聖天子右文興治日與宰執侍從講行稽古禮文之事異時咨求宿學當首及於西峰黼屨之前細旃之上從容啓沃以大展所蘊則今日之擢固其階津也謂非深知西峰可乎聞者頗以鄙論爲然西峰戒行有日適別駕燕橋先生臨視邑篆命丞簿諸君徵言爲贈錦遂



以所告或人者書之以復且爲西峰將來之左驗云

### 張氏宗譜序

夫尊祖睦族之道莫重於譜牒而譜牒之傳則以名賢爲重若名位之顯微非所論也夫顏淵曾參豈嘗有一命之榮耶其譜牒流傳百世尊仰不啻九鼎大呂而大業之後或叩其宗輒赧然悚汗諱避不遑然則名位果足爲譜牒之軒輊耶善乎叔孫穆叔之言曰太上有立德其次立功立言斯謂不朽若夫保姓受氏以守宗祊世不絕祀無國無

之不可謂不朽也執斯語以論世寧復有遺議乎鄉彥張君天善自言其先世在趙宋時爲鳳翔郿邑人後隨高宗南遷寓居高昌鄉於是有松江之籍元至元間折高昌諸鄉建上海縣遂爲上海人其徙居龍浦之東則莫測何時也雖父老相傳謂坐傍道院爲張府遺跡然始遷之祖暨相傳世次與遷徙興廢之詳皆茫然無可徵矣張君傷祖德之弗傳且恐後世將愈遠而愈湮也乃據耳目所及自高曾而降區列緒系輯爲宗譜蓋倣蘇例而加慎焉其遠不可知疑不能明者皆闕而不書可



謂嚴且核矣豈非有得於尊祖睦族之道者哉譜  
中遁菴樂閒樂耕諸老皆以隱德雅操表正鄉閭  
張君復博文秉禮躬行孝弟承先啓後卓有賢稱  
固足以重茲譜而使之傳矣矧有子克肖績學砥  
行蜚聲士林將來大行顯施以懋樹勳業爲時名  
賢則所以致不朽而益重茲譜者不有如穆叔所  
云者哉予雅重張君且其請勤至不得辭也漫識  
數語于端用致勉焉且爲後徵

褚氏遺書序

古人有言曰言之不文行之不遠此殆據理而論

也然有幸不幸存焉至於幸而不幸不幸而幸則  
又出於事變之輾轉而理有不可致詰者矣君子  
於此將安所究其歸耶於戲自古能言之士朝鉛  
暮槩窮年矻矻其志固將以有傳也幸傳矣而或  
遭沮觸於意外不旋踵煙消漸盡欲尋其影響而  
不可得者往往而是其或殘編斷簡流落於山巔  
水涯廢棄於頽垣敗壁若不幸矣而偶獲所遇爲  
之表章之闡晰之至歷千載而光景如新若此者  
豈其初之所期哉數之所不會有不得而逃焉耳  
觀澄於此書鑱之堅貞扁之幽泉志亦良苦然卒



鬱伏而不顯使非盜發其封則蕭廣雖有嗜古之志將何從而購之使非盜窺之急則義堪雖有傳信之志將何從而筆之事變之殷至此蓋理之所不能決者也歸之適然之數非耶幸而遇劉繼先者鋟之於木尋復不幸又中絕者久之予不勝其浩歎焉夫發揮造化之微探索形氣之奧是固行之宜遠者也近廬州雖有板刻流布未廣恐其將復爲繼先也遂重梓之且述其所以幸不幸者如此若夫爵里之華矧劑之神則有前刻之序跋在義得而略云

黎易王太傅詩選序

代作

昔人謂詩能窮人又謂窮而後工是皆一時激憤之詞非通論也夫詩者人之性情也有性情則有詩矣而何窮達之間耶漢魏以降詩道莫昌於唐如沈宋元白暨應物夢得諸公皆踐履清華而權載之令狐楚李文饒輩皆位極元台是果窮而後工耶彼遭歷坎壈抑鬱無聊於是有凄惋慨嘆之聲以鳴其窮愁如郊島者則固有之而不必皆然也執而論之泥矣若太傅黎陽王公之於詩其達而能工者歟公自筮仕已赫著才聲未幾總憲度



柄戎機宰割施設宜日不暇給而公以笑談應之  
觸情寄興往往形之哦咏連篇累牘衝口而成未  
始推敲鍛鍊鳴聲咿咿若彼寒窶然爭奇競爽於  
細也其音調流麗而清婉視晚唐諸子何讓  
焉予童中時已知景企頃按畿輔行部至濟經公  
里閉慨然有執鞭之想因搜摭遺藁僭加銓次刻  
梓以傳於戲公名在國史聲望在縉紳其所恃以  
不朽者顧豈有藉於此哉傳之聊以慰晚末傾嚮  
之私云爾

王大傳詩選後序

險易皆詩也然各因性情之所得而發之能極其  
趣斯皆至矣有所溺焉不可也夫牛鬼蛇神幽入  
沙漠長吉之詩可謂艱深奇險矣而議者以爲不  
可施之廟廊淺易明順里巷能通樂天之詩可謂  
膚且近矣而詩家推爲一代之豪則險可盡與而  
易者可盡少之耶進彼抑此其亦隘矣太傅黎易  
王公以間世之才無施不可故其事功之餘往往  
出其性情之所得者形之於詩明易疏暢不務深  
刻商品格調其白太傅之流亞歟侍御楊先生雅  
慕高風乃掇拾遺稿詮其可誦而傳者彙而梓焉



鳴呼公勲隆望重雖言之不文猶當傳之况英藻  
煥發若日星之炳炳如是耶未可以其出之易而  
評之也公名越字世昌景泰辛未進士累官太子  
太保兼左都御史今贈太傅云

### 俯碧詩序

俯碧詩卷雲巢潘先生爲其友宣德華氏作也予  
詢俯碧之義雲巢曰德華少有隱操嘗構樓臨大  
江左圖右史日徜徉其間塵軒俗駕莫敢欵其扉  
者往歲清秋之夕江流無聲魚龍在壑顛倒星月  
千里一碧吾登樓訪德華則方俯欄凝諦若蛻蜩

然乃排闥疾呼德華耳若不聞久之徐整冠起揖  
客笑曰某俯玩碧流時形神相忘殆不復知有人  
間世也大夫士聞而異之或請以俯碧名樓德華  
無所遜曰宜哉俯碧誠資樓也或遂以俯碧稱德  
華德華亦無所遜曰宜哉俯碧誠資我也吾雅善  
德華於是謁善繪者圖焉能言者歌焉咏焉爛其  
盈卷矣而序未有屬也子豈有言以益之乎予因  
受而讀之終卷所以取乎水者探源窮委諸作既  
備矣將復何言強言之徒贅焉耳雖然竊有感也  
往時予以制使還自湖湘發黃鶴磯歷赤壁遵淞



浦而下時當春夏之交驚風怒濤日夕發作予舟  
蕩撼掀簸不啻敗葉之舞風中怖懼駭愕恨不颺  
翼以脫其畏之也如是而德華顧以爲樂且將終  
身焉豈性之殊於人耶殆所遭異耳德華身草莽  
心江湖以靜觀動則所謂浩渺而瀾漫奔騰而洶  
湧者皆其游神寓性之地也或以漱齒或以洗耳  
安往而非樂乎予輩役役於動犯危觸險進止無  
所據其不爲馮夷海若之所笑者幾希豈直畏之  
且懷慚負媿不暇矣而能爲德華益耶雲翼欣然  
曰斯言也足以堅隱者之志子殆德華之忠臣也

其何益如之請書此足矣

重刊靜芳亭摘稿序

近世詩家多騁驚新奇或耽溺纖巧及其久也流  
於恠誕流於浮靡而於古人所謂性情之正者判  
然莫相參涉間有覺悟其非而返迷趨古然徒古  
其言辭而不能古其理致古其意趣往往飾枝葉  
而遺根柢入玄虛而略情實與前之所非較量得  
失相去幾何古詩人之義固若是乎哉少司馬高  
吾陳先生學博而才贍識敏而氣充弱冠危科徧  
歷臺省政事文學卓爲一代山斗時出緒餘播諸



篇什莫非卽景宣懷觸事興詠發舒悃愮傾吐心  
聲鮮一辭一字不本於性情之正譬之氣機感觸  
而天籟驟鳴風水相遭而至文自著故其爲辭渾  
融沉著敦茂典雅有天成神會之妙無牽附鑄鑿  
之痕使遇唐宋名家如白太傅梅宛陵諸公自當  
與之抗衡對壘視近世屑然藻飾雕鏤於細瑣間  
者奚啻夜光之與魚目耶錦自蚤歲叨廁先生榜  
尾以辛酸嗜協相得甚深而沾襲膏馥亦復非淺  
顧材器劣弱無能窺測際涯仰視先生夔立萬象  
之端徒有竦企艷羨而已先生之子郡節君象賢

濟美文行兼懋政譽才名傾動士林迺於詳刑之  
暇重刊先生靜芳摘稿蓋以常德所刻久而漸漫  
故也緘題遠示竊獲縱觀欣快之餘輒附綴數語  
用備前驅豈敢謂能發明先生之奧旨耶聊以志  
不敏之媿云爾先生名爵宦績具載前刻序中茲  
不贅云

贈司幕鄧君入覲序

夫一邑之政維令統之次丞次簿咸有分職又次  
則司幕雖位列丞簿下而百凡政令皆所紀綱蓋  
有贊理之責焉位雖輕而責則重矣矧吾海爲天



下望邑民物庶繁賦役浩鉅刑訟徵需事變百出  
其當贊理而紀綱視他邑不啻數十倍欲使職舉  
而譽流難矣我邑司幕巴陵鄧君乃總督兩廣都  
憲公之從孫也家學淵源厥有攸自且精通法比  
諳習典章雅有用世之望遂以才諳受知於大冢  
宰簡授茲職既二載矣勤敏而練達公慎而明恕  
奉職效勞如臨師保自撫按藩臬暨郡邑之長咸  
相器異凡事有難理訟有難決役有難濟者輒檄  
委之君勇承奮往應酢曲當雖遇盤根錯節靡不  
迎刃而解上信下孚罔有後言賢能之譽轟溢遐

邇卓然爲一時慕僚之冠冕矣茲當萬方朝會之  
期邑明府右山先生喻公秉圭入覲君職在幕司  
例當侍行邑中諸父老感君惠澤欲攀留之有不  
可得以君廉不納餽乃介鄉耆姚霽輩造予徵言  
以致頌祝予惟明府公負經濟之才振廉惠之績  
旌書薦剡頻徹 聖聰然其所以贊理而紀綱之  
者君實與有勞績安可誣也矧茲述職朝廷所以  
考核殿最而大行陟黜焉典禮之重莫有逾焉者  
矣君此行也陛見之際明府公拜前司幕君拜後  
聖天子檢閱薦章褒寵卓異君當與明府公並



膺上賞賜燕賜秩錫之 璽書又將爲一時述職  
者之冠冕矣諸父老頌祝之意其在茲乎僉曰然  
哉遂書之俾持以獻

龍江集卷之四



龍江集卷之五

修德堂

碑記

鄭侯去思碑

嘉靖乙酉春上海令鄭侯啓範膺 召命還朝民  
方酣其惠風而遽聞奪以去也甚戚願挽留之然  
時制有不可焉者至是耆老孫瑞楊禎王洲等數  
百人合辭請刻石紀遺愛新令徐侯德新曰前事  
之良後之師也其亟成毋緩乃捐月廩之半佐工  
費咸歡呼抃躍奔承恐後謂錦嘗秉憲司文且知

雲間 唐錦 士綱

唐錦



侯深因屬筆焉侯之來正德庚辰冬也時 武宗  
皇帝幸金陵供億仰給畿甸臺符徵發迅若風霆  
侯從容酬應揮手而辨民寂然不聞也侯天姿英  
朗淵粹政先教化雅不欲以刑法弄民誠焉畫焉  
人歡趨之損益呂氏鄉約設長正頒示科條導之  
使知趨避焉徭賦度力所堪高下一斷諸心吏莫  
容喙民獲其平甫數月鼎新學宮恒以昧爽臨講  
諸生執經史鳧鷖行以進經指授者輒有場屋聲  
淫祠佛廬夷爲社學凡九十六所閭黨之間絃誦  
洋洋矣復隨學建社倉聚穀賑饑以約長正司焉

出入唯允惠濟甚洽俗頗耽訟多誕詞侯不爲忤  
徐諭以情與理而調釋之期心服乃已唯黠胥惡  
少舞法蠹政則廉其尤者峻繩之落其牙角惡未  
蔓者榜姓名縣門薄示之儆鄉飲則使俯伏庭下  
觀禮焉徃徃有媿耻革心者嘗旱而禱巫覡誕幻  
之說盡斥齋戒精一以走羣望徒跣跪拜曝烈日  
中俄而雲興雨降遂以有秋久之邑中廓廓無事  
侯亦多暇日垂簾鳴琴游泳典籍六曹蕭然坐嘯  
而已歲壬午秋穀不登嗣春雨復戕麥民頗告饑  
當路下勸分之令侯曰是舉未必益民而先擾之



非政也檢公帑得楮直暨爵錢若干盡以賑民集窮餓數萬列布衢巷躬歷驗給頃刻而徧民擁香拜舞如更生焉士林詫為海邦快覩賦詩紀之癸未甲申歲連稔侯曰乃今可以畢吾志矣名宦以功鄉賢以德崇之報之吾其敢忘即學旁建仰高祠竝祀焉繼乃新壇壝新津梁新郵傳新邑志凡所當為無或弗舉上游諸公偉異之交剡騰薦至是召命下送者傾城爭前持鞞請懸儀門以繫懷思暨別無弗灑泣有追隨數百里不忍舍餽贐銖髮無取時擬之玉壺寒水焉君子謂侯用儒飾

吏推忠及物父詔母哺衆瘼自蠲故在政民愛既去見思如此嗚呼千百世而下斯石也將為峴首之碑觀者墮淚召南之棠勿翦勿伐矣豈直慰邑人一時之思已耶侯名洛書甫人丁丑進士宏詞博學視古人無讓不獨政也今為監察御史徐侯名昭永康人辛巳進士

新建衛公仲由墓祠記

春秋時蒲與澶淵並為衛邑仲由以大賢治蒲惠愛旁洽而遐驚殆非蒲人所得專也故結纓之日爭奉遺齒瘞之澶淵之人得其首焉此載諸圖誌



而相傳於父老者如此揆事稽史當不誣也 聖  
天子龍飛之明年爲正德丁卯監察御史永壽楊  
公承 簡命持節 畿輔迺秋之八月將按澶淵  
未至五里而近有古丘穹窿道左叢棘森翳心異  
之詢得其故亟下馬展拜盡恭徘徊瞻眺慨然曰  
觀河洛則思禹見甘棠如見召伯古人於遐踪渺  
澤猶不能忘情而况丘冢之重骨肉之所藏英爽  
之所萃乎且式閭表墓獨行一節之士猶足恃以  
不朽而况賢如仲由也顧委諸樵牧而不少動心  
焉非吾憲度所宜急者耶郡守滁陽石侯聞而進

曰固某夙心而未之敢請也願聞成策以屬所司  
時關南譚君綬知州事踴躍而前甫浹旬工以成  
告於是饗有堂衛有垣庖廡門戟突兀壯偉而衛  
公之神且凜然有生氣矣石侯謂是役也可以敦  
化而觀政不可無記錦竊以非人爲媿於戲御史  
自周秦以來代稱雄峻漢則歲遣巡行郡國寄荷  
益重省風察俗王化攸繫非直用以專糾繩聽訟  
獄而已後世乃視爲法家之專門屑屑以刑名之  
學望之而居之者亦或以爲吾職固然也論甲按  
乙之外漠然無所寓其心焉噫周官漢典固若是



平哉唯公夙抱絕識而濟之以該洽之學充之以剛大之氣故凡設施舉措無不夔出流輩矧茲舉延輝於聖門樹勳於吾道行當筆之史氏垂光竹帛骭骸之作媿與事未稱耳雖然國史 朝廷公天下之文也祠記郡邑傳信之文也由郡邑以達於 朝廷固紀功述德之序也而可廢乎已而石侯率其屬落之且申其義曰吾聞古之才御史雖於職無所不當舉而薦賢莫先焉顧諸君不能勉於職耳仲由去今且二千餘載之遠而侍御公好之慕之表章崇嚮恒恐不及焉此何爲也哉唯其賢也賢而遠且思揚之况其近者乎在勉之而已譚君以告于錦曰充類引義侯之論卓矣哉命錦牽聯書之以發同志

吉安府學新修記

吉之有學自慶曆始文忠歐公實記其成錦少時誦其文輒欣然若游歌楫讓其間而目覩夫所謂壯偉閎雄者及長從四方士遊聞斯學殘蕪且久則又悼其弗遭而惟世無敏若李侯者爲之振之也迺正德戊寅夏五月錦以視學至其郡謁 文廟顧瞻殿廡輝映頗駭之退臨講堂課諸生已乃



周覽齋序暨賢祠射亭明秀之樓肄習燕休之室  
罔不翼然鼎新煥然圭潔質之曩所聞顧甚不類  
於是益駭進諸生而徵焉則學之新蓋數月矣鋪  
張彌文經費頗鉅維我大中丞孫公力綱維之故  
百年壯偉之觀雲舒霞布而還之談笑之頃樂其  
成不知其役錦於是神公之政服公之勇而因以  
慶夫斯學之遭也明日伍守文定率諸生請記錦  
告之曰立言立功皆能不朽然必倚人焉以重文  
忠百世師也故慶曆之役倚其言傳焉公道德風  
烈既已無媿而澤物之功殆復過之則斯役倚以

不朽固也而何假於不腆之詞耶雖然公之志則  
有可言也教於斯者其必曰公將使吾新夫教乎  
禮樂詩書吾敢怠厥教學於斯者其必曰公將使  
吾新夫學乎窮理盡性吾敢怠厥學激昂淬礪與  
學俱新異時一德同風材賢蝟起青原白鷺之間  
當爲 國家人文之倡不但可爲公卿而巳斯不  
有以慰公之志耶若其悠悠羣居偷惰玩愒學雖  
新而人維舊焉豈直負公且負 國矣君子謂公  
肅亮貞惠功在生民當人大書者多此未可窺公  
也伍守嘗相其役與有勞焉法當附附之



張侯德政碑

嘗讀前史循吏列傳見王成之僞增戶口亦廁其間心竊陋之餘雖聲績有可稱述然而操術數矯施設者亦屢見焉要之特後世之循良耳若我八峰先生張侯純德渾化豈非三代之循良哉侯登嘉靖戊戌進士庚子春二月來令海邑適值大歉之餘嗷嗷待哺者十室而九侯力懇撫臺發穀數萬躬自檢籍唱給莫不滿其所願其流寓及無籍者侯手書文簿勸富人設糜粥飼之復調停賦稅俾逋負者帖席數月間菜色之民若登春臺焉是

歲之秋鄰寇猖獗橫行海島中劫掠屠焚警報日至瀕江附海州邑爲之騷然當道督禦甚亟侯謂驅不教之民而使之戰鬪是自棄其民也乃訪募習水鹽戶六百餘人復倩諸華亭又得四百用之併力守隘宣威耀武日夕靡懈寇凡三臨境界竟不敢犯非我先聲有以聳之肯但已耶會 朝廷遣將調兵軍需百出侯悉心區畫無不應時取辦然未嘗絲髮擾民至今邑人談海寇事輒舉手加額謂張侯生我無異詞焉邑中大家畏憚長賦之役經營規避不遺餘力故里胥競作奸利侯豫爲



咨訪有所得輒籍記之歲積月累凡上之籍其厚盈尺屆期摘取供役無不犁然當於人心巧黠之徒莫能爲計每歲漕卒允運橫索取盈而溪壑無厭往往蜂聚梟張唯力是逞侯曰正人必先正己嚴戒長賦者粟必登式臨事則請自主免每以官職去就與之抵拒厲色溫詞折服其心例贈之外不加粒粟或有潛通過取者則覈其例外所得列諸漕臺咸正厥罰仍責原卒運送歸償自是漕卒拱聽約束無敢誼譁起變地方享其長利壬寅歲當大造版籍之期往時僉報冊書里胥用以爲市

侯取舊僉量田殷戶充役井里晏然不聞囂聲舊多科擾侯一切釐正如革戶供給官紙之類省費不可勝計西鄉里甲凋殘或一甲僅一二戶存焉甚爲差役之累侯校量均通無限彼此唯在不失故額其城市坊甲費尤繁重則盡籍境內餘戶之饒產者充塞之役法一變勞逸始均舊規歲徵時戶給一帖謂之戶由唯登徵數而已侯乃別創規格以十載爲限戶給一冊凡歲徵歲納之數暨售鬻田土之類悉隨時登錄不特負逋莫遯所以稽侵欺正收除皆可一覽而得焉有識者服其精密



審編徭役邑之大政蠹緒千變莫可端倪况近時  
紛更頻煩不勝其擾侯力抗諸邑之議恢復舊規  
自以意見創立編審規式簡要明徑無所藏奸不  
旬日遂以成事頒諭其間區圖之腴瘠事力之優  
劣固不隨宜酌處暢協衆情而吏無一人知者頻  
歲雨暘愆期凡禱雨者四祈暘者三皆隨禱隨應  
捷於影響咸謂古人返風滅火偶獲於一時一事  
者殆非侯之匹也每遇蠲貸必百方體究寢息靡  
寧區列四等通融分派不事虛文克臻實效海俗  
負氣酣鬪以訟訐相高甚至同室相傾無復人理

屢有構駕人命竦動上官阱人於不可致詰之地  
及詭首盜賊覲以蠱染規利者侯訊察得情悉爲  
申雪而反其所坐遠近欣躍詫其神奇復請於大  
巡周岐麓先生峻懲顯禁乃頑奪氣良善賴以稍  
安尤慎於改作平居不忍勞一夫費一鏹端有視  
民如傷之意唯學校則加意繕葺宮墻齋舍炳煥  
若新待士恭而有禮凡所造育咸克感奮他如增  
置津艘廣闢義塚於民有利益者亦未嘗憚勞費  
也憶侯初下車時嘗語錦曰廉平常迹聲有難高  
苛猛矯異招譽必速吾性雅不好名其敢忍心以



屬民哉此侯由衷之言聞者相慶侯持是道三載  
如一日表裏澄徹始終不爽而清苦淡泊踰於寒  
士人尤以爲難焉蓋其公廉仁恕忘己利人根諸  
天性發於志誠非以邀名非以徼寵推其志必欲  
比屋豐饒人咸君子然後爲快律之前史循吏雖  
有其政未必有其心也縱有其心未必有其懇誠  
也謂爲三代之循良夫豈諛耶前後觀風諸使薦  
剡相屬癸卯春暮考績將行邑人叩頭獻歎乞留  
不得日相與翹首跂足瞻侯旋車侯未至國門已  
聞 召命 廷見之後 聖王褒德旌賢簡擢戶

科給事中君子曰諫垣得人矣可爲天下賀也而  
邑人聞之則相顧惋愕若失至寶思望履舄恨不  
可得於是耆老陳濟等數百人醵金帛石羣請於  
新令尹聞孫侯屬筆於錦嗚呼至誠之道可以感  
天地格鳥獸况侯純德渾化浹民骨髓敬信愛戴  
不啻如神明如父母則夫鬱陶乎人思愈久而愈  
不忘乃誠感而誠應夫豈聲貌之所爲耶古稱所  
居而化所去見思殆未足以盡侯之美也然侯之  
不邀名而令名赫著不徼寵而殊寵鼎至天道物  
理良不可誣較諸苛猛矯異者所得竟何如耶則



斯舉也所以昭勸戒啓化源豈但揚厲前休慰籍  
遐思而已哉侯名秉壺字國鎮八峰乃其別號閩  
之蒲陽人

龍江集卷之五



龍江集卷之六

雲間 唐錦 士綱

碑記

新建萬年縣儒學記

正德戊辰姚源寇竊發始則狐鼠耳有司虞罪且波及諱而護之蓄疽蘊毒以倖無事庚午辛未間遂至熾烈焚灼屠刈警報日馳於是饒之四境無寧區矣事聞 天子赫然震怒命總制陳公金督師臨之剪魁薙鷲釋散黨與盖逾年始定然其地僻阻濶於聲教酣鬪而易亂陳公謂設治建學其



或可化偕巡撫任公漢聯疏以請 廟議允協命  
所司亟爲之圖會殘黨嘯叛殺命吏弄兵猶故  
詔復進俞公諫爲總制討之又逾年始平嗚呼寇  
則平而民之瘁甚矣時叅政吳公廷舉與有平寇  
功因留經度憲副許公庭光繼爲綜理施設以漸  
甲戌邑治成乙亥之冬學宮乃成左廟右學規制  
井井談詩書而服禮樂者雍雍濟濟翕然向風見  
者不知其爲向之豺虎區也又明年丁丑許公以  
京兆徵憲副王公奉 璽書代之肅風紀振武威  
尤注意文教樂茲學之有成也遣教諭王鑾來請

記予時視學貴溪方校士諾焉而未果爲久之復  
以書來曰茲地自開闢以來乃始有學諸公成績  
不可忘也吾思有以永之曠后待子久矣予復之  
曰君子所樹立在不朽之功非以不泯之迹也  
夫經營相度建學之迹也化成俗美建學之功也  
功無窮斯諸公之績無窮矣迹何與焉嗚呼予不  
能不厚望於學之諸生也聖賢之道具存于經書  
羣居肄習篤信而力行之以倡乎其國人宗族修  
於家而孝親敬長施於國而尊君親上師師成風  
磨揉遷革則狼戾悖逆之習變而一德同風之化



成矣化成俗美自茲學始茲學建設自諸公始則所謂永成績者其不在於茲耶若夫經營相度之勞雖窮極模寫固迹之粗耳無足恃也既以復王公遂命鑿持歸刻置講堂俾游歌於斯者覽而思焉庶其知所策勵也夫是役也知縣楊清經會才費鑾與通判魏杲程 覈工役咸有勞績因牽聯書之

中洲方先生去思碑

昔人有言曰學校者講學之地也錦竊隘乎其言夫古聖王治平之道胥此焉基之而但講學之地

已耶聞之古記則擇師其要焉故曰師嚴然後道尊明道先生嘗欲取天下茂俊聚而教之京師須其學之成也用以分教天下斯非古者擇師之遺意乎然世之論師者乃曰經師易得人師難遇嗚呼捨經則又何以爲人師哉岐分而難易之繆矣維中洲方先生負英傑之才邁往之氣而濟之以淵邃精博之學菁固才賢數澤而先生尤錚錚其間嘉靖庚子領省闈高薦丁未登會試乙榜例署學職先生得上海學諭謂是官秩雖卑可以行道毅然以作人與教自任每旦坐倫堂經史羅前諸



生環列先生發揮幽蹟折衷異同啓戶牖以達闡  
奧汪洋浩瀚疊疊焉殆不知景晷之屢移也諸生  
或未契悟質疑請益者魚貫以進如扣洪鍾小大  
隨應比物醜類開釋滯凝不啻矇者復明瞶者復  
聰何其快哉且時時旁及治理凡禮樂政刑之屬  
靡不斟酌討論以究夫充擴運用之妙較彼泥古  
而不達者不亦霄壤矣乎若舉業所須經義論策  
諸作一一標指體裁要其歸宿悉鏟時習之陋日  
課旬試必面加品隲飛筆點竄諸生驚喜心服咸  
謂此古之文也非時文也先生詮其尤粹者輯而

梓之題曰考課日刻士林爭相覽誦傳以爲式此  
其講學之大凡也然其所以模之範之則先生有  
身教焉修己體化本端而表正其爲瞻依倣則之  
地者固已恢乎有餘矣而又示之以志向驗之於  
踐履所謂相觀而善者也先生雖循循善誘至於  
遏抑矯誕繩束狂惰未始不峻且厲焉蓋欲折其  
氣而存其心所謂長善而救其失也嘗鐫刻 皇  
訓以宣播 德音勒科第題名以昭示風勵所謂  
鼓舞而興起之也凡此孰非身教之所寓乎其於  
義利之辨甚明學故有義田歲入頗不貲先生勾



稽出納極其詳慎公費外不私錙銖待諸生曲盡  
恩義拯危卹難不異疾痛之切膚也遇堂試每爲  
諸生設饌拒却贄饋耻於染指聞有喪無以殯貧  
不聊生者徃徃割俸賙之殊有解衣推食之風焉  
諸生自幸得師咸翕然宗之且感之雖百羽之宗  
鸞羣山之拱岳奚足擬耶君子曰知所以教之知  
所以儀刑之若先生者可謂克任夫師道之重矣  
而豈易得哉治平之基於是乎在臺憲諸公按部  
至者輒相嗟異鸚書薦剡頻歲屢上 朝論僉焉  
庚戌之夏遂有 召命諸生欲攀留之不可得則

圖所以永先生之教者謂錦嘗與聞學政於是昭  
采應魁鄂衣承慈洪道形卹嘉楫鉢允哲允端謙  
貞需諸君率其同儕造錦徵言因述其梗槩授之  
刻置學宮庶幾恒獲寓目以少慰夫無窮之思云  
先生名興邦今爲春卿司聽中洲乃其號也

馮侯去思碑

嘉靖丁酉春正月 聖天子以上海令馮侯有異  
政下 詔徵焉侯趣駕趨 朝馬不及秣邑之士  
民泣涕以送攀遮以留者道相屬也然勢不可止  
乃謀伐石紀惠以慰去思謂錦知侯頗悉俾執筆



唐前漢書卷之六  
三  
焉懇讓不獲敢迹侯行事讓次之侯名彬字用先  
別號桐岡廣之雷陽人英邁高朗遂於理學登嘉  
靖己丑進士第初令平陽惠聲流聞尋以內艱而  
去平陽之人迄今愛戀不置乙未春服闋赴銓時  
上海缺今天官卿諭其屬曰海邑畿輔之望為里  
六百有奇歲賦且數十萬矧役鉅而訟繁奸蠹所  
藪令必廉明必敏練庶克有濟乃稽諸薦牘詢之  
士論僉曰馮平陽真其人也於是聞於上而  
命之侯下車開誠布公條約明信黜額外之卒蠲  
無名之徵不苛猛以立威不紛更以買譽虛心應

物無黨無偏事至刃迎節解無不犁然當於人心  
抑豪縱卹窮弱務使大小富貧各得其職至於發  
摘欺隱宛如明鑑懸空而魑魅莫之遁焉然明而  
不察小過姑令自新凡所追攝親署片楮付里役  
傳遍隸卒無所夤緣舉邑稱便先是里甲之費歲  
出無藝侯定為令每旬輪十里協供之且於百凡  
公需悉從損抑冒求濫覓者一切拒絕術士游客  
莫得窺其門恒曰豈可以民之脂膏為吾市恩掠  
譽之具乎酌量樽節視徃歲所費汰其三之二焉  
糧法久廢胥吏多飛寄詭匿欺詐萬端侯晝夜檢



竅盡括其實定著于籍自是出賦受役均獲其平  
近時里中長稅之役病民尤甚一染其役立致碎  
產矧貪吏乘機龍斷每歲新故告更輒廣疏中產  
以上徧召至庭以更役恐之富人多以賄免而領  
役者率單薄辱戶四境騷然靡寧侯洞燭其弊乃  
豫詢密察灼知戶產歛盈及期指名召役皆鑿鑿  
精當不復泛追旁逮民若不知者然咸懽呼雀躍  
稱神明焉至如區畫西鄉之板荒酌處冊江拋荒  
之包陪講求助役之法以全稅長之家皆經久安  
利之圖建白勤懇不啻疾痛之在其身也俗頗好

訐而海濱之風尤爲囂悍飾誣構僞糾纏莫解侯  
旣公廉復詳聽覽而洞情僞疑詞滯獄無不立剖  
羣吏旁睨束手無敢容一效嘗有寡婦酗酒而蕩  
與所私者逼其子婦不從輒手刃焉復懼事洩獲  
臯潛賂鄰族事旣寢矣侯廉得之悉縛付獄正操  
刃者之罪表貞婦之墓輿情痛快縉紳士夫歌頌  
交作詳具辯貞錄中其他平反寃誣糾正欺繆者  
尚衆率此類也歲有雇役餘羨例歸隱沒侯按籍  
召主戶給還之絲髮無取人服其廉貧家死者多  
從火化舊有化人亭爲聚焚之所侯出郊見之惻



然曰民固無知吏坐視亦過也亟毀亭諭禁俾歸  
於禮海上嘗有小警侯相度要害布列關譙仍集  
民丁戍守民恃以安前令李公有惠民實德民思  
慕不已羣請祠之侯曰崇德報功國有典章矧衆  
心之所向哉卽擇地建祠用慰民志且俾有位者  
知勸崇葺廟學赤白炳新月朔望必詣明倫堂與  
諸生講道談性不屑屑於詞藻枝葉間也浮靡之  
風爲之一變侯蒞邑將二載阜民善俗之政振舉  
無遺然大要以節用愛人爲本蓋深得孔門家法  
不但如後世所稱循良吏而已夫令者民所仰以

生也千百其人則千百其心而千百其欲也一夫  
不獲怨讟隨之故令能寡怨亦難矣矧所居而民  
父焉母焉旣去而感焉慕焉頌且祝焉如馮侯者  
豈非世之所僅見哉謹以錦所目擊具列于左其  
得諸傳聞者不敢盡書蓋欲傳信云爾系以詩曰  
洋海啓邑極吳之東旣壯且劇又閱治功小徃大  
來剝盡斯復 帝錫仁公用康甸服矜此寒饑我  
哺我衣殘疾疲癯我其砭醫歎盈懸殊蹙蹙同役  
檢覈區分羣嗟乃釋矧彼稅長洪哉禍源痛蠲需  
擾如解倒懸撫字催科吏無隲突樂輸爭先恐失



時日詭詞充庭莫撓我明表貞懲蕩快暢輿情鳴  
杼盈室禾棲彌畝閭里嬉嬉戴我父母闢墉肅嚴  
孰敢伺窺保我黎民罔有怙危翼有泮宮式闡風  
教褒德徵賢 天子有詔往踐台輔雲衢坦平豆  
羹必祝願公長生碧海巨浦分流湯湯民之公思  
與流俱長

龍江集卷之六





龍江集卷之七

碑記

重建信豐縣廟學記

正德丙子春正月信豐學宮災詩書俎豆之區蕩  
 為飄塵肄習罔寄弦誦無聲久之莫有任起廢責  
 者明年丁丑秋憲副楊公廷宜以行部至見而愕  
 焉詰其長吏曰邑贛之望也久以文獻稱而化源  
 治本顧寂寥若是豈惟缺於制抑將何恃而能邑  
 也且佛老氏之宮為其徒者徃徃能醪而就之剽

雲間

唐錦

士綱



NATIONAL CENTRAL LIBRARY, TAIWAN, R.O.C.





竊吾道以倖爵祿而遂叛焉謂之何哉既而閣公  
牘得廢地數區公躍然喜謂興學有具矣亟售諸  
民取其直凡若干於是僦工鳩材咄嗟而集甫數  
月功以成告廟宮既嚴講肄有堂齋廡翼峙燕私  
區別制所宜有罔或不備金碧輝映赤白炳明觀  
者歆賞謂所未覩諸生游歌於斯登降裸獻於斯  
舉欣欣然如趨躋孔庭而親挹夫秋陽江漢之盛  
矣相與樂而幸之然不敢忘也圖以寓報於無窮  
則來請記予告之曰君子所以感夫人而思報之  
者不難於不忘而難於不負昔常袞觀察閩中徒

以文詞爲倡士猶感化曾侯修泮宮國人歌焉矧  
楊公於茲學有再造之功耶大書而深刻之以繫  
邦人無窮之思誠宜也雖然是所謂不忘也而非  
不負也夫 國家設學之意將以興民心出治道  
天衷人紀賴以植焉非特以叢談萃處資諸生決  
科干祿而已也楊公興學之意所望於諸生者其  
有外於是乎今諸生握衣鼓篋其間其必俯而思  
仰而求明倫而復性善俗以成化必使不負於國  
不負於公焉斯爲感之深而報之善也使或弗思  
名教之重禮義之尊擾擾役役惟利途是趨飭枝



葉而棄本根遽虞孔孟而歸宿異端學雖興道則廢焉豈惟不能不負是謂倍人之德豈惟不能不忘是爲棄人之功宇宙雖廣宮墻雖高其將何以自容乎爲彼而不爲此唯擇之而已耳予於諸生有一日之義故以是告楊公名某廷宜其字楚之孝感人公廉有威遇事風生其察嶺北也激揚之餘郡邑廟學爲一新云

東明縣新建預備倉記

古者國有管繕必先庾廩雖囹圄之重廳事之要皆不得踰越而先焉豈非以民之所天在是緩急

重輕自有不容紊之序耶不然則建置失倫非達政者矣其有駢舉而兼興焉者固非甚矣然材非神輸力無鬼役寧有不屬於民者耶予之爲東明也邑事草創廢陋相仍左瞻右顧有不勝其熱中者然帑無羨積民困徵輸凡吾之來求以安之將厲之也使欲銳於美觀百堵皆興志則快矣民不重困耶於是先其所重首事庾廩或因罪之當贖者而責其材或因民之無業者而餽之陶銖積寸累久而充用乃集輸役之民計口給餉而俾之從事焉中爲廳三楹北爲堂殿十楹東北爲殿五楹



西北六楹東殿二層凡十有五楹西十楹西南九楹東南八楹材良斲堅頗爲壯偉閱數月工始訖功旣落之明日僉謂宜刻石以紀歲月嗚呼營繕細事也矧茲舉無鉅功無侈費顧足污琬琰耶雖然義有攸繫殆不容默也夫先王儲蓄之義聚之所以散之歛之所以施之也不知者乃以爲王政之所謂重而且要者莫先乎此於是橫求苛責徵誅無藝歛之若恐不及聚之唯恐不厚嗷嗷之聲置諸不聞或以詰之則曰爲國儲蓄先王之所重也噫吾恐瘡痍之衆將駢稿於豐盈之日矣安能有待於凶荒而望其施與散也耶譬之斷人之股而療以續骨之膏固不若不斷其股之爲愈也且先王之所謂儲蓄者因其自然之美而藏焉而聚焉而無使殄費焉否則寧無施焉不歛也寧無散焉不聚也豈曰威而致之巧而豪奪之若後世之所謂儲蓄者耶予非知政者然一得之愚或可爲從政者告因僭爲之記

思貽記

憶昔弘治紀元之二年歲癸陳公以在平丞乞歸時年五十有一矣予母族與之有連姻相過從接



其容粹而莊耳其言質而有倫心竊賢之退而詢諸人乃知公素孝友雅好讀易在庠校以詩文名尤工於楷篆在任平多惠政民愛戴若慈母焉於是心愈賢之且歎公位不酬德天必補其所享期頤耄耋將不容靳矣居三載公忽遘疾不起予不勝悼且駭焉豈天道果昧昧不可憑耶抑所謂補其所享者將在其後人耶時其子仲魯君僅三齡耳君雖幼孤而天資穎敏夔異常兒甫成童母沈孺人授以孝經小學輒能成誦令習松雪書法輒逼其真十八選補邑庠生屢試場屋蔚有時譽咸

謂科第可俯拾也夫何忌者鼓謗當道惑焉君默不與辯唯杜門奉母求知於天寡姊守節迎而養之終身至於進取之念蓋漠然若忘矣久之縣大夫思齋鄭侯謂君孝義可尚乃大書牌額表厥宅里仍旌以彩幣錫之巾服俾澆浮者媿焉繼而浩庵曹侯特頒蠲徭之令兼山梅侯復以山林隱逸懷材秉義劾薦於憲臺君子謂仲魯身雖退而名日彰矣君近錄疑齋墓銘見示乃曹憲副定菴所撰因泣謂予曰傷哉不肖孤之弗克承所貽也吾陳之先在宋初爲潁川人自康肅公至郡馬公五



世矣郡馬之仲子安始居閩州靖國初徙廬陵再徙西昌至建炎南渡間其孫明伯乃徙蘇之吳縣粹仲徙華亭之南橋其諱敬者則郡馬之少子也隨郡馬公避亂青龍由敬而下七世至新一處士復自青龍徙於上海之西溝焉時元籙垂訖矣今西溝慶寧寺卽其所建遺澤未泯里中父老猶能道之又五世爲道謙處士實生疑齋公云疑齋生而岐嶷志向不羣伯祖文璧在 太宗朝父子甲科相繼爲詩禮望族自後書香寂寥公深憤之遂苦志誦習期紹前芳而數奇不偶卒於小成然其

未究之志固以貽我後人也顧方避謗屏居莫遂顯揚以承先志不孝之罪殆不可追詎意丁酉之秋敝廬弗戒於火凡先世所貽文籍暨諸名公贈言一旦化爲煙燼遂使百年文獻泯焉莫徵不孝之罪蓋愈不可追矣每一興思五內如割不肖孤無涯之痛將何時以釋耶予慰之曰何哉君之爲是感傷也夫科名之得失有命焉文籍之存毀有數焉古之人未嘗以是責孝子也傳云大孝顯親其次不辱親二者有其一足以稱孝矣豈特免於不孝而已哉今君脫屣名場率德遵道兢兢焉如



執玉捧盈不敢少有違越以犯聖賢之訓談經講性擇言而發隱然以名教自任可謂能不辱其親矣由茲而往果能砥礪弗怠操履堅定使道德日進於高明言行表儀於後學如是則天下後世孰不想望其聲光而贊頌其先世斯不謂之顯親揚名乎是在仲魯勉之而已若夫科名之未遂文獻之不存皆不足爲君病也君技淚謝曰先生命之矣不肖孤敢弗勉哉予旣慰藉仲魯又恐後之君子無以論君之世也遂記其梗槩俾有考焉疑齋公名儀字廷表君名東山仲魯乃其字也

### 曹侯德政碑

皇上勵精化理百度維新加志困窮慎簡良牧宣布德音詔戒殷重於是郡邑守長咸翕然遵承而愷悌和平之政徃徃有古循良之風若我邑大夫曹侯尤其表然者歟侯仁厚弘恕本諸天成博愛兼濟發於肝膈故其條教敷宣熏蒸酣暢不啻春風之披拂也民以是感而懷之邑舊苦賦重役繁吏胥又緣爲奸利蠹穴百出侯至卽究厥瘠腴核戶豐約條理粲然奸欺莫逞故賦與役皆稱平焉前令時積逋累萬上官欲一時盡責之文符旁



午程期峻迫侯故緩其事俄以慢令被詰殊不為動徐曰徵科之法以勿亟為善矧兼征併取昔賢所戒卒緩之民獲免於流徙時漕艘多遠泊江湄運官遣卒迫奪民舟以備短送道路騷然仰舟為衣食者皆失業侯建議俾有司僦舟給之仍昂厥直舟戶乃爭趨焉濱海數鄉喜氣勢囂訟酣鬪動牽數十人縣歷歲時不破產不已侯既剖決中情畏服其志復委曲譬曉開其悔心自是詭訟衰滅有大姓負冤久繫承訊者多引嫌辭避數載弗決侯旁詢密訪得其枉狀立破械出之不疑不沮聞

者稱快西鄉素號澤國土薄賦厚蕪廢相望侯招徠鄰境墾闢日廣民有負愆而情可念者亦貸使開治未幾蕪畝漸登逋賦有歸雖頻歲有秋不忘歉備儲穀山峙至廩不能容然未嘗妄有誅索也會造戶版侯手自校劃刮去舊時積蠹考定規格成黃冊事宜一編當道者賞其精當頒布為令東郭襟帶巨浦每風濤猝起覆溺相繼侯市良材造巨艘十餘分置諸津仍植標為識以絕私用渡者如履坦途焉損益呂氏鄉約附以義倉條式頒之父老立鄉社行之非鬼之祠悉從毀撤論者以為



庶幾古人矣惠政旣多歲旱禱雨輒應凡三禱三  
雨民尤神之庚寅夏秋之交江南多蝗侯震駭靡  
寧日夕虔禱蝗尋散飛出境或墮溺海波竟不爲  
災嗣歲復有岐麥之祥士大夫爭歌頌之其興補  
廢闕勸不愛力首新文廟而學宮齋舍皆藻飾有  
加煥然改觀程造諸生嚴約豐餼咸懷感奮重建  
惠民之局捐廩市藥檄官醫主療歲活貧病恒數  
百人增闢養濟院以廣惠筮獨賑給明核歡聲沸  
騰餘若壇壝庾廩暨津梁郵館無不扶羸整壞以  
就堅新其間工役頗鉅如吳淞百步諸梁水次預

備諸廩皆咄嗟而辦民不知其費之所從焉撫按  
行部至者或不視案牘而去先後疏薦者五醴幣  
褒勸者十有二天官卿上其治行 召拜南臺御  
史褒德登賢於斯爲稱侯不以自泰冲挹愈至識  
者又以占侯名位之未涯也侯行之日老稚攀戀  
者充塞衢巷然業不可畱則相率脫履以識思焉  
有奔送數百里外不忍別者至是懷思不置父老  
沈瓚等數百人合金礮石請書惠政錦遂擴所見  
聞書以歸之是舉也匪直顯循良慰懷思而已  
聖明重民選吏之效端於是乎徵焉侯名煜字孟



輝饒之浮梁人嘉靖丙戌進士其來以戊子夏六月去乃壬辰之秋蒞任僅四載而邑人則有無窮之思云

開封府清軍公署之記

正德丁卯春三月開封別駕郭侯營清戎館於郡治之南不踰時功以成告乃亟書走使屬錦記之問其創置之由則曰郭侯實始謀焉而郡守陳公主之尤力遂以其事上之監司決之部使者而皆不能易侯之議也問其材曰即郡堂之廢材而用之也問其力曰因民之輸役于公者而役之也問

其制曰始門廡戟衛次堂次寢次庖湍齋舍區分序列舉適準度固侯之所規畫也問其地曰包公南衙之故址韜沉草莽而侯之所搜剔也曰噫是可以書矣夫事有得已而不已不宜書勞民而費財不宜書無以法後光前不宜書斯舉也徵之古人興作之善克備無遺是可以書矣今夫開封天下之盛府也清戎國家之重務也唯其重也故郡以別駕專領之而開封統屬之繁視他郡不翅數倍有專職而無專居則何以濟其繁而稱其重耶是不可謂之得已也材取於廢積之餘公帑私藏



無與焉力出於輸公之役而闐闐獻畝間晏如也  
其何費與勞之有而况不侈不陋考制合宜可爲  
後法且孝肅久翳之踪一朝宣朗寧非包公之光  
乎古人興作之善何以易此抑予聞之意氣符昭  
則曠百世而相感孝肅高風偉蹟映照千古有耳  
者所共聞然諉之遺墟棄址過而不顧者多矣唯  
陳公廉直果勁有孝肅之志節郭侯操繁攝重有  
孝肅之才識所以覩遺踪而踴躍傾嚮若不自勝  
焉豈非意氣之克相符昭耶所愧腐陋之作無以  
藻飾新構然文因事顯則茲文之傳度幾附假於  
二公也遂書而歸之陳公名澍字天澤郭侯名經  
字載道皆時望所屬柄用殆旦夕云

古溪記

今之習俗日趨浮僞詭情狡態莫可致詰言周孔  
而行盜跖者徃徃是也予疾之若仇讐然恒竊嘆  
曰安得敦朴誠信如古人者與相周旋而一洗世  
俗之垢乎久之得歙士黃君子瀛焉醇雅質亮言  
必可復研究經史必求驗之身心而不委諸口耳  
豈非居今行古卓然傑立於頽波之外者哉宜其  
不屑於今人矣頃與子瀛論及乎是子瀛曰吾非



敢薄今之人也亦非敢偃然自命爲古人也念吾  
始祖以孝子旌于唐代肇居黃潭蔓延潭渡迄今  
八百餘祀而枝葉茂繁名賢輩出族之由來古矣  
吾安敢追逐時流以隕吾祖之風乎潭渡村南有  
古溪焉吾樂其名故卜築其上於焉栖隱於焉課  
子而因以堅吾志嚮鄉黨遂以號我公謂何如予  
躍然曰允哉斯號之稱情也聞是溪北枕黃山源  
出三十六峰之下南山拱其前紫陽山黃羅峯列  
峙左右烟雲環合蒼翠鬱蔥豈非一方靈秀之所  
自哉然自有此山卽有此溪滄桑無改陵谷未遷

其所閱歷蓋不知幾千百載矣則夫古人之在千  
百載之上者孰非是溪之所鑒賞者乎今之人情  
物態倏忽萬變愈趨而愈下愈變而愈澆其不爲  
是溪之所鄙笑者鮮矣子瀛思欲自拔於今而返  
之於古乃卽溪之古者而托處焉庶幾對古溪如  
對古人於是讀古人書尋古人之矩矱玩古人逝  
川之旨誦古人濯纓之歌旣以古其志行又翼勵  
四子相率同進於古人則是溪也寧不有裨於子  
瀛而子瀛可謂無愧於是溪矣允哉斯號之稱情  
也然以斯世而有斯人豈非空谷之足音乎予聞



夫楚然之聲喜不可遏遂援筆書此以旌子瀛以  
記古溪俾欲知子瀛者求諸溪欲知古溪者求諸  
記

龍江集卷之七



龍江集卷之八

墓誌銘

江西右叅議辛酉儲公墓誌銘

雲間 唐錦 士綱



嗚呼吾友朝列大夫江藩叅議辛酉儲公之卒也  
久不克葬越八載爲嘉靖丙午其壻潘子允亮憲  
副笠江先生子也傷之爲飭兆域築玄堂卜以明  
年丁未新正廿日癸酉葬公於三林莊之舊丘復  
懼公之盛美弗傳乃奉庠友潘君時雨所具事狀  
謁予請銘嗚呼公平生知厚茲唯錦存銘其敢辭



按狀公諱昱字麗中莘西其別號先世魏人也遠祖官二公宋季避亂徙居三林莊之莘溪元至元間建設海邑子孫遂爲邑人曾祖諱德富祖諱敬考諱璇以公貴贈兵科右給事中隱德相承世業耕讀妣趙氏贈孺人公生有俊質穎敏絕人五歲失恃繼母孫孺人撫育甚至教之書應口成誦甫就外傳卽知趨學日誦數千言過目不忘賦詩輒有竒句見者嗟異稍長益該貫博洽造詣日深文筆雄竒豪贍宗法韓蘇而精嚴峻潔又自有獨得之妙焉憲臺校業屢居首選弱冠廩食士林以倫

魁擬之郡守陳公劉公邑令董公咸加殊接延爲子師里中子弟執經問義者戶外之屨恒滿凡六舉鄉試皆弗偶正德戊辰遂以例貢太學錦之年友甌濱王公爲司成師道甚飭精藻鑑尤慎許可試公文大喜稱爲國士錦時待罪諫垣每朝會甌濱必舉似錦曰儲生翰林選也四方之士聞而慕焉從之講易者數十人太宰水村陸公嘗問士於甌濱首以公對水村卽日遣子受業廟堂諸元老咸相傾注會外艱計至竟以憂歸癸酉服闋還太學遂登順天鄉薦丁丑會試南宮占上第選入翰



林爲庶吉士讀中秘書館閣試恒在優列己卯冬  
諸吉士散館公拜禮科給事中俄膺簡命監營  
乾清宮時工費侈濫奸蠹萬狀公釐正裁革悉  
歸於理侵冒之徒無敢厠迹其間所節省卽慮數  
十萬雖觸忤權倖弗暇恤也嘗有奸商持千金爲  
賂公怒而斥之同事者服其廉比訖工擬進公太  
僕少卿公抗疏辭曰懋賞朝廷之殊恩服勤臣  
子之常職以常職而冒濫殊恩匪惟有覆餗刑渥  
之凶抑恐開獵資倖榮之路不便上允其請特  
有白金文綺之賜尋轉兵科右給事中公益感益

不知無不言封駁建白皆有關國體多見允行舉  
劾鉅重必奮筆直前不少依違雖一時風采四方  
聳動而忌者怨者亦不勝其衆矣又二載禮曹薦  
充副使冊封弋陽王於豫章事竣還朝道聞  
少參之命公憮然曰吾久淹場屋晚獲遺際雖嘗  
展効微勞而績緒未究遽荷金緋之榮亦云幸矣  
其敢忘止足之戒乎遂三疏乞休乃於三林里第  
累山鑿沼鼎建亭榭鳴琴賦詩優游靜養殆若忘  
世者然久之頗以離索爲歎復營新居於邑治之  
北時時款集賢士大夫與爲文會品隲古今折衷



疑義每至丙夜未已高談劇論往往抵掌絕倒又  
若有意於斯世者焉戊戌秋復還三林山居忽寢  
疾逾時自度生育無望擇立從子鵬爲嗣俾王舊  
第公仍就新居訪醫藥雖攝療百方竟不能起屬  
續之辰季冬望前三日也距生成化戊子仲春十  
有二日享年七十配徐氏贈孺人繼李氏女四長  
適福州知府朱豹次適曹恪皆先公卒又次所適  
卽允亮也季適王慈鵬後公三載亦卒鵬子一誠  
一中嗚呼公文學足以名世德器節操足以表俗  
其所建樹雖未獲盡究所蘊而嘉謨讜論日徹

聖聰顯列典章澤流區宇古之所謂三不朽者蓋  
兼得矣矧年躋古稀順正而斃復何憾哉第盛德  
弗嗣或以致疑於天豈知適然之數達觀者固未  
始以置懷抱也錦憶童子時與公同遊庠校當時  
同舍聚講者數輩皆一時英雋而公尤挺卓錦稚  
且闇偶先忝科第後二十餘載公始登科雖騰發  
較晚而鴻名偉烈輝赫彪炳錦蓋瞠乎其後矣晚  
同投老林壑白首追隨尤以舊誼特相契密則世  
之知公者孰有踰於錦耶遂爲之銘曰 光風霽  
月公之風神虹光霞彩公之遺文排雲披腹公志



既伸天章綸錦著公之勲孰謂公已公則永存乃弗胤績匪公之恫數有適然寧所較論我我堂封萬古恒新過者式車曰此名諫議之墳

四川左布政使西津沈公墓誌銘

嘉靖己亥冬封宜人張氏卜以十二月七日葬其夫方伯西津公於長涇之先塋公之從弟典膳君升甫預遣從子希周暨其子希臯詣予徵銘希臯撰公事狀甚悉嗚呼予弱冠時與公同就臺試同領鄉薦又同 賜對於大廷自是踐履中外歷弘治正德以迄嘉靖之初復相繼歸休則相知相信

宜莫深於予矣銘何可辭按狀公姓沈氏諱恩字仁甫西津乃其別號先世居嘉禾之楓涇元季時有諱居仁者避兵而遷遂占籍上海之磊塘里居仁子諱德弘是為公之高祖始遷居邑城德弘子諱晟晟子諱環號梅月公之曾祖祖也考諱鉉號松雲翁世德相承隱居不仕松雲翁前室談氏蚤卒繼娶於謝乃生公焉公自少穎敏秀特動止不凡予伯考拙菴中丞公見之矍然曰此子風骨清竒異時名位何減於我許以孫女妻之稍長遊邑庠造詣益深文名欵起按部校業者恒加稱賞遂



額南畿乙卯鄉薦明年丙辰試春官復登上第時年二十有五松雲翁喜甚亟走京師視之朝士羣賀翁笑曰吾家德積累世未嘗有顯者乃今發於吾子吾志願畢矣留月餘竟歸是歲之冬翁寢疾不起計聞京邸公哀號幾絕匍匐南奔抵家寢苦枕塊毀瘁骨立杜門讀禮鄉人罕覲其面終三載猶一日也服闋赴銓拜刑部主事訊鞫明審大司寇以下咸稱其能三載考績 敕贈松雲翁如其官謝氏封太安人又歲餘進貢外郎賢聲益著時太安人祿養京師幾五載矣忽有鄉土之思先公

而返公不勝思慕明年卽援例歸省暨還朝復奉太安人以行會逆瑾竊權紊政羅織縉紳誣公愆於制限勒令解任公歸時環堵蕭然居之晏如閉門掃軌唯肆力於問學自經史以至諸子百家靡不精探熟誦士林推其博洽正德庚午秋八月瑾敗伏法 詔錄諸臣之遭瑾誣黜者於是起公工部員外郎俄轉郎中復改刑部有富僧名古燈者坐法應死厚賄巨璫援之甚力公奮筆成獄時論偉焉尋擢陝西按察副使逾年銓司聞其風力薦改郵延兵備憲度嚴明一道肅然撫按鄧公藍公



聯疏旌之進雲南按察使公既精練法比又掌風紀之司於是懲貪殘雪冤滯風采爲之一新嘗有邊官犯重辟賂結權倖爲求脫死公不爲撓沮執之彌堅侍御唐公龍尤相器重列其風績專牘舉薦遂遷四川右布政使公得堂咨卽單車就道囊無長物人謂有古廉吏之風公素知蜀邊轉餉之艱民尤憚苦至卽議徵折色十分之六歲省浮費約七十餘萬疲困者頓獲蘇息白水篤寇數千哨聚攻劫公適分守其地建策剿平數邑賴以保全辛巳三月轉左使公以任專責重益殫心力凡可

以節財裕民雖怨謗叢集不以爲憚時尚沿逆瑾牟漁之例徵解諸司歲派倍昂其估公按制削汰幾損其半王府及諸權貴每因修建筓宇過邀夫價鎮守中官隨事科擾莫敢誰何公一一裁抑皆不得逞三載間凡節省民財二百餘萬積公帑者四十餘萬迄今蜀人歎頌不忘 詔採大木公綜理有方民不擾而事集督木憲臣陳黎二公旌列勞績 聖上有白金文綺之賜都御史胡公世寧許公庭光相繼撫蜀皆特疏薦揚胡謂公卓爲一時之彥許謂綽有統馭之才指事具績極詞褒贊



聞者咸以爲允時有權勢之家私役官夫過濫又有擅據官舍及乾沒官物以規厚利者公憤其蠹國病民峻加釐革雖萬口稱快而權勢家憾愈深矣遂相與騰謗中傷公嘿然不辨而歸然矜恤民隱不忘于懷有司政令或有未善輒蠶感不寧思所以救正之唯其亮直無黨人亦不以爲忤囊無贏貲而急義樂施篤於宗黨凡族人有不能婚葬與不能贍給者必委曲調卹殆忘其力之不及也冢宰汪公鉉侍御唐公愈賢與公素昧平生每爲海內稱屈者三人公居論首廷議方欲起之而公

不逮矣嗚呼惜哉公負英特之才卓越之識而輔以剛正之氣使究所蘊顯功殊勲非所難致顧以中遭忌沮弗竟厥施迨夫易簣之際貧無以殮乃至稱貸於人行道者聞之莫不咨嗟慨歎爲之扼腕矧吾黨之士哉悲夫公生成化壬辰六月九日卒於嘉靖癸巳九月二十五日享年六十有二平生雅好詩文詩工古選所著有獻餘忠浦雲亭稿藏于家先娶唐氏卽中丞公之孫女初封安人加贈宜人繼娶卽張宜人同郡樂清公之女嗣子希尹尚幼女七長適刑部司務孫黃溪子太學生繼



臣次適按察副使張世祥子庠生寶臣皆唐出次  
適太學生戚海隅子兆陽次適例授千戶喬大康  
子承宗皆側室殷出次室太學生顧東川子從仁  
次贅大理少卿常熟吳虞東子中美皆張出又次  
受九江府照磨劉松山子聘側室許出公未卒時  
聞年友吳虞東有子秀慧聘為贅壻將依以老焉  
及卒虞東遣子承服以成公志越二載族人聚議  
謂公實亢宗昌族而主祀未備何以瞑目九原乃  
推擇公從子希尹為之後君子曰禮也公斯無憾  
矣銘曰 憲使方伯潘臬之長臬專威刑藩主惠  
者職異道同維明維公公克兼有隨地效忠匪躬  
殉職豈容枉尺彼讒不仁中以蠱螫孰使其然未  
定之天表表風節疇能泯焉

旌德知縣懶樵孫公墓誌銘

浙之平湖有隱君子曰懶樵孫公其諱某其字某  
其行義修於家而化于其鄉鄉之人每愛而師尊  
之歲已巳公年七十有八矣嬰疾弗起數百里之  
內辨香而赴者踵相接也時其子吉甫以監察御  
史稽儲兩廣聞訃駭哭如不欲生將匍匐以歸或  
曰士之所遭在君君重在親親重今將君命以有



事其可不終吉甫勉從之既而奉公事狀屬銘壙石錫雖未識懶樵然交於吉甫義不得辭按狀孫世爲汴人隨宋南渡迺家海鹽其判而爲平湖之族亦數世矣迄曾大父子文族日蕃以熾大父彥忠斥貲佐邊費詔旌義門且加慰勞焉父翼母馬氏處鄉黨有惠愛及生公秀拔穎異咸謂天之報善果不誣哉孫氏之慶未艾也比少長通葩經及戴禮宗人有爲御史者善藻鑒來自燭湖子弟進見者數輩莫能當其意及見公欣然曰其亢吾宗者乎弱冠有司以萬石長起之公不以爲薄值歲

侵公府誅求無藝公捐所蓄以應費不及民成化初海溢墊溺田廬民皆失業州郡觀望莫敢以爲言公力請得減稅之半浙西數郡賴以不困女弟有孤女方呱呱襁褓中煢然無依躬持以歸購里媪乳之及笄爲治裝擇所歸逾於所生嘗有寓客某得危疾迎名醫療之百方疾遂愈迨其行贖餽甚厚由是義聲騰起吳越間會朝廷懸賞格以勸義公獻粟數千不願章服曰趨君父之急固庶人義也敢以爲功守令敦諭者再卒讓不受士論愈高之後吉甫登進士令于旌德供費悉資于家聞



諸孫有能操觚者輒示楮穎遺之曰毋以爲小物而費官也吉甫竟以清節偉行稱部使者采以聞弘治甲子詔封公旌德令吉甫尋擢居內臺明年今上御極推恩公得服御史之服然不以貴自居雖村翁田父必從容相勞苦與之驩如也族子有不率教者公憤之營本源亭于壠次歲時祭享則合其族人而申規勸焉先是未五十時築壽藏有西飛白日如過客北望青山是樂丘之句及將卒預命治歛服葬具洋洋如平時精爽不眩識者以爲達生知命不減古人至四月十有八日竟卒遡

其生則宣德壬子六月十日也配沈氏淑懿有禮內外具宜先公十有五年卒贈孺人子男二長達娶姜氏陸氏皆先卒次卽吉甫名迪持憲有聲娶潘氏封孺人女二長適某次適其孫男六綬紱維獻岳牧曾孫男五孫女二尚幼公少有志用世旣付之吉甫遂與世相忘日唯詩篇書卷爲伍而已湖山勝致題品殆徧詩家以爲有虞揭之風焉所著獨峰樵唱集四卷遺後錄一卷藏于家將以庚午歲十二月某日與沈孺人合窆于大易鄉擊壤里從卜吉也乃爲之銘曰 世德綿綿汴啓其先



時移事改家隨國遷營殖必競亟走多顛規旋矩  
武我道則然廣播勤藝以冀于天交手相付券而  
取焉鑿鼻孔艱孰得其全公既有子而復有年澤  
流祉委如彼源泉謂有不徵視我曾玄嗚呼百世  
之積千載之傳

朱母張氏墓誌銘

敕封孺人張氏故清江提舉封御史玉洲朱先生  
之賢配也先生蚤擅才名韓篇杜筆獨步一時錦  
少同庠校知仰重焉且辛酸嗜合契誼深密以是  
錦之長子葵獲娶先生之女而孺人閨儀壹德聞

之甚悉茲孺人之葬也其季子蟾備列行實泣請  
墓銘質之往時所聞無一語侈誕實應銘法乃因  
其所列而經緯焉孺人出海邑望族高曾咸有德  
譽祖士謙司賦稱平富而能仁者也父經以餉邊  
功授散官耽義樂施鄉人懷之孺人幼有令質孝  
謹明慧言動循矩姻黨嗟異不但父母鍾愛而已  
時玉洲甫成童博綜典籍藻思泉涌諸老儒見之  
閣筆厥考南昌同知蔡軒公大奇之慎選佳配聞  
孺人之賢也促行媒焉散官君喜得才壻一請而  
諾未筭喪父哀號之聲人不忍聞里中有孝女之



稱及歸玉洲事舅姑嚮曲承順善成其歡膳羞縫浣必自手出或憂其煩勞孺人曰此吾舅姑口體所御可諉之他人乎歲時蒸嘗躬事滌濯亦不以役媵御也處娣姒和巽含容未嘗乖忤舅姑深以得婦自慶居亡何南昌公暴疾不起孺人震駭哀悼幾至殞絕姑何宜人衰老齒弱孺人日羞肉糜進之食未竟不敢退既而何宜人得危疾扶掖盥哺烹調藥餌晝夜無少懈於是里中又稱孝婦焉玉洲名滿四方遠近學者登門執經問字戶外之履恒滿故家政一委孺人凡錢帛之記注米薪之

劑量宗戚之慶唁問遺處之秩如也玉洲廣交游賓客款門無虛日飭治觴俎必適玉洲之心至於施糶賑乏急人之危所以佐玉洲於義者恒脫簪珥繼之不遺餘力膝前五男子其一孽也教字如一仲子豹登丁丑進士兩宰劇邑奉孺人訓以茂績聞尋擢監察御史於是孺人有今封然服用約素不自高顯雖巷妻里媪必與之抗禮推食解衣略無厭怠撫諸子婦慈愛甚篤諸婦化之雍穆無間咸有孺人之風焉推誠妾媵視之若女其御婢僕則恩不弛義內外截截肅如公庭凡娶嫁五婦



二女營舅姑暨玉洲三喪豐殺中禮無纖髮遺憾  
孺人綜贊之功其可誣耶晚得肺疾繼有仲子之  
哀遂以增劇諸子屢延名醫弗能廖矣將革呼諸  
子至榻前諄諄以先前善後爲屬言畢而瞑時嘉  
靖癸巳之三月二十二日也距生天順癸未五月  
十有九日享年七十有一長男鯉先卒八載矣娶  
張氏次郎豹福州府知府先兩月卒娶沈氏繼蔡  
氏皆封孺人次龍娶趙氏次卽蟾國子生娶談氏  
皆孺人出又次獬亦先卒娶殷氏側室王氏出女  
二長適唐壑國子生選入內閣誥敕房次適陸時

伊孫男四長宗卿庠生娶戚氏次宏卿聘王氏察  
卿聘唐氏一尚幼孫女五長適謝深次適庠生董  
實大次適喬承慈次納秦鉅聘又次納顧從義聘  
曾孫男一衍孫曾孫女一諸子筮葬日得乙未歲  
之孟冬十八日丙午吉乃奉孺人柩合之玉洲先  
生墓焉嗚呼孺人純德懿行可爲女師可爲世範  
雖詩書所稱殆無以過則夫榮秩高齡令名蕃胤  
孰非所自致耶此可以窺天道矣銘曰婦王閨  
闕德惟恒貞彼剛而忌乃索之微荷嗟孺人實涵  
衆美孝慈淑均不妄愠喜夫享高名允維相之子



優仕學縻母之遺德必有鄰善亦有報翟翁華巔  
龍蟠紫誥家庭雍雍餘慶攸鍾發祥委祉其來曷  
窮

龍江集卷之八



龍江集卷之九

墓誌銘

顧景高先生暨配王秦二孺人墓誌銘

維昔景高先生顧君之葬也在正德庚午之春厥配秦孺人命營雙壙閱四十載爲嘉靖己酉孺人乃卒明年庚戌其孤名儒名世上於臘月廿六日奉孺人柩權厝洋涇祖塋之側須吉納壙以祔君焉先期具事狀詣錦請銘錦與君少同硯席雅相善且世有婣誼銘何可辭按狀君諱嶽景高乃其

雲間 唐錦 士綱





字也顧自東晉時姓著吳中元季兵亂君之五世  
祖仲實公始遷海上留伯子子富於崑守先壠焉  
其二季子曰子貴子榮子華者實從以來子貴於  
君為高祖曰文彬曰綱則曾祖祖也考懷松翁諱  
瑜慷慨有志節實允顧宗妣張孺人君自少不習  
兒弄淳謹如成人弱冠受經於玉洲朱先生刻志  
苦心在諸生中獨承器許其奉親夙夜寅恭色養  
無違事伯叔及處羣從咸曲致恩禮庭無間言時  
家苦繁役懷松翁疲於奔命君嘆曰人子當服勞  
以寧親顧牽於浮名耶即屏鉛槧悉力門戶懷松

賴以稍舒既而邑中疏大姓輸貢京師懷松與焉  
頗以衰暮憚行君奮曰王事父事均我職也毅然  
請代一時同行之家多以縱玩敗產唯君恪慎守  
繩度事克就緒而家亦安堵懷松心獨喜時時稱  
之於人前此有從父生子三日子之母亡懷松為  
乳抱之獲生長名曰嵩有父道焉而君未始以自  
多也然性澹泊無他嗜好唯植德藝善恒恐不及  
鄉稱長者初娶王氏太平守易齋公女生子曰名  
臣王早卒再娶秦氏即孺人也諱淑英父晉母陳  
並東海鉅族孺人貞淑明慧父授以經史能通其



大義歸君時纔十有七入門而家人相賀舅姑稱  
孝膳羞非手調不敢以進時名臣方孩提孺人亦  
連育子撫鞠顧復如鳴鳩均一雖近戚不知其異  
出也君深以得賢助自慶庚午三月君得危疾再  
旬而革孺人攜諸孤環泣君謂生死常理無足深  
痛唯能奉尊恤孤保持門戶吾瞑目矣孺人聞言  
大慟屢至殞絕勺水不入口者數日舅姑憂駭不  
知所爲泣諭之曰忍忘而夫垂瞑之託乎吾老疇  
依幼孤疇託今日之事從死易不死難耳孺人與  
諸孤皆雨泣久之稍稍進饘粥勉就襄事憾容慘

貌見者惻楚懷松素豪爽老尤厭事悉以家政畀  
孺人安享孝養忘其老焉謝世之日呼孺人謝曰  
吾晚景暢適絜爾之力且託孤得人死不朽矣無  
幾張孺人亦卒二喪相繼自含歛以至窆窆皆孺  
人經理無弗整辦時幼孤冥如戶外事若風雨驟  
至凌撼不可支孺人外攘內葺業以復振論者謂  
垂危之祚實孺人再造焉訓飾諸孤嚴甚雖衣食  
細瑣必隨事致誨疾痛輒憂惶罔措語人曰未亡  
人未卽死者以諸孤未成耳方數歲卽遣就學師  
友必一時名勝孺人殷勤館穀不憚勞費躬率女



婢日劬女紅爲薪水之資或脫簪珥以佐束脩諸子言動小失雖暮夜必召至榻前反覆詰責凜然如嚴師以是名儒名世克自砥礪學行表表有盛名士林擬諸郊祁云嘉靖戊子名儒登應天鄉薦孺人喜曰吾得藉手下見先夫矣明年名世選補弟子員屢魁臺試孺人益喜遂謝家政日唯茹素誦經而已然其儉素出於天性不喜錦繡金珠之飾雖澣濯之衣亦再紉再綴示諸子婦曰吾服此五十年矣其自奉涼非如此至承賓祭必豐潔誠敬不敢委諸人也處妯娌媵戚及御奴僕豐約等

差舉中於義九族式焉出母陳氏繼母楊氏並老病卑貧孺人迎致於家爲之生養死葬聞者感歎傳爲美談戊申秋孺人嬰疾醫療百方綿歷冬春竟不治時二月之十日也垂絕猶呼諸子勗以忠孝大節侃侃數言皆烈士夫所不及也嗚呼賢哉是歲有司上孺人貞節於按御史御史具疏以聞恩命旦夕當下孺人雖不及見其亦少慰於九原矣乎君生於成化丙申二月六日年始三十有五嘗以例拜副千戶非其好也孺人生於壬寅五月廿又七日享年六十有七子男三卽名臣名儒名



世也名臣娶陸氏名儒娶李氏憲副南原公女繼  
袁氏名世娶郝氏繼張氏女二長適張操次受鄉  
貢士喬誥聘未婚而卒孫男三曰問娶陸氏曰闕  
娶李氏曰聞尚幼孫女八曾孫一嗚呼君與孺人  
並有茂德偉節所以培植於冥冥者甚厚則夫陰  
鑒而默相之者諒不可誣而君乃不年弗獲少試  
於時孺人亦未及大享豈非天固蓄之將大發於  
其後人耶爲之銘曰 顧望於吳肇自典午支于  
海邦由仲實甫仍孫象賢涵泳藝淵幹父用譽學  
以中捐天啓顧宗錫之良偶儆戒相成實維益友  
貌茲遺孤育之成之功存再造奚啻父師聯翩鳳  
毛覽輝已兆煌煌寵褒天子有詔霞光雲彩蔭茲  
斧封有萬其古流慶曷窮

誥贈宜人喬氏墓誌銘

嘉靖壬子春太學生董子宜陽纂述所聞爲其前  
妣喬宜人請製墓銘宜人者予同年大理少卿中  
岡先生之元配也卒後十有三載而宜陽始生時  
宜人音容消寂久矣若無所繫情焉而宜陽體念  
先志爲圖不朽雖古之純孝何以加諸矧予忝通  
家其敢以不文爲辭耶按狀喬目前代爲海邑著



姓宜人之曾祖諱彥衡 高皇帝時歷鴻臚序班  
遼府紀善祖諱鎮以醫學顯名父諱紀卒時宜人  
尚幼遂育于伯兄醫學訓科豫中岡之尊翁侍御  
公雅與相善且聞其女弟賢因爲仲子委禽焉卽  
中岡也侍御公謝性方嚴家規肅如宜人執婦禮  
甚謹得其懽心侍御公歿歷宦途命冢子婦攝家  
政時妯娌群居不能無異同宜人調停其間卒無  
間言人以爲難及侍御公謝世中岡尚蹇滯庠校  
無遑屑屑治生家頗落久之獲舉丙午鄉試而一  
火無遺尤覺蕭然宜人不少動懷唯加意儉勤拮

据綴葺以佐匱乏而已中岡再試南宮試輒北弘  
治壬子乃謀卒業京師携宜人以行越四載丙辰  
遂登上第宜人無驕志無矜容漠然若不知今昔  
之有異也戊午春中岡拜冬官主事分司徐州洪  
宜人隨任時已厲疾舟至河西務疾轉劇是夕中  
岡方就寢恍若見宜人云金蟬脫殼驚起視之目  
已瞑矣宜人素喜閱浮屠書若得悟者故歸化時  
其異若此他如孝經史傳皆所通解尤工筆札嘗  
爲太宜人寫古文一卷仁後太宜人每展卷輒悲  
泣不忍觀云距生景泰癸酉享年四十有六初命



贈安人再贈宜人人生二子繼顯繼美皆天女四人散官談斗蘭州同知朱平濟寧州判官趙應元其婿也其一未嫁卒繼宜人者唐氏實生宜陽文行偉卓將益昌中岡未究之業一時士論僉謂中岡三且不亡宜人無子而有子矣詎不信然哉宜陽泣謂予曰疇昔過庭時每聞先公道前宜人事輒慘沮不忍竟其辭時唯趙氏姊存詢之亦然故所聞僅此嗚呼據所述是爲宜人不朽矣而又奚疑乃爲之銘曰 振衰持盈弗震弗矜洞觀倚伏式謹恒貞天監孔邇卒復其始贊相轉旋厥有攸自

既獲乎天而胡弗延人亦有云至壽匪年矧茲賢胤永懷令聞表播遺芳千載爲近

素菴陸公孺人張氏合葬墓誌銘

素菴先生陸公卒于嘉靖甲申正月六日春秋五十有七越二十餘載爲乙巳歲之八月二日其配張孺人亦卒春秋七十有八蓋同生於成化戊子云孺人之卒也其孤標悲哀致毀沉痾不起遺言以弗獲葬母爲恨標之子曠炫輩方斬然縗經中謂父命不可緩也乃以丁未歲之季冬十有二日奉孺人柩權厝長溪塋側諏日啓素菴之封而合



馬預奉晉明姚先生狀問銘于予晉明端士言不  
妄發謹據而書之惟陸氏遠有代序其居華亭馬  
橋鎮諱子順者公之四世祖也曾祖諱德衡家事  
中落乃遷居上海黃浦東之洋涇遂占藉焉祖諱  
璿號筠松德義表表爲鄉邦之望沒後以仲孫文  
裕公深貴贈通議大夫詹事兼翰林學士祖妣贈  
淑人尤氏生五丈夫子其季子號月蓬者公之考  
也妣奚氏學生二男長准字宗澤次卽素菴公諱  
浙字宗溥生有奇質孝友天至自少苦志績學讀  
書至丙夜不休爲文耻事浮靡典雅明潔深得聖

賢微旨弱冠選補博士弟子臺試恒居優列識者  
許其遠到月蓬樂遠遊久商淮揚間竟卒旅寓公  
悲痛幾殞益奮勵樹立見諸伯叔父皓首霜髯行  
歌桑梓輒嗚咽流涕曰天乎吾父何獨不幸耶與  
宗澤同爨而居相視一體不私貨財豐約共之家  
庭長幼翕然感化人謂張公藝無以過也其宅心  
坦易誠慤終日端坐未嘗有疾聲厲色親之者如  
飲醇曝暄和溫可掬喜談古人言行以寓鑒戒後  
輩莫不竦聽經史之外無他嗜好紛華勢利尤所  
厭鄙從弟文裕公居翰苑有盛名駸駸大用門閥



赫奕公漠然如不知搗冲澹約與寒素士不異徘徊庠校幾四十載雖屢試場屋未獲一薦而當道論德考行必推爲首冠然則公之所以取重於世者豈藉瑣瑣一第哉張孺人同邑友松處士之長女端淑巽順壺德克備月蓬翁旣久商于外而素菴復專志學業家蠱紛全悉孺人贊畫迎見立解靡不曲當平居接物色怡氣平惟恐傷之享廟奉賓必豐必潔至於自奉乃極簡薄然遇媼黨窘乏則欣然出奩中物賙之無靳端有葛覃鷄鳴之風焉文裕公嘗言張嫂賢孝天必報以賢子後育太

學生標孝謹淳篤人謂有天道云子男一卽標娶張氏練川東溪君女女二長適庠生張挺刑部主事虹溪之子次適陳道奉化主簿簡齋之子孫男三曠庠生娶孫女炫聘順天通判文洲孫女少子郊育於文裕公之子思豫君與以兆嗣孫女三一適太學生喬維翰一則子爲仲孫繼陞聘焉一尚幼嗚呼昔歐陽子有云爲善無不報而遲速有時予觀陸氏之所積累其來甚遠前之所積者旣已顯發於文裕公矣後之所積將必有時而發譬猶雲旣滃而靈雨必降氣旣至而候虫必鳴公之後



人異時豈無鍾瑞衍澤以迓續寵休者乎爲之銘  
以俟之銘曰 陸望于吳代有名德德聲善韻如  
奏金石集慶發祥青宮玉堂公宗烜赫公安其常  
益禔其身益懋于學十試弗逢一志彌恪壺相克  
良伯鸞孟光愈封愈培愈引愈長長溪澄碧永護  
雙壁寶氣鬱永揚輝無極

工部司務士謙唐公墓誌銘

予兄士謙以弘治甲子季冬十有一日卒于家時  
予承乏東明未知也明年乙丑春三月始克聞訃  
不覺駭哭失聲嗟爲位望祭之獨以不能撫柩一

慟爲恨居歲餘家君書諭曰汝兄修禮樂善宜食  
厚報而壽不究於高年位不際於華顯吾哀之惜  
之然恐其死而遂泯泯也將托石以垂不朽小子  
錦其圖之噫錦何忍銘吾兄然有父命不敢不銘  
也公諱銳士謙其字故靈石文獻家洪武初祖諱  
英者監稅烏溪及受代以去遂留子文祥占籍上  
海於公爲高祖也再傳而祖考衢州知府容軒府  
君累仁飭行族日大以蕃繼而伯考拙菴府君以  
進士起家至都御史家君拜金山衛使文武階聯  
三品鄉黨榮之公少淳雅謝去統綺之習苦志問



學有雋聲弱冠充弟子員校業恒居優等侍母徐夫人疾且再稔朝夕左右殆忘寢食至徒跣迎醫數百里外趾爲之裂弗顧後徐夫人漸殆以死公毀悴骨立見者憐之旣葬廬墓所哀號不絕於是孝聲隱隱動里閭間服闋累試有司不合會有以公工楷書將薦之者公嘆曰吾才豈不若人而試輒敗北謂非命耶且古人隨遇致身要使志行無媿耳豈必科舉哉乃挺身從之 憲宗純皇帝以爲能命待詔仁智殿尋拜工部司務幾二載循例歸省時家君年漸高公專意色養絕意功業矣事

繼母趙夫人能盡孝敬趙夫人愛之逾於所生家庭之間雍雍也處諸弟尤極友愛歲乙卯予忝領鄉薦公操舟抵金陵視之內辰叨甲第公觸暑走京師訓以居官律已之道言猶歷歷在耳顧予庸劣無似竒迹鷓枝將何以爲兄報耶公平生樂恬嗜簡與物無競交友必盡其誠雖有以詐應者亦不較也別墅植木奴千頭故又以橘庄爲號方徜徉泉石娛親教子而大故及矣嗚呼哀哉公生於正統己巳三月十有九日享年僅五十有六耳善而弗壽予於是益歎夫天者之難必也娶山氏理



家有法妾郁氏宋氏子男四長數娶大行郁君希正之姪次穆次敷後公歲餘天次歆女三長適汀州知府陸公之孫軒次適顧棟次適顧冕俱庠生孫男一繼恩尚幼將以丁卯正月十日葬于徐夫人墓之側從上古也銘曰 穹山深淵兮舞蛟躍虎名宗世閥兮英賢之府東吳衣冠兮唐以甲稱委社于公兮委質僕僕翱翔文苑兮遭數之奇遂隊而登兮慙爲噲伍翩然來歸兮萊斑舞庭脫屣軒裳兮厥志孔武施而未獲兮真宰何私收效於後兮繩繩莫數泣望新阡兮統紼無由遠將心淚

兮漬綿墳土

士重唐君墓誌銘

予兄士重既卒之明年家君爲營葬事舉紼有日然卞璞未售厥美弗彰錦恐其遂將漚滅漸盡而無聞也私竊悲之昔子由銘其兄東坡之墓君子不以爲僭因含哀撰次以勒諸墓門之石庶其有可恃以不朽云君諱鎰士重其字也先爲晉陽人洪武初高祖監稅于上海因家焉大父容軒府君以先伯中丞公貴封衢州知府家君成化間拜金山衛使不樂於官尋抗疏以休而孺人張氏則君



之生母也君幼穎敏絕倫六歲能屬對聞出奇語  
族黨異之咸謂且元吾宗既長工舉子業知名於  
部使者召充邑庠弟子員每就試筆勢駛疾若懸  
江河儕輩望風而避莫敢與爲敵時場屋文字以  
剽竊爲富以纖綺爲妍君力洗其陋腴澤粹好姿  
態橫生長老之以科目擅聲價者反媿之其於義  
理尤能翻研精繹不蹈襲故常必以己意所到爲  
是自謂高科顯第可執契而取也壬子應鄉試不  
利乙卯戊午再試再北識者以君爲屈辛酉槐期  
方逼而疾已革矣絕塵之足蹶于中途嗚呼惜哉

夫非材不良非時不用而二子者不能待夫時豪  
傑之士往往憤恨慨激欲歸其咎於天以君之才  
而困鬱偃蹇卒窮以死謂非造物者之罪乎其平  
居頗負氣自信不爲利撓勢懼每談論風采逸發  
諤諤不阿能使貴者色沮佞者魄褫然剛褊少容  
觸物輒弦急霆震故與世多迕忌嫉者恒屛半焉  
不旋踵已春融冰釋煦然相忘無絲髮凝蓄始之  
嫉而忌者或反翕然悅以服矣夫豈血氣爲之使  
哉孟軻氏有云我善養吾浩然之氣欲知君者其  
於此求之君生於天順壬午七月七日卒於弘治



辛酉七月之晦享年四十配陸氏先卒繼謝氏次  
王氏子男五徽徹旻致重壽女三長嫁士族周盛  
時餘皆幼以十二月庚申厝于廟涇先壠之側嗚  
呼士方齟齬未遇時固無以自異於庸人幸而都  
顯位建事功重勲累爵史不勝書者滔滔皆是也  
予兄勞形竭志於場屋間幾二十年勤苦不怠震  
耀通顯豈其所難哉不幸而終不能沾升斗之祿  
樹尺寸之功使操筆者遂無以紀此錦之所爲吞  
聲扼腕而繼之以慟也嗚呼悲夫銘曰 孰畀其  
材孰使其窮浩然之氣集義所充廣步高視莫敢  
彌鋒孰不震顯而君不逢孰不壽考獨迎其凶豈  
堅則驟折而剛者難容嗚呼已矣是宜作銘以壽  
于幽宮

唐孺人徐氏墓誌銘

孺人徐氏予先兄徵仕郎浙江布政司都事恕齋  
府君之次室姪太學生袞之母也祖某父某世居  
東海之濱以耕織爲業孺人生有令質淑慧閑婉  
父母愛異焉及笄而歸恕齋府君事府君暨嫡余  
孺人祇慎迎承克有順德恒佐余孺人供蒸嘗具  
賓饌必潔必豐罔敢怠忽余孺人彌愛之中饋之



事一以相委豐約隆殺允協情理雖脯鹽菓菘之細處之靡不適宜族之談內職者歸焉連產三子皆天一女適士族最後得袞孱弱多疾孺人抱持保護不離于懷嫡母余孺人三子三女皆長於袞而愛袞唯均袞年十四余孺人卒踰年府君亦卒袞既幼且孤筑筑在疚家事悉總於孺人時強奴黥僕或相凌忽孺人不以介懷內則躬率羣婢紡績不輟外則分委童僕耕藝唯時一錢尺帛率手操心記而節縮之以是業用不墜為袞聘延名師則豐其幣餼無所靳惜策勵誦習每至夜分慈而

不縱蓋兼有父道焉府君無恙時為袞聘王氏石溪別駕之女也至是袞長當娶巨細無備獨力營辦奉迎于妣太安人于堂凡婚禮所須咨稟而行無弗中度人稱知禮後袞學業日進臺試優等薦送應試選入庠校每與儕友結文會聚講孺人喜溢顏面日為擊鮮治具罔有怠容嘉靖乙未例許庠校士進補國學孺人謂袞曰吾聞成均四海英才所萃汝宜際此恩例以廣見聞毋蹙蹙局此恐負汝先君之志矣力雖不逮吾當為汝勉圖之及袞登國學往來兩都凡家費行資悉出孺人經



畫衮弗與知仰成而已衮獲志顯業就騫騰可異  
孺人之功也初衮既娶父未有子孺人命衮夫婦  
抱予幼孫繼勳爲子予長子中書壻之第四子也  
未幾衮連舉二子曰繼賢曰繼 孺人喜甚謂繼  
勳若爲之兆云嘉靖壬寅歲孺人遘疾頗危衮徧  
延名醫療治百端沉綿久之忽加眩掉格塞遂成  
不治垂絕猶計慮家事疊疊不絕口神爽如平時  
復抱衮泣曰汝孽子宜堅忍力學毋隕厥志吾將  
持此以報汝先君於地下矣言畢嗚咽而逝是歲  
之五月廿又三日也距生成化乙巳三月七日享

年五十有八嗚呼孺人爲衮立家則極拮据之勞  
欲衮志學則任督勵之勞幸皆有成矣然勞而弗  
享此衮之所以銜痛入骨悲號悽惻而不能自己  
也茲衮卜以乙巳歲之某月某日祔孺人於恕齋  
府君之墓先期具事狀詣予拜且泣曰內言不出  
唯吾母處家訓子之詳非吾季父其孰知之衮既  
未能顯揚吾母以報罔極而又不圖所以明著母  
德則不明不孝罪惡滋深其何顏以偷生於天壤  
間乎唯吾季父哀而賜銘以紓衮痛以塞衮無涯  
之悲焉予哀其志不忍辭也乃爲之銘銘曰 易



唐前漢書卷之六  
稱家人女治乎內禮著內則厥義斯備維孺人賢  
內職克虔服勤服勤以酬所天旣贊乃家復才其  
子昌祚發祥異復其始有美玄堂廟涇之旁尚百  
千年永固其藏

亡姪世學唐君墓誌銘

嗚呼吾姪世學乃遽至於斯耶夫耳順之年亦足  
云壽然以世學君之孝友博愛耽義樂善則天之  
所以報世學者宜不止此豈非死生定數誠有莫  
得而逃者耶嗚呼悲哉君諱敷世學其字別號雲  
東先考刑部郎中質菴府君之長孫先兄工部司

務橘庄府君之冢嗣也自少儻爽異卓有立志  
少予三載羈中時與予同就外傳挾策相隨若昆  
季然稍長益通敏解事殊有老成之風時橘庄府  
君暨諸叔皆從事宦學刑部府君或委以家政凡  
所料理悉犁然當於人心刑部府君鍾愛之未幾  
橘庄謝世君泣血悲哀自屬續以至終喪無一違  
禮事母山孺人怡顏順志曲盡愛敬鄉黨稱孝焉  
時兩弟稷敵皆幼君延師訓誨甚有恩義稷遂以  
文學知名登壬午京闈鄉薦捷音至君躍然喜曰  
異時可藉此以見吾父地下矣君雖簪纓世家而



自奉儉約居常布素與白屋士不殊然敦重友誼  
賓朋至未嘗不款留必極豐腆告以匱乏輒傾囊  
不靳蓋終其身無變也奉化庠生嚴君嘗館君家  
忽遘危疾君迎醫致禱不遺餘力及卒躬為棺斂  
復厚賻歸其喪且時時附致以贍其家人尤以為  
難其拯卹危窘如此類甚衆蒙德者不獨一嚴君  
也嘉靖丁酉春二月偶為風襲噤不能語諸子延  
醫療治久之始能言至六月六日疾復作屢更醫  
不能奏功竟以廿又七日卒于正寢鄉閭聞訃匍  
匐赴哭者纍纍而至數日不絕於此亦可以見君

之平生矣君生成化戊戌二月二十三日享年六  
十初娶郁氏潮州郡守直齋公之兄女靜專孝謹  
女德純備賢而不壽予嘗銘以哀之繼娶吳氏太  
僕卿吳公之裔孫均慈淑慧克相其夫生於弘治  
庚戌五月十有四日卒於嘉靖癸巳正月四日享  
年四十有四子男三長繼恩郁出由邑庠生登于  
太學累試場屋娶贈兵部主事簡軒張公之孫女  
次繼芳習舉子業今策名太學娶名族陳氏又次  
繼志初聘貴州副憲南原李公之女卒繼聘鴻臚  
寺丞吳公之女一女適庠生孫應奎皆吳出孫男



五國華國章國許國瑞國本孫女三長納福州郡  
守青岡朱公之子察卿聘餘尚幼諸子以君卒之  
又明年己亥仲冬四日丁酉奉柩攢厝于廟涇北  
原祖壠之側俟吉窆焉予爲之銘曰 顯顯華族  
不炫綺縟夔夔孝恭鄉閭所宗好施樂濟所急者  
義安分守身允保其真厥培旣渥遺祐斯篤視厥  
後人何其振振書香奕世雖死不逝祖兮父兮茲  
焉永依

亡姪世載夫婦合葬墓誌銘

吾唐氏遠有代序雖蔓衍四方而皆以晉昌爲所  
自出其居霍州之靈石者尤晉昌之近派也 國  
初大使府君自靈石來爲上海稅官長子贅於縣  
主簿李從吉氏因著籍爲上海人再傳爲吾祖封  
衢州知府容軒府君衢州生先考質庵府君封刑  
部郎中鴻德駿望大江以南所同尊而共慕焉其  
第四子恕齋府君諱錚浙江布政司都事予之兄  
也文學行誼冠冕士林配余孺人賢明慈孝婦德  
備焉都事府君四子文爲之長世載乃其字也天  
性謹厚而明達過人雖貴宦家絕無統綺之態刑  
部府君雅鍾愛之稍長習舉子業能自刻厲屢更



名師業有端緒尋選入邑庠遂升太學博覽勤誦  
期與天下造士角藝較能以自表見會都事府君  
歷事南都因留佐家政初疑其少未練習然劑量  
經畫無不脗合時宜僮僕慎戢堂室潔清至於度  
置器物亦必各有規式衆乃異之以爲能家後余  
孺人久疾世載內候安否親湯藥外侍都事府君  
承咨詢奉溫清矻矻終日未嘗告勤人又以爲能  
子子繼科漸長卽以所業經授之且誠之曰此吾  
唐氏所世守也汝業之無怠必期於成庶無忝先  
世耳旦夕程律恩不弛義則又以爲能父及父母

襄事訖益務砥礪奮然欲發舒蘊負効用於時而  
大故及矣嗚呼惜哉時嘉靖癸巳之季冬十二日  
也距生弘治戊申三月十二日年四十有六娶同  
邑姚氏太學生淮之女嚴重端慤不妄笑怒平生  
無僞言飭行閫中鉅細疾徐處之當理舅姑以下  
咸稱之後爲主母獨總家政年踰四十未嘗輕降  
堂序僕御罕得見其面也夫卒之明年六月十九  
日忽得風眩疾不能言逾日亦卒其生成化丁未  
十月廿又一日年四十有八子男一卽繼科娶王  
氏女一適庠生郁恪孫男二長國英聘顧氏次國



秀孫女一尚幼繼科卜以嘉靖乙未歲之蜡月十有六日合窆二柩於廟涇祖壠之側先期請予泣拜請題墓隧之石嗚呼志鬱而弗伸才闕而弗試自古豪傑之士恒以之扼腕而長嗟豈獨世載抱斯憾哉雖然善祥德慶不干其身必于子孫世載宜以此瞑目矣銘曰 不辱以承其先不享以畀諸後源遠流長匪壽而壽全哉同歸夫夫婦婦奠茲玄堂其寧其久

亡兒唐儼墓誌銘

嗚呼此龍江居士唐錦士網葬其仲子儼之墓錦

志行不穀多獲戾於神明故天降酷虐以顯示殛罰而遂以累吾子也嗚呼痛其甚耶先是丙辰歲予以進士竊祿于朝明年丁巳春三月十有一日生仲子於城西僦舍請名於家君以予登第而得也命曰重恩六歲就里學始更今名兒生有奇相京師王相士者術妙天下予召使視之驚曰是兒河爲目海爲口方面潤輔風神秀朗天庭聳而玄珠朝海法當魁天下又驗之日亦云巳年得辰月與時蛇爲龍之象言與相者符予亦以其姿稟之異也信之不疑又明年予謁告歸省乃携以南見



者嘖嘖咸謂唐氏後且益大然孝愛出於天性警  
慧不類常兒四五歲卽嗜讀書口授不數過輒默  
誦如流嘗病痢告其乳者曰勿使吾母知之必  
阻吾學且疑重寡言對賓客終日端坐無怠容揖  
讓周旋動有禮度老成人不能過也壬戌十二月  
疹後得疾竟以十有四日死嗚呼天果不欲昌吾  
唐氏耶何不使吾兒少延以掀播其奇偉於天下  
也祥麟威鳳家國之寶相奪之速何以爲情予與  
妻陸氏哭之傷心拊膺幾絕越九日乃葬于廟涇  
先壠之傍遂銜哀濡血以誌諸石銘曰 曷從而

生曷從而死神駒來西跬步千里遭途嶮巖數武  
而止魂氣何之骨肉在此於千萬年其永無圯

季子重壽權厝誌銘

予有季子曰重壽以弘治甲子八月廿有六日生  
於家時予待次京師未知也十月予乃有東明之  
命明年乙丑春三月季子隨其母至東明肌肉  
玉雪眉目如畫摘眼爲之心醉家君亦以書來曰  
是兒風骨英特門祚有托矣其善撫之予佩服之  
唯謹逾數月竟以不習水土痞發於脇療之百方  
莫能神迄正德丙寅四月十有八日乃死嗚呼予



將何以復命於家君耶予少寡宦情自丙辰登第  
後侍親九載志固安焉何乃不自貴重隨時躁出  
遂至訕辱惡土以累吾子而東明之政又復怠荒  
悖繆招罰於天以流禍至此上慙命於父下媿累  
於子予亦何用生爲也越三日巳亥權殯于城南  
風雲壇左俟予歸與之俱焉灑血書石用告知我  
哀者俾勿壞銘曰 氏爲唐字爲壽質清潤金莫  
購性靈竒期肯構水土災事乃繆殯城南石以侑  
渺雲山痼而疚

龍江集卷之九



龍江集卷之十

雲間 唐錦 士綱

墓誌銘

亡女天水郡宗婦墓誌銘

嗚呼吾女賢孝慧淑莊貞靜默在理宜壽也顧天以死事舛恒道痛其可勝言耶吾女以正德丁卯閏正月四日生於東明官舍明年戊辰予被徵入朝遷給事中於兵科尋奉 璽書按事嶺表女隨其母封安人陸氏寓居京師數年予改官留都時先考贈刑部郎中府君暨吾母封太安人趙氏



方具慶予畱陸安人及女侍養于家女孝敬出於天性旦夕定省未嘗爽時刻婉容愉色下氣怡聲凡由禮內則所載事親之道無一歉焉奉親之暇卽扃齋閣事組製端居竟日未嘗一啓齒亦未嘗移趾及闔鄰媪里婦無能識其面者間閱書史得古賢孝事輒用以自勵家人輩有談及齋醮祠禱邪妄不經之事必斥絕之不爲所惑其知識明明雖學士大夫號稱窮理格物者或不能絕之如是嚴也予與陸安人竒愛之爲擇良偶予鄰趙西溪之子國頗秀穎嗜學遂納聘焉又數年予歸自江

右適西溪遘疾且殆恣死懇曰吾父子世爲大宗得見宗婦屬後事死瞑目矣予哀而許之入門數日西溪乃卒實嘉靖甲申之正月也女哭踊如禮祭享勤恪事其姑賈孺人如事其母委曲承順孝敬備至有人所難及者賈孺人甚懼焉愛之踰於其女時西溪初卒家務填委區畫劑量竭力任之內代其姑外相其夫故國得專意學業至於旁接內外之宗嫻下撫童使之衆殆無一人失其意者族黨謂趙氏得賢婦咸動色相慶明年乙酉冬營西溪襄事巨細必躬爲之遂以劬勤得疾集羣醫



療之咸告技窮竟至不治閏十二月四日疾且革猶執予手泣曰壻爲宗子未有嗣且鮮兄弟俟其免父喪亟圖賢淑配之庶延趙氏也語畢而絕年甫十有九耳陸安人以其女兒之子黃氏續焉成其志也今生二子矣嗚呼吾女賢孝過人而不壽且無子悠悠蒼天其將何從致詰耶雖然古人以不朽爲壽吾女失於彼或得之此矣其夫卜以巳丑歲之十一月廿又八日庚申葬於薛涇祖塋之傍予悲不能止乃爲誌而銘之銘曰 唐之孝女趙之孝婦豈惟孝哉四德備有矧孝之尊百行之

首地義天經他善莫偶其推彌廣其及彌厚孰謂若人而弗遐壽彼蒼茫茫理則可扣維壽匪年維德弗朽鏡詞幽墟百靈護守永昭厥聲千載在後

沈孺人唐氏墓誌銘

鄉貢沈進士希臯之母唐孺人先世父大中丞拙菴府君之孫女也父煇雪公諱鏞松江守禦千戶母喬氏封編修宗岳公女中丞府君登景泰辛未進士敷歷三朝致位九列才望勳業赫然名世煇雪公雖承藉華顯而秉禮敦義雅以德稱流慶弗匱人謂有天道云孺人在母姪七月而生甫晬失



恃鞠於庶母黃氏羸弱多疾煮雪公憐之保護甚  
至稍長明慧孝謹不苟言笑誨以女紅輒精絕尤  
厭鄙粧飾殊不類其諸姊煮雪公彌愛焉煮雪公  
僅一子卽今徐聞令牧也以單嗣而孺人又賢欲  
留贅于家協以終老雅與僉揮雲莊沈公契密因  
矚目其季子南耕君遂訂盟焉贅禮旣成煮雪公  
賢之愛之不但半子而已時中丞府君門閥崇熾  
家人頗奢逸獨孺人兢惕自將恒如師保在側凡  
紡績織紉之屬靡不身先諸婢而節約浮費儼若  
寡人子然南耕君剛毅寡合孺人和婉承事瑟琴

甚諧族人以宜家致慶後雲莊公被末疾興居飲  
食非人不能乃迎孺人以歸孺人問安之餘膈膳  
和藥未嘗頃刻離左右舅姑甚懼妯娌侍婢亦皆  
感悅雲莊公嘆曰吾門得此婦吾死無憾矣及雲  
莊公卒內外釁起家事中落孺人拮据萬狀漸還  
於故雲莊正室姚孺人三子皆成立庶子陽陸階  
咸幼遺命各附麗一兄以須其成陸附南耕君孺  
人誨育勤懇同於已出折產授室用成厥家姚孺  
人後雲莊公而卒獨享孺人孝養者二十五載後  
寢疾逾歲孺人調養扶掖不避垢穢姚孺人每向



人談之繼以感泣南耕之從兄西津公自蜀藩左  
轄謝歸苦舊居秋隘而宦橐蕭然無以爲計南耕  
謀於孺人遂以父遺千金棟宇拱手相遜邑人旣  
賢南耕君尤賢孺人云希臯幼業舉子夙有才名  
孺人心竒之而策勵益嚴其延師會友百凡所須  
悉孺人女工所致或脫簪解珥略無靳容長孫幼  
多疾賴孺人撫鞠獲安次孫缺乳骨立僅存喘息  
孺人自鄉庄歸見之大駭亟購乳哺之時以粥糜  
爲助越數月獲更生焉希臯泣曰二孫非吾母無  
復生望矣此恩寧止罔極已耶孺人天性高明雅

有遠識咨以疑事立語可決無不曲盡事理聞者  
竦服暇時與子婦暨諸孫環坐必歷舉古今報應  
及閨儀壺則以相勗勉嘗謂希臯曰我少時聞汝  
外祖云日家推筭多謂壽促唯惜福可延故我百  
事甘從淡薄凡可濟利人者必陰爲之所今幸逾  
五望六乃知心地可以延壽汝宜識之又曰吾觀  
汝異日必有成但產業規模祇宜緊小無效近時  
人侈大徒勞費耳無益也嘉靖癸卯初夏希臯赴  
吳門就提學公臺試南耕君忽遘危疾孺人憂甚  
偶臨圃池覩雙紅旗從空飛颺疑爲不祥秘不敢



言至九月捷音踵門憂疑始釋希臯尋赴會南宮  
甲辰元旦孺人夙興擁爐獨坐淚潸然下家人恠  
而叩之徐嘆曰吾憶吾兒數千里外水陸勞苦耳  
是春希臯還自京師見孺人形體漸羸私竊憂之  
以舊有痰疾時作時止不虞他變也冬十一月孺  
人以稅事至鄉庄一夕忽滯下無度亟乘舟抵家  
疾勢轉劇諸醫瞠視莫能措手希臯計窮撲著得  
坤之彖詞曰西南得朋東北喪朋蓋邑居實在庄  
之東北憂懼益甚至二十日清晨氣喘促奔湧愈  
不可遏垂絕泣語希臯曰汝夫婦已能樹立吾又

見汝登科無復憂矣唯庶弟希閔昔日汝父鑒我  
宗門多從孽輩破壞堅不欲留我與汝同心保養  
今得長成異日汝須好爲安頓無忘吾言吾死瞑  
目矣時將屬續神爽不亂詞色甚暇薛氏姊執手  
與訣因叩其所見孺人曰人止有此氣氣絕則茫  
然去矣安有所謂鬼物哉聞者謂孺人有定見定  
力雖古之有道者何以加諸邈其生弘治戊申十  
二月廿有三日享年五十有七子男二長卽希臯  
登應天鄉薦娶張氏次希閔乃孺人所置孫氏出  
聘湯氏女一適談貞吉孫男三需聘陸懷東季女



霽聘陸思豫養女雯幼未聘孫女二長納張黃川  
季子枋聘次納趙一齋長子世儒聘姪卜嘉靖  
年月 日權厝方溪祖塋之次需吉葬焉希臯  
奉父命具事狀先期詣予徵銘予於煇雪公昆弟  
間尤相友愛故孺人賢行得諸目覩者居多感觸  
往事不覺淚下霑襟希臯之言曰孺人有女婦未  
備之操行而壽不酬德有世人未嘗之勞苦而享  
不遂志有維植中衰之大功而未享人子榮報之  
萬一嗚呼此仁人孝子之心所以憤鬱崩摧至於  
茹芥隕血而不能已也然希臯文學器識屹爲時

望高科華秩當隨踵至矣則夫茂樹勳庸荐膺恩  
寵豈非異時之所必致者哉其所以報孺人而塞  
悲痛者固有在也遂爲之銘曰 沈出嘉禾唐自  
晉陽文賢媲美科第聯芳華閥並峙望于海邦朱  
陳世姻引之愈長懿厥孺人兩族之光孝恭貞淑  
肅雖齊莊關雎麟趾古道未荒葛覃鳴鳩允矣相  
方振衰挽弱駸駸熾昌再造劬勞江海奚量穰穰  
餘慶啓瑞發祥雖啣郎都鳴于朝陽食報伊始奄  
其淪亡仁壽之說乃墮渺茫哀哀夜烏吻血淋浪  
殞宮旣飾隧室斯襄霞光雲彩照耀方將千秋萬



古永賁茲藏

龍江集卷之十

龍江集卷之十

國家圖書館, NATIONAL CENTRAL LIBRARY, TAIWAN, R.O.C.



龍江集卷之十一

墓誌銘

太學生守約陸君墓誌銘

嘉靖丙午秋七月廿又四日太學生陸君望夫卒于正寢明年丁未其孤曠炫等卜以季冬十有三日權厝公柩于長溪先塋之側前期奉庠友姚晉明先生狀詣予泣拜請銘予與君考素菴公有兄弟之義故於君契分甚深其何忍辭君諱標望夫其字別號守約海邑之賢也其世系具予所撰素

雲間 唐錦 士綱





菴公誌中君爲素菴仲子素菴與其兄質菴一乳而生特相友愛質菴初娶沈孺人乃方伯西津公女兄早世無出繼娶王孺人亦無子遂抱君爲嗣極鍾愛之君姿宇偉異雙瞳炯如曙星陸宗咸喜時其從父文裕公以高科列翰苑謂君庶幾繼之未及成童質菴謝世君蹕踊慘怛見者哀之王孺人嫠居倚君爲命君色養十餘年曲盡愛敬克以孝稱後王孺人壽終凡歛葬之屬務極誠信無絲髮遺憾朝夕泣奠恪遵典禮不隨流俗作齋醮士林傳爲美談旣而兄樟弟格相繼夭折族人遂爭

爲後君怡然舉質菴所遺悉推與之而奉質菴夫婦之祀如故適西津公致仕歸親覩其事嘆曰能讓人以產而不讓人以義質菴當含笑九泉矣初質菴之葬沈孺人也祔於浦東洋涇之祖塋然身居浦西頗憚涉浦危險故質菴之亡卜葬浦西長溪之北原及君葬王孺人復自洋涇遷沈柩與質菴共穴用成質菴初志君子曰先意承志孝子之事生也今君事死如事生謂之純孝非耶君刻厲問學日造淵微期奮科第而屢試不售嘉靖丙申文裕公自蜀轄召爲光祿卿君携書往省遂考入



京衛武學尋膺例入監便道過家以母張孺人年  
高彷徨不忍離孺人命之曰成名顯揚孝之大也  
汝乃汲汲於口體之養耶手整行裝促之君請奉  
毋以行孺人允焉居南雍二載履蹈繩矩不失尺  
寸大司成白山倫公器賞不置既卒業東還會文  
裕公轉詹事兼翰林學士議取梅淑人北上遺書  
與君曰諸姪中唯汝最賢當爲我代理家政君不  
欲以賢智先諸父兄固遜不敢當歲乙巳張孺人  
寢疾頗危君日夕憂惶寢食俱廢醫禱百方竟至  
不治君悲痛崩摧絕而復甦形容稿瘁漸成蠱疾

丙午春曠臺試優等選補縣學生君病中訓之曰  
上路易行路難自此愈當鞭策慎毋怠也歷夏入  
秋疾勢轉劇羣醫皆袖手無策曠齋沐請筮得蹇  
之九五君泫然曰昔文裕公病革時嘗得此爻吾  
殆不起乎因爲曠授室又月餘乃卒將絕時泣語  
後事唯以不獲葬母爲恨迺其生弘治癸亥享年  
四十有四配張氏練川張東溪女賢而克相長卽  
曠娶子季子太學贊之女次炫聘張氏順天通判  
文洲公孫女又次郟文裕公子思豫君育以兆嗣  
女三長適太學生喬維翰次則予長子中書鑿之



子聘之又次尚幼嗚呼君孝友天至而誠信謙慎  
非其人不與交游視統綺浮習畏而遠之不啻豺  
虺若也日閉戶誦習泊無外慕如聲伎博奕之類  
終身不知非但不爲而已家事鉅細咸有成筭自  
奉甚約唯奉親延師歲時祀享必極豐腆內外嫺  
黨有以情事窘迫告者輒捐貲應之略無靳容古  
所謂仁人孝子君真其人哉法宜銘銘曰 君之  
孝足以承其親君之義足以成其身學足以掇科  
而數竒弗偶才足以用世而志鬱未伸胡積之厚  
而享之未稱蓋發之漸則愈遠彌新昔人有云聞  
厥有餘以貽諸後人

東臯沈公暨配譚孺人墓誌銘

練川之清浦有喬木世家曰沈氏蓋自宋季揚州  
守都遠公以來至菊軒翁凡七傳矣菊軒諱輔與  
其配瞿孺人並以孝義著稱 詔旌雙孝自是子  
孫蕃昌競奮儒業遂取科第登臺諫暨沿牒郡邑  
者踵接而起彬彬乎其盛矣其隱居不仕者亦多  
抱道養志有古隱君子之風若東臯公是已公諱  
燠字文顯菊軒翁之孫友松翁諱梁之子也母龔  
孺人生六子公行居三自少丰儀秀偉言動有則



見者爭以元宗許之稍長勵志積學期於進取會伯兄僉憲仲兄衛賓皆從事宦學公以門戶事殷遂弗克竟所業然應酬綜理悉中肯綮菊軒友松皆亟稱之公奉事兩世曲盡孝敬既而諸尊老謝世唯龔孺人在堂承歡順志二十載猶一日人謂真孝子之孫也平生篤厚倫理待宗族恩禮周洽至於拯危卹匱傾囊不靳鄰里賴庇者雖數叩之亦無厭拒之意感德者甚衆嘗膺例授蕃府官竟亦不赴晚歲築室東臯以泉石自娛因號東臯居士日會賓友鳴琴賦詩歌咏洽夜以繼日頽然

歡然若不知歲月之流邁也卒于嘉靖甲辰十月十有四日逝生成化戊戌八月廿又八日享年六十有七配譚孺人出同邑名族賢明淑惠克勤內職孝奉老姑得其歡心東臯既好客治具殆無虛日孺人躬親調肺略無怠容孺人有二女而無子乃求聘淑媛以待東臯遂連舉子僉謂孺人之功於是爲大其撫育二子慈愛懇至雖鴟鳩所咏無以加焉人愈賢之生於成化丁酉二月一日卒于嘉靖乙酉正月六日享年四十有九子男二人側室全氏出也長應魁娶予之季女次應辰娶莊氏



女五長適潮陽主簿劉紹元次適上海學生戚應  
期次適鄉貢進士潘忠又次受同里傅聘一尚  
幼孫男四昌胤昌文昌後皆應魁出昌後今爲從  
父祥卿嗣昌世應辰出孫女二皆幼應魁等議舉  
葬事堪輿家以爲未利乃卜嘉靖戊申之春正八  
日奉公柩權厝戴溪新坐之別室俟吉以合于譚  
孺人之封焉先期奉庠友范君所具事狀詣予請  
銘予與公世有姻連且悉公素履義不得辭乃爲  
序而銘之銘曰 碧海靈秀清溪是鍾森森喬木  
世德攸崇或顯宦業或隱明農經世勵俗厥功乃  
同有美東臯翼翼孝恭匪直世德抑振古風刑于  
家室培植彌豐劍化壁合永闕斯宮發祥流慶其  
來曷窮

劉母孺人曹氏墓誌銘

劉孺人姓曹氏故曾府引禮舍人方溪劉公之賢  
配也以嘉靖乙巳癸卯中秋前一日考終正寢其  
伯子啓元時丞吉水仲子紹元簿潮陽方皆奮勵  
舉職聞訃駭慟卽日釋位奔還袒括擗踊不勝其  
哀已乃諏日襄事將以丁未歲之仲春廿日壬寅  
奉合于方溪公之窆焉禮也前期衰經踵門泣拜



請銘其從子鄉進士兆元實爲之狀按曹故海邑  
望族有諱玘者號怡淞個儻趨義爲曹之望實生  
孺人孺人幼有至性秀慧異常七歲遭母喪哀號  
攀慕極其慘但見者動容嗟嘆稍長日扃閣事女  
紅凡組紉織紉之屬靡不精絕怡淞室亡弗繼且  
未舉子所蓄姬侍頗衆孺人委曲承接一皆滿其  
志願怡淞心獨喜後得子祿以其幼也乃館方溪  
公爲贅壻因命孺人攝家政鉅細豐約咸適所宜  
怡淞享其成焉恒曰吾女非女也吾之克家子也  
保護幼弟不啻己子故祿亦以母禮事之終身無

何舅靜齋府君遘疾乃從方溪歸侍調湯藥扶掖  
臥起晨夕不離寢食皆廢事其姑王孺人先意承  
迎孝敬備至定省溫清不失時刻深愜王孺人之  
心王孺人恒語人曰曹婦非吾之婦也乃吾之孝  
子也鄉黨相傳以爲美談處妯娌和遜雍洽恩禮  
粲然歲時祭薦必極豐潔滌濯烹肺皆躬任之不  
以委人方溪好賓客孺人擊鮮治具殆無虛日未  
嘗有厭怠之色方溪嘗以生業爲念孺人曰古人  
治生力田爲上乃斥奩貨爲置澱湖腴田數頃所  
入豐饒門祚賴以振拓人稱爲真內助云教子愛



而能勞每旦促之就學暮歸輒叩其所益故諸子  
爭相淬礪卒皆有成平居恒以約素誨其諸婦尤  
以華侈爲大戒諸婦佩服唯謹婢僕小過諭之使  
改不濫加楚撻內外姻族有不能婚嫁不能歛葬  
者輒隨事賙之鄉鄰稱貸或負而弗償亦不較也  
初紹元赴潮念孺人春秋高留其婦沈氏侍養旣  
抵任復遣使歸致迎養之請孺人曰忠孝一道汝  
能輸忠於國卽盡孝於我矣口體之養膝前子婦  
足辦毋勞屑屑也其識度高遠蓋有丈夫所不迨  
者矣孺人生於成化己丑十月望日享年七十有

七子男五啓元今陞杭州衛經歷娶余氏紹元潮  
陽之績屢膺旌典娶沈氏守元上海醫學訓科娶  
沈氏繼周氏慶元嘉定醫學訓科娶莊氏嶽元娶  
胡氏女一適太學生孫繼科孫男六曰可學曰從  
本曰可大餘皆幼孫女九曾孫女一嗚呼孺人備  
含弘恒順之德而成發祥起祚之功處室爲孝女  
旣嫁爲賢婦旣老爲慈母兩族倚成五福備順實  
應銘法乃爲之銘曰 有美德門相維淑嬪孝敬  
肅穆贊以儉勤惇修靡已德崇業起克承所天克  
才厥子如炊斯熟如耕乃秋厥旣克享齒復遐優



委順而化含笑泉下餘慶綿綿愈遠彌大合壁大封方溪之宮天光雲彩蔭覆曷窮

北山陳公墓誌銘

北山陳公諱文祥字天鳳先世太原右族宋高宗南渡隨蹕遷徙占籍華亭之高昌鄉元末割華亭之東維分建上海而高昌屬焉遂爲上海人子孫世秉禮義號稱德門祖諱衡號松巖考諱泰號南疇皆義授散官松巖公爽邁慷慨尤以器量服其鄉人南疇公嚴慎承家克紹先懿生二子公其仲也自幼凝重端慤動止有儀喪父時尚未成童而

哀號躄踊言與淚俱見者嗟歎稱其不凡稍長攻舉子業志期顯揚旣乃奪於家政業以中輟然其用世之志未始衰也奉母嚴孺人暨詹孺人承顏順志得其懽心事其兄蘆江公以恭慎稱處朋友姻黨明坦誠信無僞言詭行其以患難空乏告者輒隨事拯卹人或犯之不校假而弗庚亦不問也以是咸敬而愛之善於理生而不爲苟得力稽藝善以惠爲取絕浮華重然諾若世所謂兼併機變之巧者聞輒掩耳不但不萌於心已也嘗應詔發廩授鎮海衛千戶愈自撝抑未嘗以冠服炫耀



自非接上賓奉先祭唯角巾布袍而已訓子誦習  
程約甚嚴長子理遂以文行擅聲庠校屢試場屋  
卓有科第之望公喜曰吾壯志未酬成吾志者其  
在茲乎嘉靖甲辰秋暮忽得滯下疾徧延名醫莫  
能奏功竟以是歲十月十有二日卒于正寢距生  
成化乙巳二月三日享年六十元配顧氏壺德克  
備相北山起家有儆戒相成之益繼張氏與顧媿  
德子男三人長卽理顧出也初娶唐氏繼娶楊氏  
次玘娶陸氏次珀聘瞿氏皆張出孫男二長汝蘊  
一尚幼未名孫女四長許適太學生唐繼榮予之

孫也次許葉桂庭之子其次許正郎奚學山之子  
其次許陸愛山之子其理等卜於乙巳歲十一月  
二十有五日本公柩葬于肇溪北原之新塋遷顧  
孺人祔焉先期具狀詣予徵銘嗚呼世恒謂古今  
人不相及其然耶其不然耶予觀北山公敦本厚  
倫純誠無飾簡靜寡求耻與時競求之一時殊鮮  
其倫漢世所謂孝悌力田庶幾似之豈非今之古  
人乎是宜勒銘用砭流俗銘曰 世風蕩靡如決  
潰隄狡幻百出莫克挽移吁嗟北山空洞坦夷孝  
友誠信不忤不欺執義而趨唾彼羸竒神明內蘊



韜閔弗施時方躁競我獨委蛇寧拙毋巧寧守我  
雌世氛俗垢罔或我緇夫豈云矯我道若斯繩繩  
熾昌繫善之遺吁嗟乎北山古之君子今之表儀  
明處士可閒施公墓表

處士可閒翁之葬也稽勳主事張公須野時在職  
方嘗爲誌而銘之旣二載矣今其孫啓復以誌銘  
示予俾表翁墓予不及識翁也然嘗聞諸邑人暨  
旁邑之人靡不同尊而共慕焉予蓋傾心久矣茲  
徵諸誌銘益信乃據而書之翁姓施氏諱汶字惟  
隱可閒其別號也上世居吳之東洞庭山高祖諱

伯和在永樂時徙居嘉定之吳塘曾祖諱焯祖諱  
瑗歷龍福二邑丞考諱鍾弘治初吳塘割隸太倉  
遂爲太倉人妣龔氏實生六男翁其仲子自少有  
立志淳慤朴茂不爲浮俗所移孝友恭謹見者望  
而知爲長厚君子也安亭陸西隱善藻鑑處翁甥  
館陸之宗黨相慶西隱產素饒翁綜理有道業日  
益昌及西隱老業悉歸諸少壻翁不一染指人以  
爲難陸孺人蚤世翁念西隱乏嗣凡孺人所生子  
若孫俾從陸姓以報西隱繼室子則仍從施姓君  
子曰厚之道也嘗復吳塘舊業若干會母弟潞不



能聊生悉推予之无私尺寸有故人資生無策就  
翁謀之翁探囊得百金盡以相貸尋值歲歉遂焚  
其券略無靳容至於自奉則儉約節撙不欲暴殄  
覩時俗侈汰者疾之若仇然量度夷坦耻與物競  
與人交洞見肝腑包含茹納不立町畦里中惡少  
有加嫚侮者人爲不平翁怡然無忤後惡少罹法  
人或謂公宜乘危傾之以修前怨翁不答但微哂  
而已平生不嗜進取不出謁樞要力田之外唯課  
子孫誦習恒指其心以語之曰吾所貽若輩者唯  
此耳無他長物又曰經史之暇宜旁通方藥亦康

濟中一事也勉之無忽故一時經學醫學咸推陸  
氏云嘉靖初翁之長子楠偕其子啓以醫遊海上  
遠近趨赴爭欲挽留因卜居迎翁時翁已垂白矣  
日以詩酒爲娛每酒酣耳熱輒擊節高歌頽然自  
樂世間榮枯得喪付之冥然真有康衢擊壤之風  
焉竟以嘉靖乙未十月廿又七日考終正寢詎生  
天順己卯十月十七日享年七十有九初娶卽陸  
氏繼顧氏亦先公卒長子卽楠娶朱氏仲子棠娶  
陳氏竝陸出季子相娶金氏顧出孫男五啓娶章  
氏言娶顧氏繼王氏召娶茹氏某娶某氏某娶某



氏曾孫男二教聘陳氏政聘陸氏曾孫女二楠與  
啓以乙巳歲仲冬之廿又四日甲申葬翁於上海  
珠溪之原復自安亭里遷陸顧二孺人之柩祔焉  
禮也楠謂啓曰昔吾以父命從母姓一時之權宜  
耳然不可久倣於是自教以下仍復施姓云嗟乎  
善有餘慶易之訓也以翁觀之不其然哉翁長厚  
之德足以容衆貞介之操足以勵世斯其爲善也  
可謂博矣然鬱而未宣豈非培之久者固將駿其  
發耶今一傳而楠再傳而啓咸卓然以儒醫名世  
啓之文學行誼尤爲士林所推隱然有用世之望  
諸曾復森然競爽異時振耀光大殊未可涯則夫  
慶之所鍾未及享於翁之世者其必發於翁之胤  
乎予故表之墓道慰翁九原且以徵施氏將來之  
餘慶云

顧令人劉氏誄

顧令人劉氏諱應秀汀洲別駕宜亭公之孫鄉進  
士春泉君之元女也淑慧靜貞不妄言笑宜亭奇  
愛之謂非名士不許時東川先生爲子擇配乃請  
于宜亭諾焉深以得賢婦自慶令人年十有六來  
嬪汝修奉舅姑相夫子曲盡孝敬承賓祭接宗媼



秩有倫紀雖古之詩書所稱無以踰也初舉一女  
嘉靖庚子歲再舉得男因以致疾療之百方不能  
起竟以是歲孟秋九日卒于內寢春秋僅二十有  
一嗚呼哀哉先民有言不年非夭有德則壽令人  
世短而行長不可泯也敢以聞見乃作誄曰猗歟  
令人發祥華閎詩禮外範賢明內達顯祖徂謝生  
甫四春哀號躡踊如彼成人豈維成人純哉孝女  
蕙質蘭心挺拔儔侶名門締盟旣笄乃行煌煌鴈  
幣噦噦鸞聲時當沍凝月如秋朗瑞雲散彩歡騰  
嫵黨蹈和納順徽音允嘉瑟琴靜好宜其室家上

堂旨甘入廟蘋藻必時必潔殫竭誠孝鷄鳴致儆  
國風是期趨機勗學無忝樂妻言動必規啓良抑  
否實維壺師奚啻益友夫子所嗜古玩古詩玩懲  
喪志書史博儲吹燈佐誦更籌換幾格言善行聞  
之默喜推誠妯娌罔有畛畦調膈組繪乃其細微  
夫之女兒旣嫠而天呱呱遺孤納諸懷抱雖極母  
恩弗以毋居俾仍厥氏衍續緒餘衆美克兼靡德  
弗備曲禮內則動必昭會疇昔之年鏡墮弗全心  
知非吉咄咄懸牽逾時感夢宛見殘鏡一嬰纒育  
二豎互競我聞積德神則降祥多男遐筭俾爾熾



昌如何斯人而不蒙祐僅踰二旬遂成千古嗚呼  
哀哉垂絕遺言猶存韋弦奮有遺賫進之堂前奄  
忽云歸韜芬閱美蘭房永違鑿鑑長委巾箱故封  
刀尺餘澤啓之酸淒撫之歎息嗚呼哀哉母亡五  
月嬰復不救讎善禍仁孰執其咎哀哀夫子淚若  
迸泉顛天蹋地莫叩其寃夜雨殘燈秋風虛幌是  
耶非耶髣髴成夢望山廖廓臨水茫洋莫窺朕兆  
彌積感傷朝露易晞川流不返苒苒死生隙駟飛  
轉蜉蝣之衣木槿之華物亦有然情則無涯播宣  
淑懿屬詞鴻碩彤管有輝青史無斃嗚呼哀哉

龍江集卷之十一





國家圖書館, NATIONAL CENTRAL LIBRARY, TAIWAN, R.O.C

卷之二

三



龍江集卷之十二

雲間 唐錦 士綱

行狀

詹事府詹事兼翰林院學士儼山陸公行狀  
曾祖諱德衡曾祖妣章氏祖諱璿字廷美義授承  
事郎贈通議大夫詹事府詹事兼翰林院學士祖  
妣尤氏贈淑人考諱平字以和義授散官封文林  
郎翰林院編修贈通議大夫詹事府詹事兼翰林  
院學士前妣瞿氏贈淑人妣吳氏初贈孺人加贈  
淑人公諱深字子淵姓陸氏學者稱爲儼山先生





陸自漢晉以來爲三吳著姓元季有諱子順者居華亭之馬橋鎮子曰餘慶實公高祖在國初時隱居不仕有里人遇害無主名坐鄰保失援例當編戍慮掛名戎籍爲子孫累因躍江自沉其遺孤德衡纔五齡耳旣穉且孤家事中落稍長遷居上海洋涇之原勤於藝植業稍復振長子諱璿號筠松崇德秉禮爲鄉閭師表有司鄉飲聘爲大賓生丈夫子五人其仲諱平號竹坡公之考也孝友長厚克紹世德初娶于瞿瞿亡繼娶吳淑人婦道母儀著聞邦邑人謂必生賢子一夕忽夢海潮迅湧

有童子浮水以小朱盒盛冠帶排戶而入翌日誕公人以爲祥公生而穎敏異常三四歲卽警悟如成人筠松翁恒撫之曰是兒腰圍不凡他日紆金相也六歲就外傳教以古詩詞過耳輒能成誦筠松翁嘗讌集客見室隅設鼓因戲云擊鼓點成紅芍藥公卽抗聲應曰拈針綉出白茶糜座客驚喜呼爲小友甫成童卽洞究經史文鋒警銳一時老學爲之歛遜弘治甲寅冬錦娶公之從女弟彌月歸寧筠松翁喜甚命錦與公款談竟日因泛論古今詩文公曰近觀東坡詩殊與唐人不類餘可知



已雖謂之宋無詩未爲不可也錦益嘆服乃賀翁  
曰翁有孫若伯舅愚何足重耶乙卯臺試提學御  
史林公瑋得公文竒愛之首送邑庠補弟子員丙  
辰春三月筠松翁疾革呼諸孫囑後事乃就榻探  
數十金授公曰汝必顯吾門閱以此資汝燈燭之  
費公泣辭不得轉奉竹坡公焉戊午臺試尤爲提  
學御史方公誌所器許雖秋闈小蹶而才名日益  
藉甚辛酉科缺提學屬巡按御史袁公經考選公  
文第一首送應試是科尚書海石王公華太傅野  
亭劉文肅公忠爲主考得公初場經義卽曰此可

以冠場矣及得五策野亭益喜謂海石曰此必天  
下士無疑矣取冠多士榜出士論翕然稱爲得人  
壬戌會試禮部偶以經義不合抱璞而歸卒業于  
南雍時尚書楓山章文懿公懋爲祭酒太宰羅公  
欽順爲司業試公學政策一道公答幾萬言酌古  
準今皆精確可行二公擊節以公輔期之時少師  
邃菴楊公一清爲南太常公慕其風猷特及門受  
業邃菴曰子材識闊遠文學華邁異日當追踪古  
人吾不足學也乙丑再試禮部時侍郎東白張公  
元禎少師石齋楊公廷和主試事公卷出尚書北



渾傳文毅公珪經房薦名第九廷試第二甲第八人選入翰林爲庶吉士讀中秘書公入館手不釋卷館閣校試恒居首列時太師晦菴劉文靖公健太師西涯李文正公東陽太傅木齋謝文正公遷在內閣嘗試夫子天縱論文靖置公第一及旅謝文靖謂公曰賢作雖佳於我意猶有未盡如賜也聞一知二回也聞一知十各有限量夫子天縱則無復限量矣公亦深服其言丁卯春二月吉士當授職內閣覆試公復在優列授翰林院編修踰年丁吳淑人憂喪祭不以佛老爲禮士林稱焉時逆

瑾亂政托名擴克政務諸館職悉改部秩公得南京精膳主事以居憂未赴庚午秋八月瑾伏誅乃還舊職是冬上 康壽太皇太后 慈壽皇太后 徽號 賜百官 誥敕明年公服闋還 朝援例 陳乞獲給 敕命封竹坡公文林郎翰林院編修 贈吳氏爲孺人壬申夏四月推補 經筵展書官 閏五月 上御殿發冊寶命克副使偕正使武平 伯陳公熹封 淮王於江右之饒州 王雅重公 名饋贈優渥公峻却一無所染歸舟抵杭痰疾忽 作因疏請回籍療治歸則杜門江東里第罕入城



市及門受業者甚衆丙子疾愈以竹坡公年耄雅不欲行竹坡公強之曰兒當及時自効移孝爲忠母徒以我爲念也公不得已乃入朝供職留妻子侍養丁丑春二月禮部會試奉命充同考官如少師桂州夏公言狀元舒公芬固安王御史正宗博興顧知府鐸登州浦御史鉉彭城馬御史津青神余編修承勛皆公所取後並爲名臣初定魁元時主考太保靳文僖公貴持數優卷授公品裁公閱一卷閱博逸羣薦爲榜首及拆封乃南海白山倫公以訓狀元文敘之子也士論甚愜戊寅奉

簡命入內書堂訓中官肄習多所成就秋八月陞國子監司業公精于書學嘗博搜六書義旨并歷代名家書法作書輯已卯夏六月寧庶人反于南昌武廟親征敕百官慎留務公適署篆惡典簿不職卽時奏黜六館肅然有當道子犯監規下繩愆廳戒之當道頗不悅公貽書略云今聖駕南征百務宜慎古人謂法行自上始明公爲天子六卿正宜容庶僚之守法豈以子弟之故欲師長之廢法哉當道悚然謝焉庚辰正月武廟巡邊郊祀踰期公以京堂例凡六省牲于南郊分獻



風雲雷雨壇賦詩紀事有南郊祀錄學士洞野廖公道南時在舉子列素歆公名執經受業及會場試畢公索所試文讀之笑曰富麗闕博足以冠場但恐有純雅者壓君一頭地耳及放榜今吏侍龍湖張公治第一廖果第二咸服公神識十一月駕還有銀牌綺段之賜辛巳春三月聞竹坡公計哀慟幾絕毀悴骨立柱而後起扶疾歸理襄事以是冬十有二月葬竹坡于祖塋時祖塋祠宇未建典章未備筠松翁諸孫十餘人多饒裕公不以相煩勉力傾囊獨任其事癸未服闋公以餘哀未忘

兼之痰疾頻作乃馳疏繳納孝字勘合因請假就家療疾尋獲小愈日與詩友徜徉林泉花石間又於居第北隅輦土築五岡望之儼然真山也遂號儼山登臨嘯咏真若與世相忘者焉未幾遂菴楊公少保西樵方公獻夫右都御史靜齋陳公鳳梧交薦於 朝戊子春二月特 詔徵公以備講讀途中所作有戊航雜紀未至國門 詔進國子監祭酒公懲近時玩縱之弊乃嚴設科條戒諸生慎飾繩檢季試必宿公廨閱卷秉燭達旦面諭優劣一時士類感奮後多知名如孫編修陞潘參議徽



馮御史彬左太卿傑沈給事謚薛僉事甲王郎中  
健朱進士木皆公所器賞者也秋八月丁祭先期  
疏言祀典莫重於太學今 文廟之祭暑氣方隆  
犧牲不無變動殊非馨香潔清之義傳曰伐冰之  
家謂古者卿大夫喪祭猶得用冰况 天子之所  
祭 先師之所享乎乞 敕該部考求冰鑑之義  
以爲復古之兆奉 旨允行遂著爲令是月克  
經筵講官初講尚書旅獒篇終以慎德服遠爲獻  
冬十月復講孟子王使人瞞夫子一章反覆論繹  
謂堯舜與人同耳 陛下以天縱之聖匹休堯舜

不啻反掌已也詞義忠懇 上並嘉納是月 賜  
京堂明倫大典公與焉己丑春正月 上祀天地  
與南郊充分獻官時監生撥歷者多挾權貴請囑  
規求越次公曰 國家養賢莫重於太學有志者  
正宜安分讀書以需後用使以速去爲幸則視太  
學爲不足遊也且躁競之風從茲而始豈 國家  
養士之意乎乃立畫一之法僥倖者無所容力士  
服其公三月進講孟子伊尹以割烹要湯一節故  
事講章先送內閣詳定時太傅桂文襄公薨初入  
閣改竄講章多非公本旨公於 文華殿講畢卽



面 奏云今日講章義理多未浹洽非臣原構今  
後合無容臣等各陳愚見 陛下堯舜之主故敢  
昧死上聞時 天顏甚霽奉 允旨而歸自以  
經筵面 奏非故事因上疏謝罪略曰 陛下臨  
御千古所無之聖也 經筵面 奏百年所無之  
典也臣敢以百年所無之典奉瀆千古所無之聖  
冒昧之罪竟復何逃奉 聖旨爾昨面奏講章未  
當處朕聽未真特以允奏今聞講章不欲內閣閱  
看此係舊規不必更改如爾果有所見當別具奏  
聞何必專以此爲既認罪罷公詣 闕謝 恩歸

而嘆曰際遇如此雖捐軀何惜遂抗疏爲陳愚見  
以裨 聖學事凡千餘言大略云臣子啓沃之誠  
不過 經筵頃刻耳若講章悉出內閣之意而講  
官不過口宣之此於義理深有未安而交孚相感  
之道遠矣使講官之言得盡達於 上則天下之  
事有公卿行之而不能盡臺諫知之而不敢言百  
司庶府負之而不敢達者皆得依經比義條列類  
陳然後聰明日啓而萬機之得失四海之休戚靡  
不洞達於 聖心矣豈復有壅蔽之患哉疏下吏  
部參詳得 旨降級調外左遷延平府同知有司



欲為公給關文以行公曰吾得罪外謫當惶懼省愆敢復勤公移煩郵傳以大行色哉亟買舟逆發道遇士大夫多不知者途中所作有南遷日紀八月抵任職專清戎時刑侍東洲屠公僑為守謂公講幄重臣不宜煩以猥務欲委之他官公曰人臣事君自公卿以至末屬各有職業顧効忠宣力有不及耳敢以內外崇卑為意哉日取簿書編閱鈎稽奸蠹若素閑者且以延平道學淵藪詮集龜山楊公時豫章羅公從彥延平李公侗三公要語名道南三書以嘉惠閩士時所著有南遷槁甫三月

陞山西按察副使總理學政適有 晉府舊樂工馬某者昔為 晉恭王所喜且挾厚貲求以孫某為儀賓 王為奏行禮部給符從良許其成婚復以他孫某試補郡庠生諸生謂優伶子不廁名教具呈前提學黜之馬遂 奏言既已從良連姻王國何獨入學校不可乎事下本道久不決馬復訴於巡按趙公鏜趙以囑公公閱前後文移乃判曰馬某雖係從良但從之云者必有所從來况君子小人之澤須五世而斬馬既年代未遠則祖孫之間氣類猶在寧可學校缺一人豈宜以一人玷



學校事遂寢士類喜躍唯大忤趙意旣而徧歷郡  
邑程校學業每品第高下必面指瑕疵使之省悟  
禁絕險恠雖諸生有文學優贍考居前列者猶以  
竒僻責之士皆悅服至平定觀浮山遺竈世傳女  
媧煉石補天處也公作記辯之謂洪濛開創之始  
所謂補天者蓋開物成務以裁成輔相云耳豈有  
以煉石補天者哉論者謂發前人所未發公暇選  
歷科會試程文刻之臬司爲士子準式晉陽文體  
爲之一變如郭檢討鑿李給事念甄給事成德張  
御史梯李郎中愈潘參議高吳僉事嘉會魏進士

希相張進士淑勵楊進士思忠董舉人籥皆公之  
所簡拔也時所著有河汾燕閒錄陽曲生員劉鏗  
痛父爲縣尹笞死愬于巡按趙公趙先入尹言痛  
杖劉生褫其衣冠下之獄公曰父死非命人子不  
共戴天爲人師長握風紀可坐視其寃抑乎入院  
辯之趙語乖謬公卽上疏劾趙謂祖宗立法內外  
臺得互相糾劾今趙某挾巡按之權曲蔽屬官毀  
辱學校凌轢外臺擅播威福乞 正其罪趙聞之  
亦劾公以自解並下都察院覆請遣官會勘公與  
趙各暫還籍公先嘗博采古今緒論作同異錄每



篇附以已見擬以進 呈會趙事不果歸途所著  
有停驂錄或言部院恒右內臺宜遣人當道白其  
事毋爲人所機弄也公曰公論在人心法度在  
君相士大夫行已在爲之自我何如耳利害得失  
非所計也是歲作史通會要繼聞勘官給事中董  
公進第御史王公道已至晉陽公卽衝寒就道抵  
平定聽理二勘官詳究始末具得情實以 聞得  
旨趙謫外任公復職壬辰夏四月歸自平定所  
著有續停驂錄九月推補浙江按察副使仍理學  
政時浙中文尚竒僻公出教禁之士亦醜公素望

踴躍從令鈎棘之體一洗而空數月陞江西布政  
司右叅政署掌司事有死犯數十年不決者公平  
反之獲脫死藉者凡數十人爭像公以祀是歲作  
豫章雜抄所紀多 國朝遺事又數月遷陝西布  
政司右布政使道轉四川左使乙未夏五月抵保  
寧適苦旱災公易服却輿率諸屬禱之頃刻霖雨  
如注遠近霑足至成都視事憫其凋瘵百事務從  
仁恕唯法制所在則不敢失尺寸見藩庫弊甚公  
曰百費仰給于此今破壞不葺將來之費不可言  
矣鳩工改建迄今賴焉所著有蜀都雜抄平胡錄



多國初事蹟丙申歲威茂諸夷倡亂朝廷命將征剿公移文于副總兵何公卿曰西番自古以來不能爲中國大患而亦不能不爲中國患也要在羈縻之而已羈縻之術行賞爲先用兵次之姑自我朝論之以國初兵力之強重以御史大夫丁玉才略之偉非不能草薶而禽獮之卒集酋長給以銀顆俾各守地至今番人藏以爲寶是雖丁大夫威惠入人之深終亦歸於行賞而已今爲撫剿之說者不知果有合於事宜否也又自四川言之芒部蒙撒皆土夷也芒部已叛則剿之而改

爲鎮雄府烏撒雖有兵端亦但撫之而已今西番自有部落自成風土比與土夷尚槩聲教者不同將欲剿之則不能盡將欲撫之則不可終故爲中國計者必以備禦爲上策伺其犯邊則誅之因其款塞則賞之賞之者非盡賞其款附者也誅之者非盡誅其犯順也若思爲擴土開邊之策生事喜功以僥倖於萬一則啓釁構怨孰任其咎麾下熟知番情忠勇素著當儕之古名將之列今撫按移文詳議請條具事宜以憑轉達訪得深溝一寨據圖觀脈起自西番迤邐而來至於深溝地面方



始落下壁立斬絕約高三十餘里我難仰攻彼可  
下據彼在內而我在外譬之城堡可以內守不可  
外戰縱一時攻破竊恐不可有也有之恐不可守  
守之恐不可久若悉併財力建爲城堡西番暫且  
遠避俟我功成不過百餘人守之而已狼子野心  
乘間復發倘一旦驅其醜類殺虜殆盡如近日貴  
州凱口之事則地方之責又將誰任昔人謂幽州  
之地曹翰可取孰可守也竊意此地宜空之使彼  
不得竊居我不必蹈險則架梁裝塘之擾可免華  
夷之界自明上不至損 國威下不至釀邊釁矣

聞者甚偉其議公復悉力調度兵食饒給夷患遂  
平捷聞公有白金文綺之賜未幾建昌行都司地  
震兩晝夜傾毀公私室廬若干死者不可勝計况  
饑饉特甚公力主議發官銀賑之全活甚衆侍郎  
方塘潘公鑑巡按御史和峰鄒公堯臣玉洲陸公  
琳交章舉薦冬十一月擢光祿寺卿是歲所作有  
知命集又集古詩自石鼓文迄于陶靖節諸作名  
曰詩準丁酉正月自蜀啓行 蜀王遣承奉致彩  
幣銀器爲贐公悉辭之蜀吏民感戀泣送者傾城  
焉光祿供億繁浩况有中貴共事尤難裁抑公蒞



事旬月積蠹盡掃都人傳誦謂近所未有會國子  
缺祭酒當道以光祿煩劇欲改公太常卿掌監事  
公辭曰某無似居外垂十年茲獲內召 聖恩大  
矣敢憚煩乎席未煖而遽遷非所望也且某以國  
子得罪今復冒爲之能無厚顏乎戊戌春二月內  
閣特疏薦改太常寺卿兼翰林院侍讀學士領修  
玉牒是月充 廷試讀卷官事竟扈 駕天壽  
山謁 諸陵夏四月奉 敕撰泗洲 祖陵碑文  
秋九月復扈 駕天壽山冬十月奉 敕撰 太  
神冊表十一月冬至 郊廟禮成 賜百官 誥

敕公以三品贈祖考筠松翁考竹坡公俱太常寺  
卿兼翰林院侍讀學士祖妣尤氏妣吳氏俱淑人  
是月仍扈 駕天壽山巳亥春正月以立 皇太  
子恩蔭子楫爲國子生是月 駕幸承天府謁  
顯陵扈從諸司各設行署仍發永樂間行在印章  
給之皆 上所親定尤注意翰林問公何官內閣  
以公所居官對 御筆抹去侍讀二字改行在翰  
林院學士掌印時內閣會吏部慎選官僚改公詹  
事府詹事仍以行院學士扈從至彰德 制令三  
品以上照例肩輿三月至承天入 龍飛殿陪祀



社稷山川復從 上謁 陵行大享禮皆有白金之賜夏四月回 鑾內閣屬公草謝表五月辭行在學士往返所著有扈蹕南征稿秋七月當六載考察之期京堂四品以上例當自陳公疏略曰臣叨塵甲第幸歷三朝久廁縉紳年踰六十晚際聖明召還侍從班聯講幄誠無補於格心職首官僚學有媿於輔導兼以衰殘之質益增尸素之愆首宜罷黜無過於臣奉 溫旨留用不允所辭秋九月扈 駕天壽山還以二代雖蒙 恩贈尚仍舊銜且前母未霑 恩典乃援例上請其略曰

伏蒙 聖恩追封錫膺旬日之間兩遭殊典而官僚高選尤爲竒逢清銜美秩正人子思以薦之祖考而不可得者也臣前母瞿氏係臣父結髮獨未霑恩臣之心不安臣父之心不安雖臣母之心恐亦有所未安也竊念太常卿與詹事俱正三品前母與母俱臣父敵體之倫設若有靈豈能無望乞照侍講學士蔡昂尚書唐龍周期雍等事例俯遂微臣一念私情 上咸允之于是筠松竹坡俱改贈詹事兼學士瞿氏追贈淑人 國朝封例不及前母唯大臣特恩獲封迄公不過數人蓋異數



也冬十月 上祀 玄極寶殿及 奉先殿公與  
陪祀賜脯醢酒菓品物庚子春正月言官建議欲  
以先 朝尚書薛文靖公瑄從祀孔子 上命文  
學侍從諸臣各上議公疏略曰世儒之講從祀者  
多責備於著述之文而於道德之實若在所後臣  
以爲聖人之道本末一貫謨訓功烈以時而出初  
無意必於其間其在後儒不得不與時而升降七  
十子速肖聖道故宜祀秦火之後諸經師口授秘  
藏有傳道之功宜祀魏晉以降佛老並典故排斥  
異端有衛道之功宜祀隋唐以後聖學榛蕪專門

訓釋有明道之功宜祀程朱以來學者趨於章句  
口耳之末故躬行實踐有體道之功亦宜祀本  
朝以理學爲宗實自瑄始其反躬實踐復性存誠  
亦足以救末世支離之弊必欲鋪張一王之大典  
以表章理學之有人羽翼聖門風勵末學則從祀  
之選非瑄不可疏上有儒臣議不合事遂寢二月  
上開講簡公充 經筵日講官兼講大學衍義  
三月以日講賜扇夏四月賜炙鵝果餅此蓋優遇  
日講異數也自是賜無虛月時忽有颶風之變  
詔京堂四品以上自陳公疏略曰臣才綿力薄展



布未能叨享 國恩每懷慚懼尸素之人唯臣爲甚徒以感戀 聖恩未卽陳乞殊昧止足之義物理憲典俱屬有妨况今氣血兩衰痰火間作報効之心雖在而驅策實不能前首宜罷免無過於臣有 旨留用公不敢復辭公以詩學發科平生博綜衆說參酌異同作詩微若干卷是歲書成辛丑春元旦大雪公與諸詞臣進瑞雪頌 上覽而嘉焉是月三載考績吏部題覆奉 旨復職二月禮部會試 內閣推公及侍讀學士水南張公袞爲主考 上以尚書托齋溫公仁和易之公適苦痰

疾方憂文衡之勞聞

命喜慰三月

廷試充讀

卷官分閱二十一卷中多名士夏四月

九廟災

上甚悚惕

詔百官修省公憂惶彌甚又得家

報二孫連殤愈鬱鬱不樂去志益決乃上疏略曰

殷憂啓

聖變不虛生仰惟

皇上聖敬大孝感

格皇穹盖有素矣而災變若此非臣等奉職無狀所致耶如在一芥草茅叨塵侍從食祿有年曾無寸補尸素之愆又 皇天所宜震怒者也倘蒙

聖恩不加斧鉞之誅將臣放歸田里別選忠勤以爲格天之助臣亦少延殘喘歌咏太平之盛矣疏



上得 旨致仕五月 陛辭七月抵家謝遣人事  
理江東舊館居焉公文翰冠絕一代人獲片言一  
字珍如異寶四方徵文乞書者屢滿戶外公多以  
疾辭間有辭謝不得者亦強爲應酬然亦不勝其  
煩矣公之在館閣也常祿外復以纂修給酒食費  
三載幾四百金公語其子楫曰吾自科第起垂四  
十年秋毫皆 帝力也重膺 簡命同修秘史太  
官所給敢素餐耶當爲鄉邑間作一義事消此餘  
祿庶可逭吾內媿耳因浦口有通河限南北人艱  
於來往乃傾金市石復捐租千石以益工費特建

三環橋通行邑人便之以竹坡公小宗不特立廟  
至是曰吾叨祖宗厚庇致位三品恩霑累世禮有  
以貴爲宗者不按古制建特廟非所以彰先德榮  
世秩也於是闢址居第之傍適鄰有鬻地者因倍  
值償之江東舊有蘆洲別業環百餘畝忽慨然僦  
工築堤數里闢爲良田幾百畝畝費幾二十石或  
曰畝直不過數石徒濫費何爲公曰是非爾所知  
也昔吳康齋先生以處士被召辭還 英廟賜路  
費五十金歸以募工墾山田僅得四畝人哂其失  
計康齋曰某欲爲天地間增田數畝以爲開物計



豈暇他較哉予不惜費闢蘆洲爲良田亦是此意  
正不必屑屑計直爲田舍翁事也聞者始而疑終  
歎服焉巡按御史雲川舒公汀岐麓周公亮巡撫  
都御史夏公邦謨繼相舉薦且時望又屬咸謂日  
夕間 召命至矣公獨若不聞日坐東堂讀諸子  
書因叅酌經史疑義作傳疑錄秋八月忽感瘧疾  
留西莊月餘始愈然覺脾弱飲食損矣至甲辰二  
月脾胃寒泄肌肉漸鑠公心憂之呼楫語之曰吾  
疾殆不可爲汝四舉子而未育奈何吾觀標姪淳  
懋其子必佳可育其季子以兆汝嗣命名曰郊遂

延門下學詩士馮君遷訓焉五月巡按御史楊公  
時泰提學御史裁菴楊公宜復交薦之部院諸老  
各抗章列薦公得邸報感然曰徒負知己時胃寒  
久不愈有言蒸臍可療者試之頓成血枯虛閉猶  
欲集古隱逸事作山居經方手錄數行會疾劇不  
果六月朔日移臥西莊時錦之內子恭人卒慮公  
悲傷秘不敢以聞既月餘矣家人誤言及之公撫  
牀慟曰我筠松翁以純德昌後孫男女二十餘發  
祥於吾兩人今至此豈先澤將竭欲竝收以去耶  
言與淚俱下因就榻中仰書數字遺錦致慰錦展



誦數四哽咽不能成聲嗚呼可勝悼哉楫晝夜侍湯藥衣不解帶數郡名醫無不延致然皆寡驗公曰天也吾長負國恩媿無以報勿更乞恩典以重吾咎猶臥讀國朝名臣錄以遣日聞姑蘇楊南峯先生所著松籌堂集在黃甥良玉所因作短刺索觀書松籌堂集取來廿七日凡九字遂爲絕筆至是飲食輒吐痰涎數盃墨汁而膚削愈甚公曰禮貴正寢當速歸可也其夜風月清朗楫輩扶輿而歸時乃七月十有八日先一夕當夜分時家人忽見大星隕庭中光芒異常公聞之曰此吾

去兆也當速具後事醫家亦謂翻胃症至此無容措手矣二十三日寅刻忽曰今日陰陽家所忌吾尚須明後日乎因索衾歛具一觀之曰是已足矣母違禮以厚殉我也又曰往在館閣嘗蒙聖明溫旨褒以忠敬未嘗敢一日忘可勒作金書二字標以聖諭扁之中堂傳示子孫以識榮遇家廟已飭材肇工惜未及建亟爲我成之縱九淵敢忘吾君父言訖泣下諸弟姪環候榻前徐囑之曰門祚衰風俗薄各宜勗德懋善以延世脉吾目瞑矣復呼楫夫婦與女之夫婦環跪榻前各語以檢



身保業之道又爲諸女甥處分婚禮神爽清明無  
纖毫憤狀二十五日漏下四鼓見楫秉燭蹲于榻  
傍顏容毀變厲聲曰君子不以死傷生汝宜勉力  
自愛以襄大事可徒自滅性乎昧爽問天已明未  
須臾翛然而逝嗚呼公間世偉人天不憖遺豈非  
斯文之不幸耶先是壬辰歲公夢以疾屬續及明  
賦詩云世間萬事閱教真一死偏饒未到身昨夜  
一場春夢破今朝已是再生人癸卯夏四月復夢  
如前而加詳明復賦詩云千緣萬劫俱經過獨有  
人間死未曾昨夜分明春夢裏一場搬弄偶人棚

及是而驗蓋數之前定云公生于酉秋八月十日  
享年六十有八配梅氏初封孺人加封淑人壺德  
閨儀爲姻族楷範一子卽楫自邑庠廩膳生廕入  
成均博學古行蔚有時名一女贅太學生瞿學召  
公長身玉立神采英毅望之若天人然凜不可犯  
然性度軒豁接物明坦不錄細過咸樂親之性至  
孝事父母先意承志恒恐不及四時祀享未嘗不  
哀戚盡禮遇諸昆弟暨群從子姪懇懇然導之爲  
善或有小失則委曲掩覆諷其悔悟稍涉非義卽  
閉目搖手不與相聞以是族人多知畏於書無所



不讀自少至老未嘗一日廢書不觀故其胸中浩  
瀚汪洋學者質疑問難愈叩而愈不見其窮也其  
辨析義理細入幽微無不出人意表爲文章渾雄  
典贍成一家言頗厭近時文體之陋恒語學者曰  
文字當各寫胸次如江河之潤日月之光乃可言  
文若規規然摸描彷彿作者果如是乎遇艱澀之  
詞輒曰此換字減字文也棄去不視尤長於紀事  
落筆千百言馳驟頓挫無一冗詞泛語賦詩則直  
寫性情不事雕琢初喜盛唐中年以後冲澹閒遠  
駸駸漢魏矣輯彙次詩文集百有餘卷皆鑿鑿可

傳書學極其精妙 國初吾松多以書學名天下  
久已絕響公近奮起遂凌躐前人而處其上今太  
常卿張公電以書學際遇寔出公所指授識者謂  
公趙文敏後一人非諛詞也平生慕李鄴侯韓魏  
公程伯子邵康節之爲人其材器志識端亦相類  
每與客品隲古今商確經史掀髯抵掌竟日不休  
尤善料億大事往往奇中敷歷外中多所經涉文  
章禮樂之外如刑名錢穀甲兵之類靡不精練况  
其宦轍所至幾半天下四方山川險易風土異宜  
皆所洞徹故其視天下事若不足爲然臨事而懼



敬慎詳審不啻臨深履薄以是動有殊績無絲髮遺憾聞人一藝之善喜爲延譽於功名利鈍之際處之裕如當時門生故舊相繼當軸一無所附麗嘗曰人生出處進退確有定數不自重而覬望於人祇自辱耳謝政之日浩然曰今日始息有矣顧尚負國恩當日率妻孥焚香祝聖壽耳更何爲哉自筮仕登朝聞先達嘉言卽書紳銘座期體之身心尤喜談國朝典故及前輩風烈每舉一事必首尾該貫委曲周詳能使聽者躍然如身處其時而目覩其事聲色貨利無所嬰情唯法書

名畫商彝周鼎則時供鑒賞用爲博古之助名位顯重而布衣之交雖一飯必欲共之扶危賑乏數而不厭交際則非義之饋一芥不取居官守法屹如山嶽不可轉移恒曰祖宗法制所以綱維萬世安忍以一人之私而廢萬世之規乎雖其至戚與所甚愛欲丐少徇不可得也當沉劇時聞有北來人猶數數問北虜消息其愛國之念垂絕不忘如此太卿穆文簡公孔暉嘗品當世人物謂公才識性度酷類東坡少保胡端敏公世寧謂公曰公交游遍海內吾獨真知之文章行業殆今之歐



陽公也尚書霍文敏公韜每對朝士曰方今縉紳豪傑屈指不數人陸子淵其一也禮侍少湖徐公階嘗謂吾松先達如張莊簡公之政事錢文通公之風猷張莊懿公之器量顧文僖公之才望二沈學士之書翰皆一代名流儼山公殆兼而有之至於問學之宏博詞賦之精工直當與先朝宋文憲李文正相爭衡聞者以爲知言嗚呼公文學勲德顯于朝廷簡注于聖主表範于天下保身完名慶鍾賢嗣謂之間世偉人非耶皇上軫念講筵舊學賁終恩典必將超越常格褒崇

寵錫固自足以致不朽矣楫又欲銘諸隧道以爲後地茲以新原肇啓卜葬有期乃奉公遺命屬以事狀錦於公有兄弟之誼矧少同庠校壯歲同朝晚同歸老林下頗爲知公第衰耄荒落不足以發公盛德之萬一適楫脩公年譜初成事詳且核謹掇其大端編次如右用以請于當世之文章鉅公以備采擇掛漏之罪其敢追哉



龍江集卷之十二

龍江集卷之十二

三



國家圖書館, NATIONAL CENTRAL LIBRARY, TAIWAN, R.O.C.



龍江集卷之十三

雲間唐錦士綱

行狀

山東按察副使遺槐談公行狀

公諱詔字朝宣遺槐其別號也世家上海之鶴沙  
自曾大父文政大父克閭以來代有聞人皆韜迹  
弗耀考拙軒雅好吟咏壯時丞陽信有聲贈至刑  
部郎中妣宋氏封安人再封太宜人以公貴也公  
幼凝重不群好學出於天性甫成童下筆數百言  
可立就極爲拙軒公所鍾愛弱冠已受知郡守田



公及充弟子員時譽翕然歸之按部較業者得其文以爲異人如戴公婁公皆贊之不容口待以殊禮謂倫魁不足得也成化庚子登鄉薦爲春秋魁明年辛丑會試南宮占上第試事於秋臺遂能精研吏事爲法家宗每據案屬藁老吏爲之屈服司寇林公尤所器愛焉歲餘拜刑部主事雖不設機械而兩造情僞片辭折之無留疑譬猶屠牛坦一朝解十二牛而芒刃不頓蓋其眉睫之下未嘗有全牛也及奉使清理漕政按奸剔蠹銖兩莫逃同事者服其能未幾轉副郎賢聲益著戊申李御史

興按關西賊殺不辜凌侮士類與巡撫韓中丞交章相訐時端緒紛然逮辯者千餘人且多聯涉權貴廷議推明敏剛健聞望絕人者往訊其事咸以爲莫如公宜於是與李黃門劉錦衣實被命以行凡官屬饋謁之閑胥吏窺伺之禁周悉備至皆出人意外辨証旣白乃置興大辟餘自鎮巡監司以下一無所縱擬罪而奏請者尚一百七十餘員舉似似倪莫能有異辭使還朝野以得人相慶公錄前後文移爲一編曰勘事錄朝士競相傳寫取爲式焉已而丁外艱廬墓終喪哀毀骨立足



跡不踰外戶浮屠老氏之流無敢及其門近世士大夫居喪盡禮未見其比也服闋轉正郎禮部以學行薦充癸丑會試考官所收多名人被黜之士亦無敢怨以譁者時法司條例紛錯未底于定公總筆削之柄晨夕繙閱志精力專殆不知有寒暑之變易其超卓之識潔白之操練達之才雖販夫牧豎皆能道之司寇白公每評其曹屬必以公爲首故諸曹奏疏其所以叅裁書擬悉委之於公云先是公數生子輒不育而婢御又無得進見者至是年已四十餘頗惶駭計無所出其弟司訓君以

爲憂乃密爲置妾劉氏于別舍給其父母使與之居後致太宜人命翼嫂王宜人南歸後劉氏竟有子錦時亦在 京師聞而喜曰今日乃知天道之有神也是固公盛德之報實司訓君左右維護之力居多公爲法官幾二十年秉公据理棘棘不阿人莫敢撓以私亦以是取怨於勢家故年勞雖深僅得轉山東按察副使時權貴人造謁者相望於道多欲以親舊之在轄屬者托庇公詞嚴色莊莫不爽然自失而去旣 陛辭卽馳歸拜母太宜人于堂以父缺溫清伏地嗚咽不能起太宜人撫慰



良父數促之行乃行其憲節所至黜奸貪揚善類  
風裁凜然若霜鶻掠林豐狐校兔望風奔仆不暇  
齊魯之境肅然戊午秋進 萬壽表入 京師邀  
訪者踵接而至公戒門以絕由是當路多側目矣  
已未當大朝黜陟既定怨公者無所洩其憤陰嗾  
言官使劾之事下臺部咸謂公才望綽著去之非  
宜乃止士論猶洶洶爲公不平公自處裕如略無  
幾微見於顏面或弔之則曰吾誠不職於人何尤  
言官言是也有識者高之然撫按章薦愈力遷轉  
固旦夕耳而公則以太宜人憂去矣其動止有法

操持不苟悉如丁外艱時又建祠墓間刻木爲考  
妣像朝夕哭奠事之如生雖古純孝未之有加也  
然名勢之念已踈樹遺槐堂于壠側南則鑿池引  
流壘石爲山雜植竹卉以爲歸老燕息之所漱碧  
亭迎龍橋翼然左右中建堂三楹扁曰意思間各  
記以文公居其中凝然終日左圖右史若與世相  
忘者纖毫塵土蓋不足浼也錦因憶其闢園之始  
嘗寄以詩曰功名無盡藏先辦午橋庄此則公素  
志而人未有知也及終制賀者傾城公泫然曰是  
豈所宜賀者耶先王制禮不敢過也脫衰經而冠



紳豈吾所欲哉悉謝絕之君子以爲知禮乃於孟春之吉偕弟司訓君拜掃于鶴沙祖壠祭畢寓張氏第夜半忽脇作疼司訓躬扶之以歸迎醫禱神百方爲之卒無驗居數日疾勢滋殆司訓哀號匍匐衣不解帶者旬餘公自覺瞑眩不支呼司訓告以後事方叩榻將語而王宜人適至公張目一視竟不言至次日逝矣時弘治壬戌二月十有三日也距其生景泰辛未之十二月廿一日享年五十有二子承仕甫六歲卽劉出也聘指揮秦君孳女孤弱寡援司訓將收字而經紀之配卽王宜人生

二女長贅庠生曹祿次許董世行春官之仲子繼資將以癸亥年十二月初三日葬于考拙軒公之墓左公豁達好義樂施與平居不問米鹽細務宗族待公而舉火者數家獨不喜軟媚遇盤根錯節他人莫敢措手公直前當之不少惜其爲文雄贍莊整有作者風而詩則綺麗明潔上窺秦晁虞伯生楊仲弘而下弗論也凡爲集數卷皆鑿鑿可傳恐久將散逸錦欲謀諸梓而未有所托嗚呼川嶽秀淑之氣凝聚融結而豪傑生焉生之成之又從而摧敗毀折之不使究厥施不知司造物者意竟



何如也錦生也晚公不加鄙夷辱與爲忘年交日相從於荒原斷澗之濱其所以慇懃見屬者殆不能勝然司訓君區畫其後事至忘寢食殫神竭思日無寧居而錦曾不能効尺寸之勞幽冥之中負此良友天乎人乎此恨何極今司訓將先期謁銘于名公先生勒之琬琰爲不朽計命錦蒐輯其歷官行事之詳爲狀一通雖言之不文幸無媿辭庶可以傳信後世焉

封廣西按察司僉事顧菴潘公行狀

嘉靖乙巳夏五月二十有六日 誥封奉政大夫

廣西按察司僉事顧菴潘公卒于正寢潘氏之先世居毘陵公之高祖添二公元季避亂徙居上海尋以商游客死曾祖靜菴公孩抱失怙賴母陳氏撫哺以生毘陵之族不復相聞故添二公以上世系莫紀祖瑞原公諱麟仕爲所大使考默菴公諱慶崇德脩義鄉稱善士生二子長元無嗣次卽顧菴公諱奎字用章顧菴其號也將誕之夕母唐孺人夢異人持袍帶授之曰以此付爾子寤而公生焉人以其爲祥公自少穎敏好學習舉子業已見端緒值家事中落遂弗獲卒業去爲邑掾然文雅自



飭言動有儀與諸掾絕異邑令而下咸異而器之  
有大政必相咨質未嘗以諸掾例視也正德辛未  
銓曹察公有捍禦才奏授項城尉是時巨盜流劫  
所向殘躪無遺河南所遭尤爲慘烈項城久已爲  
墟公撫摩綏輯如保赤子未幾瘡痍漸起向之流  
離轉徙者亦襁負而歸項非往日之項矣舊墉土  
築毀於兵燹公力任修治易以甌石時公帑匱竭  
財用悉公區畫官無所費而民不告勞且堅緻峻  
整可垂永久邑人迄今頌焉嘗訊鞠獄囚一盜年  
未成童亦在死律公惻然曰此不幸爲人所誘失

所從耳力爲出之撫按潘臬諸公悉公賢能檄公  
攝令商水適當商水殘敝之餘且多巨豪宿猾以  
公尉也頗易之公嚴設科條振起頽廢剖裁庶務  
克協情法衆乃駭服莫敢犯命一士人被盜或以  
飛語誣其婦與賊私夫白縣欲出婦公曰倉卒遇  
寇汝婦不免驚傷忍究以污辱事耶其人悔謝而  
去公裁決敏當率多類此紀功雷御史統官兵道  
出南頓先是南頓頻罹盜警居民團聚自保官兵  
至遏不得前御史盛怒收捕二十餘輩欲盡置之  
死公委曲調護久之方解中有年少者二人復激



御史怒解之不得竟斃杖下十八人者公實生之亦未嘗詫爲已功公治兩邑廉明峻直遇事風生杜請謁嚴檢防肅如憲臬然處心仁厚不事矯削故民之趨之不啻父母然諸上官行部至邑令若承簿或不免訶辱於公獨加禮遇且致褒焉旣三載謂遷擢且旦夕矣偶嬰疾恙遂力請以歸項民失所恃賴挽留不得莫不相顧悵惋公歸則稍葺田廬躬事耕稼而尤以教子爲急恒語諸子曰吾蚤有志于學不幸爲家事所奪不得已勉就卑宦所成吾志者在汝遭也夫致功穠穰乃有豐登鹵

莽而耕報亦鹵莽汝曹其勉之哉故諸子自爲師友爭相淬礪公程督不倦課讀率至夜分長子山東憲副恩遂舉嘉靖癸未進士初知祁州公數貽書以廉且勤者訓之憲副君佩服唯謹後以刑部員外郎轉廣西按察僉事總理學政所至聲績顯赫卓爲名臣公之教也丙申歲 聖天子以 元嗣繼生推恩中外公獲今封 制詞有筮仕 先朝流芳鉅邑愛民守已茂著賢能引疾明農厥施未究之語蓋一時殊典識者榮之公天性恬澹不屑屑較利謙讓寡約鄉推長者處人以和而不爲



苟同有過輒面論之使改聽者或不滿於懷徐味  
之知其爲藥石也卒感服焉又數年公齒益邁乃  
杜門靜養外事不復關涉唯以孝友忠愛朝夕訓  
戒子若孫而已今歲之春公忽遘疾諸子竭力醫  
禱愈而復作屬續之晨呼諸子謂曰吾年逾耄耄  
夫復何憾汝曹爲吾子孫者其毋忘吾朝夕之言  
吾卽瞑目泉下矣語畢而絕距生天順癸未十一  
月二十五日享年八十有三前配趙氏繼則錢氏  
憲副昆季之所自出也先公十有七年卒公封之  
歲 誥贈宜人子男四人長卽憲副君初娶某氏

贈宜人繼娶某氏封宜人次惠太學生娶某氏次  
忠登應天鄉薦初娶某氏繼娶沈氏次恕太學生  
娶某氏女三長適顧鯛次未嫁卒次適邑庠生俞  
文榮孫男九人允晰邑庠生允升允穆允脩府庠  
生允亮允立允徵允達允肅孫女三曾孫女一錢  
宜人舊葬陳涇之原地頗湫下公恒歎之圖遷未  
就茲承公志卜地某溪之原將以歲之 月 日  
奉厝公柩遷錢宜人合焉嗚呼公雖仕不大顯而  
廉能之績表著一時所居民愛旣去民思雖前史  
所載循良殆無以加焉矧厚德雅望鄉邦尊仰流



慶叢祥徵於胤嗣崇階顯秩收之桑榆 天語褒  
嘉炳如星日則公之所以爲不朽者固已有餘地  
矣憲副昆季猶懼公之行未白無以掩諸幽謂錦  
父從公游知公爲詳遂具事略命詮次爲狀將以  
速銘于當世鉅公錦素歆公風誼動止視爲楷式  
而今不可復得矣可勝悼哉故雖文詞蕪鄙不足  
以宣發盛德而不敢辭也敬掇拾如右備採擇焉  
謹狀

亡兄浙江布政司都事恕齋行狀

嘉靖戊子冬十一月十有二日子兄恕齋公卒于

正寢未卒前數日召錦至榻前語後事且以行狀  
見屬錦泣而諾焉至是諸孤文等復申遺命嗚呼  
錦何忍狀吾兄雖然忍死之托其何敢辭乃披淚  
書之公諱錞姓唐氏字士聲恕齋其號也先世自  
質肅公以來代爲晉陽望族五世祖諱英徙居靈  
石洪武初來監上海之烏泥涇稅局高祖諱文祥  
以長子隨任因占籍爲上海人曾祖諱以忠隱德  
重于鄉評妣馬氏祖諱昭累封中議大夫贊治尹  
衢州府知府妣張氏沈氏俱贈恭人考諱琛贈刑  
部郎中前妣徐氏贈安人母趙氏封太安人公少



豐秀拔異穎敏絕人數歲能屬文下筆有奇氣先  
府君異之嘗曰吾家千里駒也然小心抑畏動循  
矩護人以為難年十六被選充邑庠弟子員尋以  
文學超卓廩于學宮壬子乙卯連魁臺試一時場  
屋名籍甚咸以倫魁擬之他郡士同試者爭求識  
面以得容接為榮凡七試皆弗利士論稱屈正德  
戊辰膺例貢卒業太學大司成王甌濱先生尤加  
器賞期之公輔聞者謂允公忠信誠懇與人交際  
無偽言詭行稍不合即感額而起若將浼乎其身  
或鄉黨所為不義輒正詞規之人頗見憚然知其

無他亦無怨者事父母殫竭孝敬聞時新物即高  
價購之為旨甘獻親未嘗不敢輒入口或有所委  
必忘身任之弗憚勞勩處昆弟間極友愛自成童  
以至白首歡如一日教諸子甚嚴雖言動小失必  
峻詞厲色戒飭之甚至家庭斬斬門無雜賓壬申  
夏六月先府君忽遘疾危甚公自南雍聞之窮晝  
夜奔馳以歸先府君喜曰吾有主矣一笑而逝公  
居喪致哀祭葬無違禮士林稱之及三載服闋太  
安人亦將七十矣錦不欲遠違欲乞致仕為養親  
計公勉之曰事君奉親吾與弟分任之竭誠報國



以終先府君之志屬之弟矣北堂之養吾盡吾誠  
焉錦不獲已還 朝就職公歷事大理畢卽具疏  
丐一職侍養 武宗皇帝憫其孝誠允之授浙江  
布政司經歷司都事階徵仕郎公旣拜 命歸日  
侍太安人左右凡所以順承之者無所不至尤以  
滿盈爲懼愈自韜戢不敢以富貴加人前後郡牧  
邑大夫皆重公之行高公之節鄉飲必以大賓屬  
公暇則以政就咨焉公外嚴而內慈見人窮乏危  
急必竭力周之門下士待公而舉火者數家所施  
襪具殆不可數計也預築壽藏於廟涇先壠之右

建晚節堂日拉大夫士賦詩酌酒徜徉容與其間  
君子許其達嘉靖戊子秋公兩踵忽浮腫初亦以  
爲恙之微耳旣而濫漫遂至於劇徧邀名醫療之  
百方竟不起嗚呼痛其可勝言耶公晚年頗以左  
於科第爲憾然經業精貫所爲文一主於理而措  
詞工緻號爲有法子史百家靡不旁覽博涉固科  
第者所不逮也一第之得否豈足爲公軒輊耶頗  
嗜吟咏喜學唐人而時出新意所著恕齋稿數卷  
藏于家生於成化己丑閏二月十有七日享年六  
十配余氏賢明慈惠爲媼邨所歸前歲餘卒于男



四人長文娶姚氏次交娶戚氏次變娶談氏皆太  
學生也次袞聘王氏女四長適太學生談寶之次  
適戴隱次適劉士奇又次適沈鵬孫男二長繼科  
娶王氏次繼爵孫女四長納郁恪聘餘尚幼曾孫  
女一先是余孺人卒既葬于所築壽藏矣茲公之  
葬諸孤謀之陰陽家以己丑十一月十有二日爲  
吉擬以是日啓余孺人窆合焉錦悲痛之餘言不  
能文聊述其梗槩爲狀立言君子尚有取焉

龍江集卷之十三



龍江集卷之十四

雜著

祈雨祭城隍文

雲間 唐錦 士綱

令與神均受一方之寄賞善罰惡令之職也捍災禦患神之職也賞罰不明招茲旱虐令之曠職不容文矣然災不能捍患不能禦而謂神之能舉其職可乎令以憂民之故躬率僚吏竭誠請命於祠下者亦既屢矣而神視爲秦越愬然莫顧目視吾民之瀕於溝壑而不一引手焉獨何心哉其亦何





顏以享茲土之血食也且雨暘之柄在天人力有所不及轉而請之在神直易易耳借謂不能是不靈也能而不爲是不仁也不靈不仁於神何取焉唯神鑒而思之

張龍山都諫進士巾服像贊

蒼松野鶴酷類其形光風霽月乃性與情三禮魁  
鶚書之薦萬言甲虎榜之英恩光逐花枝而競艷  
官袍與草色而俱青噫玉署文章竟收華國之譽  
鑿坡諫疏獨有回天之聲是之謂志克酬於經濟  
而學不負於平生則夫所以名當時傳後世者豈  
直草聖龍蟠而鳳翥詩篇鬼泣而神驚也耶

少宗伯賓山張公像贊

孕滄溟之靈秀聳振古之豪英溫恭靜粹肅亮端  
凝風姿皎於玉樹篇律鏗乎金聲氣之清也冰壺  
湛涵夫秋露志之銳也寶劍乍發於霜刃煙霧凝  
毫追鍾王於晉代星辰隨履陪元愷於虞廷朝趨  
延閣晏直承明乃司綸綽乃陟丞卿容臺銀臺拾  
級以進工侍禮侍取次而登豈唯晝日之三接固  
亦夜置於嚴更 永明殿之代拜異數侔諸元老  
皇天冊之顯委 簡注逾於股肱風虎雲龍值



千載明良之會 聖君賢佐極一時遭際之榮觀  
茲待漏之像儼然匪懈之誠若夫勲業所施自將  
紀之太史至於靈臺所蘊殆莫狀於丹青

栢舟頌

太夫人張氏今董學侍御黃先生協恭之母也太  
夫人克備女德夙稱閨秀歸鄉進士公時纔十有  
七齡迨二十有六而進士公以會試卒京邸侍御  
生甫數月耳旅襯來歸太夫人號慟涌血決志死  
殉舅姑泣諭百端強存視息茹荼銜辛間關機杼  
卒才其子以昌黃祚豈惟皎然之節壁立千仞而

衍續墜緒蓋於黃氏有百世之功焉節之時義於  
是爲大惟昔共姜執志守義栢舟興咏夫子列之  
以冠鄘風矧太夫人所立卓與共姜並節而功或  
過之宜有頌聲以昭風勵乃爲栢舟頌曰 壺山  
之靈閩海之英時流氣會宣發崢嶸維黃有母清  
河之胄誠孝淑貞厥惟性有乃筭乃歸瑟琴允諧  
庭闈胥慶姻黨咸推克相夫子文行卓偉魁薦鄉  
書蛟騰鳳起乃赴南宮志銳聲隆韜鋒未試飛鵬  
兆凶遙遙千里旅襯歸止嗟未亡人形存心死躄  
踊悲號窮極昏朝涌血淋漓氣奪神銷有生奚靳



此身必殉絕粒長瞑用祈速盡高堂駭惶理論百  
方強進勺水敢終拒方呱呱未晬宗祊所綴以字  
以迪庶其弗墜雨風淒其夜績曉機誦聲琅琅母  
心則夷鵬搏豹變甲科殿院瑚璉圭璋廊廟之選  
爲國產賢夫祚昌延豈惟節顯功存不刊共姜風  
操栢舟斯表千載相望于姜有耀 帝嘉憲臣錫  
號推恩臺府交疏請旌其門偉功峻節日星昭揭  
煌煌有訓詞式勵在列彼蒼有知餘慶方滋揚芬  
植準敢陳頌詩

忠經引

臣之於君猶翼而飛趾而馳性之自然也然亂臣  
賊子恒踵接於世而伏節死義之士求一二於千  
百猶不可得焉卽有焉則史冊誇之國典卹之褒  
之文章家從而咏歌之若恐不及焉者此何爲也  
哉所以聳動於將來而振勵之也然而卒不能皆  
然者蓋亦有故矣禮義之教不明而利欲汨之耳  
向使忠言讜論日陳於前中人以上未有不心融  
而神醉者也恭順忠愛竭誠忘死豈其所難哉計  
不出此而欲以刑罰劫之譬之御馬者去羈勒而  
臨以戈戟彼有迸逸跳躑而已耳尚可責其效乎



此予刊忠經之志也

夢餘錄引

予自移疾家居杜門絕過從無所事事日與經史爲偶性復嗜睡每晨盥畢卽挾策就枕讀數十行已齁齁作聲覺輒復讀讀久又睡浩浩焉落落焉蓋不知天壤間何樂可以易此也壬戌夏六月宿病新瘥厭城市囂雜之聲乃避署于龍江別業其中頗得花石水竹之勝踈曠自適真若與世相忘者矣或目與心會意緣境生輒引筆伸紙裒所憶而志之月餘積成卷帙不忍遂棄乃題其首曰龍

江夢餘錄而藏之敝笥聊以志有得示無忘云

鄭氏家規引

夫誘進以仁義束縛以刑罰不獨治天下之法然也古人恒用之以陶宗而範族焉迄周之衰禮壞文毀風流訛舛朝章國典已無足觀而况求之閨闈之間乎世以家法稱者顏氏之外有義門鄭氏觀其家規所載事爲之防動爲之則善有勸而惡有懲其所以弘暢人情而綱紀世道者至矣前輩以其篤禮而近古也嘗梓行之歲久漸就剝腐夫天下者一人一家之積也使能人習其書家崇其



教馴至比屋可封何難耶未可以爲一家之政而少之也予故重加校定刻置縣齋蓋於吾民有厚望焉

古今說海引

夫博文博學孔孟之所以爲教也况多識前言往行乃爲君子畜德之地者乎黃子良式顧子聘夫陸子思豫皆海士之英也與予季子贊共爲講習之會日聚一齋繙繹經傳考質子史闡發微奧究極指歸不但求合場屋繩尺而已探索餘暇則又相與劇談汎論旁採冥搜凡古今野史外記叢說

拙語藝書恠錄虞初稗官之流其間有可以裨名教資政理備法制廣見聞考同異昭勸戒者靡不品隲決擇區別彙分勒成一書列爲四部總而名之曰古今說海計一百四十二卷凡一百三十五種斯亦可以謂之博矣雖曰用以舒疲宣滯澡濯鬱伊然學者返約之道端於是乎基焉好古博雅之士聞而慕之就觀請錄殆無虛日譬之厭飫八珍之後而海錯繼進不勝夫嗜之者之衆也陸子乃集粹鳩工刻置家塾俾永爲士林之公器云

書大名誌後



大名故魏也操燕趙之喉吭樹成臯之障蔽山東河南恒倚重焉自周漢則然矣迄唐而領袖諸藩宋而鎖鑰北門入 聖朝控殿畿輔重有加焉然而信史不作因常踵陋殆非所以重之也前郡伯關中韓公於威惠敷洽之際獨奮而爲之其所見出於人遠矣今公復以中丞撫治之推其所以化於魏者播而爲六郡之惠和萬安劉公以侍御按治之推其所以震於朝者鼓而爲一道之風霆而滁陽石公又以名德爲之守政教勃舉奸戢化成是以千里之內警柝不鳴俗恬以熙而錦之爲屬吏者得以優游文字間獨非幸歟志成爰究其始而論之以見茲郡之重由來已遠而茲志之作誠不容以或後也

書喬氏族譜

喬氏族譜凡八卷喬子啓仁之所輯也相傳喬自三國孫吳時居鶴砂里稱望族然歷世既遠傳序無徵故茲譜所述斷自元季清逸公始蓋尊其所知不敢慢也闕其所疑不敢誣也可謂慎矣矧其發凡舉例雖本之蘇歐二家至所遺略輒以義起所以彌綸其曲折而綱維於久近者無或遺憾又



可謂之備矣既慎且備詎非喬氏百世之信史乎  
嗚呼譜牒所以尊祖睦族故君子重之然非賢子  
孫莫克修也亦莫克傳也啓仁博學慎修屹然一  
時之望行將大行顯施以益克厥宗其爲茲譜之  
重不啻九鼎矣喬氏後賢尚思有以懋承而益衍  
其傳也哉譜刻旣成啓仁間以相示因識其後

跋王大傳詩選

黎易集真定嘗有板刻然真贋雜糅卒使失傳先  
生蒙冤泉壤讀者恒爲之扼腕而不平侍御揚公  
藻斷炳炳尤加崇企謂其得意時可望樂天平處

猶不減鄭都官柰何以里巷之作汚之耶迺於激  
揚之暇汰贗摘真得若干篇將以慰先生之神於  
九京也板工旣竣錦受而讀焉雅思風情珠聯璧  
映是何才之富而擇之精耶譬之展賈胡之篋光  
永陸離懽神奪目無非夜光明月也彼砭砭魚目  
自無容厠迹其間矣贊嘆之餘敬白侍御公所以  
詮梓之意如此

賀郡尊述齋何公擢河南憲副

伏以日麗鶴城田野樂皞熙之化鶯遷烏署朝  
廷彰簡拔之公激揚乍見飛霜調燮行看踐斗恭



惟某官大雅不羣至公無我屹然山嶽之鎮靜恢  
乎江海之寬容逸才敏瞻倚馬可以萬言博學旁  
通貯腹殆逾千卷孔思周情豈但潤身而華國賈  
書董策固將濟世而經邦眼空四海之英志奪三  
軍之帥始游庠校卽疑倫魁果登秋榜之高連奏  
春闈之捷製錦鳴琴暫膺邑寄翔鸞馴雉小試治  
功屢騰薦於鸚書尋徵還於香案粉署登賢才望  
斗懸於天北竹符分命歡聲雷動於雲間千里得  
師六條宣化明朗燭幽皎皎秋空之月湛清徹底  
稜稜冬壑之水積埃一掃以無遺疑獄片言而卽

決父母綏懷感泐閭閻之骨髓神明臨照驚銷奸  
宄之精魂輕徭緩賦不用急急之符感化歸仁自  
有堂堂之效岐麥嘉禾屢臻時瑞散蝗驅獸何讓  
古人求賢頻動夫拊髀秉憲遂膺乎推轂玉節絳  
騶執法之新儀特盛鷺車霜簡肅僚之古典偏憂  
寧唯表正而旌良抑以觸邪而指佞茲惟 聖主  
之所慎擇誠乃明公之所優爲鷹瞬鷲視攬轡而  
一道澄清玉秀珠明持斧而八方準則自外臺而  
內臺固無尋丈之隔由憲府而台府唯應旬月之  
間金甌玉鉉行收翊亮之功紫閣黃扉早建經綸



之業其等庇蒙萬厦感切二天競隨烏鵲以環車  
聊致盃盃而酌水敬申燕賀勉效蛙鳴詞曰 畫  
省才華推獨步 陛前曾獻長揚賦 天顏一笑  
選朝班玉麟銅虎親相付俄頃祥風布海波千里  
消煙霧喜津津歌舞成羣歡笑聲盈路 御墨屏  
風名久注知是 九重殊眷顧綸音昨夜自天來  
龍勅豸冠沾異數梁苑先聲播道上豺狼應震怖  
看明朝黃麻促召談笑登台輔

右詞寄歸朝歡

賀兵憲敖蒙泉先生 勅獎

伏以 鯨海風和頃刻之波濤頓息 龍樓天迥  
汪洋之雨露方新保障冊勲 褒嘉錫寵恭惟某  
官柱石弘才江河雅量文師灑噩之商周罔沿時  
好學本淵源於伊洛每與心融百篇立就士林競  
仰其豪竒四庫貫淹學者咸推其博洽科第聯收  
奚啻領髭之摘聲名歛起何殊颺馭之馳萬言陳  
宗社之謨諸老許廟堂之器瑞時威鳳振職爽鳩  
白雲讞議允協用罰之中丹筆平反克輔好生之  
德勅法清刑久擅英聲於粉署登賢拔雋俄膺峻  
秩於烏臺開府三吳省風一境秋氣肅清獨聳橫



空之鷗鷺風威汎掃寧容當道之豺狼激揚有體  
清霜凝列戟之前訟獄無究朗日照覆盆之下江  
海禁防不假千尋之鐵鎖胸襟籌略自有數萬之  
甲兵檢繩列郡文能附而武能威彈壓百僚剛不  
吐而柔不茹才無施而不可政屢試而咸宜虎兕  
出押良由州郡之失閑鯢鱷就烹始識閫司之難  
犯干將礫礪溟海灌螢耀五兵而奮迅於雷霆馳  
一檄而動搖夫山岳功當一面捷奏九重天  
鑑昭回 聖心暢悅沛鴻恩而錫賚渙 溫旨以  
褒嘉煌煌金幣式從內帑而頒燁燁使星爰自層

霄而至勲績已颺於簡冊履聲行上於星辰玉鉉  
金鼎弘施調燮之才鰲禁鳳池大展經綸之業春  
生萬井喜溢群司滄州日煖咸安堵以鑿耕青浦  
波恬共銜恩而歌舞敢陳燕語預賀鶯遷詞曰  
霜凜烏臺風生虎帳爭誇文武全才江防海障一  
時整頓安排千里金湯增險峻煙波萬頃淨無埃  
笑網中迸狐逸鼠何處藏埋 小施囊底澄清策  
忽雷轟電掣碎擊虺豺捷書飛奏 玉皇喜動顏  
開宣 旨錫金兼錫幣金龍勅天上飛來行看取  
勒勲彝鼎高步台階



右詞寄慶春澤

贈潛厓李先生署篆上海

伏以天風未積鳳鸞暫侶於飛鳧卉木有遭桃李  
借春而吐萼聿觀神化佇看超遷恭惟某官心潛  
百聖學貫三才拔犀角而擢象齒秀擅詞場抽蠶  
絲而析牛毛深探理窟高占虎龍之榜頓空騏驥  
之羣稍遷禮閣贊襄五事之儀進列諫坡益增七  
諍之重地位孤高以端亮受知於上天顏咫尺  
非仁義不陳於前排雲叫閭闔方慶得人涉筆署  
監溪俄驚改秩聊推餘緒倏奏膚功人酣膏雨動

鄰境之傾依天假福星照海民之凋瘵愷悌恩深  
淪入生靈骨髓公明威振驚銷奸宄精魂決數載  
不決之疑獄祇在片言弭一時難弭之寇逋何須  
寸刃立吏胥於水鑑臥赤子於春臺民方得其所  
哉公將自此升矣表異勸能禮數特頒於憲府薦  
賢爲國封章已徹於宸聰比之爲子產寧容專  
美於南荆久不見賈生會見蒙恩於前席史冊相  
期乎千載風雲徑接於三台勉效蛙鳴用伸燕賀  
詞曰 三載容臺十年諫省幾回鵠侍承明親承  
顧問昌言屢動天聽袖裏雷霆携諫草天邊



北斗避文星端的是經綸志展臺閣風生 哦松  
却是栽槐地想天將大任民事須經海城借寇霎  
時月朗風清臺檄飛來旌茂異歡聲播朝野喧騰  
早晚黃麻宣召談笑秉鈞衡

右詞調慶春澤

餞郡尊梓谷黃先生

伏以栲琴麥咏方騰千里之歡竹靜萱孤愈切終  
身之慕孝思懇篤歸夢頻驚恭惟某官望尊山斗  
學貫天人胸羅四庫之書筆掃千軍之陣繭絲牛  
毛深探理窟玉光劍氣輝映儒林雄文爽律諧金

玉而相宣馨德芳猷襲足蘭而並馥瑚璉璋自  
是宗廟之寶梗楠松栢咸稱梁棟之材果春闈秋  
榜之連登膺錦帳青縑之華選卓然偉績藉甚雋  
聲簡在 宸衷光生朝列屬東南之民渴需召父  
詢中外之望暫屈文翁春溫秋肅適寬猛之宜月  
朗霜凝振清明之譽蕩洗沓墨之徒立吏胥於冰  
上奉宣寬大之 詔保赤子於懷中省刑薄歛取  
法軻書與聚勿施克遵孔訓練兵嚴警以防奸幸  
新武備飭館設科而造士不振文風允爲列郡之  
表儀大作斯民之保障唯明公之心不以禁闥淮



陽而有間故澤民之政較穎川渤海而無殊行臺  
飛卓異之章鄰境傳神明之政民俗雍熙頓無聞  
於愁嘆親幃遼邈徒展轉於懷思精誠莫展於晨  
昏積鬱致妨於寢食違章乞養執志彌堅固知純  
孝之難違無奈群黎之失望爭先臥轍奔擁攀轅  
德孚屬令深懷師教之恩愛切群情永繫母慈之  
念敬陳膚語用代口碑詞曰 握蘭紫省誇英茂  
萬里風雲看輻輳幾年載筆補山龍賸有才名燦  
星斗簡住 淵衷久爲憫松民求父母便傳宣妙  
選班行無出長孺右暫教小試經綸手霎時峯泐  
來偏驟

右調寄歸朝歡

賀東明二尹高君獎勸

脫穎中州飛聲 上國丰標秀朗皎然玉樹臨風  
襟抱澄清瑩矣水壺映月丈夫之制行自偉天馬  
之步驟不凡秋蛇春蚓誰爭毛穎之鋒綉口錦心  
獨奪趙軍之幟聚螢光以繼晷殘編閱編於五車  
指揚葉而關弓勁矢偶虧於百步齟齬溟海鵬搏



小聽華亭鶴唳白也無敵挽回造化之權承哉負  
予閒却經綸之手桑麻漫盈於四野駉牝何止於  
三千枳棘春回憲府飛旌賢之典風雲氣轉明  
時多異等之遷鷓鴣一枝暫作花封之客雲衢萬  
里行聯玉笋之班望風興嘆於隣邦披霧騰歡於  
僚案薄言紀勝是用作歌 雲夢襟懷紫芝眉宇  
簾捲槐陰未午口碑一任路人傳况筆底天葩爛  
吐 三載哦松半生稽古消得旌書飛栢府轉頭  
鐘鼎到書生平步紅雲天尺五

右調寄鵲橋仙

玉帶花 壽同年朱玉峰太宰

文章獨占龍頭早三百英雄推公領袖視草玉堂  
談經御幄九天馳驟簡 聖心擢冠六卿名把金  
甌覆 忽憶故園松桂老拂袖歸來芝蘭競秀箕  
疇福備更道德風高鼎彝勳茂百年柱石端的是  
太平耆舊丙辰榜下殘翁遙獻長生酒

念奴嬌 次韻荅桂洲閣老

昌運天開翊贊功賴有金甌人物正色朝堂端的  
是萬仞巖巖立壁志氣橫秋忠誠貫日節操瑩冰  
雪古今賢相幾人如此英傑 遙想海岳孕靈磅



礪久間氣千年纔發生甫生申補天補袞鼎鹵勳  
難滅玉帶緋袍盤綉蟒偏稱朱顏綠髮繞室祥光  
頻見蚌珠吐月

賀聖朝 賀顧汝修得子

鬱蔥佳氣盈華屋歡笑聲相續玉掌高擎明珠一  
顆蘭湯初浴 瞳點秋波雙眉刷翠更峩峩頭玉  
人人歆羨碧漢麒麟丹山鸞鷲

鳳棲梧 送劉海津赴任瀏陽

楚天雨霽春風早紅旆星車驛路繁花草擔頭唯  
有一囊琴更誇萬卷胸中飽 洞庭千里恢襟抱

遙望君山一點青螺小昔賢曾此起風雲卽看飛  
步星辰表

鳳棲梧 送望川先生

河陽春暖花如簇四野謳歌歡笑聲相續舉頭瞻  
仰光明燭照棠樹年年增綠 宰臣拔雋方推轂  
省署清華高步夔龍躅太史頻將天象矚台星彷彿秦淮曲

鵲橋仙 贈東溪

碧海支流百曲千灣匯作一泓寒玉扶桑曉日映  
沙明見幾點鳧飛鷺浴 春風酒棹夜月漁舟到



處歌聲斷續看他年變化魚龍千層桃汛翻銀屋

隆慶己巳唐氏  
聽雨山房雕梓

龍江集卷之十四 終